

Itota Codito ingantedö ante Wäö nänö watapæ ante yewæmongainta

Wængonguī nänö Angainö ante nē
ëmongaingä Waocä bagacäimpa

1 ¹Wëenëñedë pönī Wængonguī nänö mä badöñedë Wængonguī nänö Angainö ante nē ëmongaingä iñömö do ingacäimpa. Tömengä Wængonguī weca quëwengacäimpa. Ayæ adocä adobaī nē Wængonguī inongä ingacäimpa. ²Wëenëñedë pönī tōmancoo badönämai iñedë mäningä do Wængonguī weca quëwengacäimpa. ³Wængonguī angä ëñëninque adocä tōmancoo badongacäimpa. Tömengä wīī badongä bai Wængonguī nänö badongaincoo tōmancoo edæ dæ ancædönimpa. ⁴Mäningä iñömö mönō quëwenguinö entawengacäimpa. Ayæ mönō quëwenguinö edæ entawëninque tömengä waodäni beyæ nē ñäö bai inongä ingacäimpa. ⁵Tömengä nē ñäö bai ingaingä inte mönō wëmō iñömō ta tamongä ate adoyömō ñäö bai bayonte edæ mönō wëmō iñömō edæ mänīī ñäö ædō cæte mönæ ëmonguīī. ⁶Onguīñængä adocanque ingante Wængonguī da pönongä pöningä ingampa. Tömengä ëmōwo, Wäö, ante pëmonte ingacäimpa. ⁷Tömengä iñömō Wængonguī nänö ñäö ëmömämo ante edonque pönī bacäimpa, ante nē ñäö bai ingaingä ingantedö ante apænecæte ante pongacäimpa. Adocä apænecä beyænque waodäni tōmänäni tömengä nänö nē apænedongä ingante pönencædänimpa, ante pongacäimpa. ⁸Incæte mäningä wīī ñäö bai ingaingä ingampa. Wæætë tömengä, Wacä waodäni beyæ nē ñäö

bai ingaingä ingampa, ante apænecæte ante pongacäimpa. ⁹Në nō ñäö bai nē ingaingä iñömō waodäni tōmänäni inänite tömengä nänö ñäö ëmömämo pönoncæte ante inguipoga wææ pongacäimpa.

¹⁰Tömengä inguipoga iñömō quëwengacäimpa. Ayæ tömengä inguipoga nē badongaingä iñongante inguipogaque quëwënäni wæætë Baa äninque tömengä ingante ædō cæte ate bai pönenguinänī. ¹¹Tömengä edæ tömengä quī weca pongacäimpa. Pongä ate tömengä guidëñäni inçæ tömengä ingante äñämai ingadänimpa. ¹²Incæte tömengä ingante nē ængainäni iñömō tömengä ëmōwo, Codito, ante nē wede pönëñäni iñönänite tömengä tömënäni inänite Ao äninque edæ, Wængonguī wënäni bacædänimpa, ante pönō cægacäimpa. ¹³Ayæ Wængonguī wënäni iñömō wīī waocä ëñate bai inänipa. Waocä, Botō wë manguinque, ante äñämai iñongante ëñadänipa. Wīī nänöogængä angä beyænque inänipa. Wæætë Wængonguī tömenganque cæcä ate tömënäni tömengä wënäni badänipa.

¹⁴Tömengä iñömō edæ, Wængonguī nänö Angainö, ante nē ëmongaingä inique Waocä ëñate bagacäimpa. Waocä ëñate badinque tömengä mönō weca quëwengacäimpa. Mæmpo Wængonguī Wengä adocanque inte adocä godömenque ñænængä inte nē cædongä ingä atamönipa. Adocä Mæmpo weca quëwente nē pongä iñömō tömengä nangui waadete pönō cædongä inte nöingä änongå ingampa.

¹⁵Wäo iñömö, Mäningä æbänö ingää, ante apænecäimpa. “Mäningä botö nê apænedongä ingantedö ante iïmai apænetabopa. Botö täno põmo ïmopa. Tömengä nê ayæ Ponguingä iñömö godömenque ñænængä inte cædongä ingampa. Edæ botö êñadämai iñedê tömengä do ingacäimpa,” ante nanguï põni yedæ äninque Wäo apænegacäimpa.

¹⁶Mäningä nê ayæ Ponguingä iñömö nanguï põni waadete põno cædinque tömengä wæætê wæætê nänö entawenö ante põnogä æninque tompopa. ¹⁷Edæ Wængonguï tömengä nänö wææ angainö ante apænecä êñëninque Möitee wodi wæætê adodö ante yewæmöninque waodäni inänite godongacäimpa. Wængonguï nänö waadete põno cægainö ante nöingä nänö angainö ante guiquënë Itota Codito beyænque êñëmompä. Itota Codito iñömö mönö nê Ponguingä ingaingä ingampa. ¹⁸Mönö waocabo tömämö incæ Wængonguï ingante cöwê adämai ïmopa. Incæte tömengä adocanque Wengä Wængonguï weca nê quëwënogä inte, Mæmpo æbänö ingaingä ingää, ante tömengä odömongä ate põnemompä.

Wäo æpænê guidönongä, Botö wii

Codito ïmopa, angä

(Mäateo 3.11-12; Mäadoco

1.7-8; Odoca 3.15-17)

¹⁹Oodeoidi awëneidi Eedotadëe quëwënanäni iñömö Wængonguï quï, ante nê godönäni tönö Debii wodi pæinänäni inänite da godönäni Wäo weca godänipa. Gote põninque adodäni, Æbidö inömi imii, ante apænebi êñëmönie, äñönäni Wäo iïmai äninque ²⁰nämä wææ änämai inte wæætê, Botö wii Codito inömo ïmopa, ante edonque põni angantapa.

—Botö wii Codito inömo ïmopa.

²¹Äñongante tömënanäni wæætê tömengä ingante,

—Æbidö inömi imii, Ediya wodi inömi imii. Apænebi êñëmönie.

Ante änäni êñëninque tömengä,

—Wabo ïmopa.

Ante äñongä tömënanäni wæætê,

—Wængonguï beyæ nê apænebi ayæ Ponguimi inömi imitawo.

Änäni êñëninque tömengä,

—Wabo ïmopa.

Ante angantapa.

²²Tömënanäni iinque äninque,

—Æbidö inömi imii, ante apænebi êñëmönie töö. Mönitö imönite nê da põnoninänäni weca godinque mönitö tömënanäni inänite, Æbidö imii, ante ancæmönimpa. Äninque bitö nämä incæ æbänö ämii.

²³Äñönäni Wäo wæætê tömënanäni inänite, Itaiya wodi nê Wængonguï beyæ nê apænecä nänö angainö bai ante iïmai ante apænebo êñencæminimpa.

—Önömæca incæ nê aa pebo inömo inte botö tömëmo pepämo iïmai nänäni êñënö impä. “Awënë nänö ponguinö ante töinö pinonte bai tee möedäni,” ante aa pebopa, angantapa.

²⁴Paditeoidi nê wadö tedete wadö cædäni nänäni cabo inönäni inte tömënanäni pancadäniya inänite da godönäni Wäo weca nê godänipa. ²⁵Gote põninque mäninänäni guiquënë,

—Bitö wii Codito inömi inte wii Ediya wodi inömi inte ayæ wii Wængonguï beyæ nê apænebi ayæ Ponguimi inömi imipa. Bitö ædö cæte waodäni inänite æpænê guidömi imii.

²⁶Ante äñönäni Wäo wæætê,

—Botö önonque æpænê guidönömo ïmopa. Wæætê minitö weca adocanque a ongongä iñongante, Tömengä æcänö ingää, ante minitö êñënämai iminipa.

²⁷Botö täno põmo ïmopa. Tömengä nê ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñi cæte cæbo imoo.

²⁸Betänia nänäni quëwëñömö Oododänö æmæmäa Wäo æpænê nänö guidönömö mänömai bagatimpa.

Itota Wængonguï Codotedo

²⁹Baänæ ate Itota bee tente pongä adinque Wäo apænecantapa. “Aedäni, iingä Wængonguï da põnogä põningä ingampa. Ayæ tömengä waodäni inguipoga quëwënanäni nänäni wënæ wënæ

cægainö ante æninque teémë mongænte wænguingä ingampa, ante Wængongui tömengä ingante, Codotedo, ante pönö pemongacäimpa. ³⁰Mäningä iñömö botö nê apænedongä iñongante botö iïmai apænetabopa. ‘Botö täno pömo iïmopa. Onguiñængä nê ayæ Ponguingä iñömö godömenque ñænængä inte cædongä ingampa. Edæ botö ëñadämai iñedë tömengä do ingacäimpa.’ ³¹Botö incæ adobaï, Tömengä æcänö ingää, ante ëñênämai intabopa. Mönö idægocabo iñömonte, Minitö tömengä ingante ëñencæminimpa, ante botö æpænë guidöninge pömo intabopa.”

³²Ayæ Wäö, Tömengä ingampa, ante æninque, “Botö æmö ayöмоте Wængongui Önöwoca incæ öönæde owote equemö bai wææ tömengäa næ gongængä atabopa. ³³Wængongui, Waodäni inänite æpænë guidöe, ante botö imote nê da pönöningä wii botö imo angä bai botö, Itota æcänö ingää, ante ëñênämaïmo incædömoimpa. Incæte tömengä botö imote iïmai angantapa. ‘Wængongui Önöwoca incæ æcänö onguiñængäa wææ næ gongængä ayömi mäningä iñömö nê æpænë guidönäni bai Wængongui Tæiyæ Waëmö Önöwoca ingante da pönongä waodäni mïmönoque pö guiquingä, ante cæcä ingampa.’ ³⁴Mäninö botö adinö impa. Mänömai beyæ iïmai ämopa, Mäningä iñömö Wængongui Wengä inongä ingampa,” ante Wäö apænegacäimpa.

Itota miñæ nê täno godäni

³⁵Baänæ ate Wäö tönö tömengä ëmiñæna mënaa adoyömö ongöñönäni ³⁶Itota wodo tebæ cægongä adinque Wäö angantapa.

—Aeda, tömengä iñömö Wængongui Codotedo inongä ingampa.

³⁷Mäninö angä ëñëninge Wäö nänö nê ëmiñæna inina incæ Itota ingante tee empo godaïmpa. ³⁸Itota dadi ëmænte ayongä tee empo pöna adinque angantapa.

—Quinante pöminaa.

Ante äñongä tömëna wæætë,
—Mætodo, æyömönö owobi. Apænebi ëñëmönae.

Änatapa. Mänine, Mætodo, ante mönö tededö, Nê Odömongä, ante impa.

³⁹Äna ëñëninge tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicä intapa. Ayæ nänö owocönë gote adinque tömëna adoönæ tömengä weca a ongönapa.

⁴⁰Wäö nänö äñinö ëñëninge Itota ingante tee empo goda mënaa iñönote adocanque Æntade iñömö Timönö Pegodo töninacä ingantapa. ⁴¹Tömengä nänö töninacä Timönö ingante ancæte ante diqui diqui minte gote adinque angantapa.

—Mëetiya mönö äñongä ingante atamönapa, angantapa. Tömengä iñömö Wængongui nänö nê Pönongaingä Codito inongä ingampa.

⁴²Ayæ Timönö ingante Itota weca ænte mämongä pongä adinque Itota angampa.

—Bitö Wäö wë Timönömi imi abopa. Botö wæætë, Bitö täimö dicabo bai imipa, ante bitö imite mönö tededö, Quepata, pönö pemömpa. Önonque adowo ëmöwo incæ guidiego tededö, Pegodo, äñänipa.

Pedipe tönö Näatänaedo inate Itota angä tee empo goda

⁴³Baänæ ate Itota, Gadideabæ ante gocæboïmpa, ante pönengäïmpa. Pedipe ingante adinque Itota tömengä ingante,
—Botö miñæ pöe, ämo, angacäïmpa.

⁴⁴Pedipe iñömö Æntade tönö Pegodo bai Betaida nana quëwëñömö adoyömö quëwëningä inongaimpa. ⁴⁵Pedipe Näatänaedo weca gocä adinque tömengä ingante iïmai äninque,

—Wængongui nänö wææ angainö ante yewæmöninque Möitee wodi nänö nê yewæmongaingä ingante mönitö atamönipa. Wængongui beyæ nê apænegainäni adobaï mäningä ingantedö ante yewæmongadänimpa. Tömengä iñömö Itota Näatadeta

quëwënongå inte Ootee wengä ingampa,
ante angantapa.

⁴⁶Ante äñongä Näatänaedo wæætë,
—Näatadeta quëwëñömö adocanque
waa quëwente pongä, ante mönitö dica
ëñëmöniyaa.

Angä ëñëninque Pedipe iñömö,
—Pö ae, angantapa.

⁴⁷Itota ayongä Näatänaedo pongä
adinque tömengä,
—Iingä iñömö näwä idægocä iñongä
inte tömengä nê nö entawënongå inte
babä cædämaï iñongä ingampa, ämopa.

⁴⁸Angä ëñëninque Näatänaedo,
—Æbänö imoo, ante bitö æbänö cæte
do ëñëmi,

Ante äñongä Itota wæætë tömengä
ingante,

—Pedipe iñömö bitö imite ayä aa
pedämaï iñedë bitö iigowæncawa
tä contabi iñömite botö bitö imite do
atabopa, angacäimpa.

⁴⁹Ayä Näatänaedo,
—Awënë nê Odömömi imi, bitö
Wængonguï Wëmi inömi imipa. Idægoidi
mönö cabo iñömönte bitö mönitö Awënë
Odeyebi inömi imipa, ämopa.

⁵⁰Äñongä Itota wæætë,
—Bitö iigowæncawa tä contabi
iñömite botö bitö imite atabopa, ämo
beyænque pönëmi imipa. Mäninö
ante adinque bitö godömenque botö
bamönengä cæbo acæbiimpa, ämopa.

⁵¹Tömengä godömenque angantapa.
—Bitö imite näwangä ämopa. Öönædë
wi ænete bayö Wængonguï anquedoidi
Waocä ëñagaingä weca wææninqe
æiyönäni bitö acæbiimpa.

**Cänaa quëwëñömö nani
monguimäno cæte bedäni**

2 ¹Mëönaa go adoönæque iñonte
Cänaa quëwëñömö Gadideabæ
iñömö monguimäno ante bedänipa.
Itota wäänä adoyömö ponte
ongongacäimpa. ²Itota tömengä
ëmiñänäni tönö tömënanäni inänite
adobaï, Monguimäno mini bequinque,
ante tē tē wente ænte pongadänimpa.
³Ayä yowepä wædænque tī nāmæ

biinömæ nani ämæ dæ bedäni adinque
Itota wäänä tömengä Wengä ingante,
—Tömënanäni biinömæ dæ ämæmpa.

⁴Äñongä Itota wæætë,
—Badä ëñëmi. Botö cæquëñënö
tömëmoque cæquïnö impa. Botö cæyedë
wii eyepä impa, ämopa.

⁵Tömengä wäänä iñömö nê cædäni
inänite,

—Minitö iminite æbänö angä ëñente
cæedäni, angantapa.

⁶Ayä önompo æmæmpoque
go adocadeque æpæncade dica
inte badöincade iñömö cö cædäni
ongoncadepa. Wængonguï weca
guicæte ante waëmö bacæmöimpa,
ante äate cædänipa, ante oodeoidi
nani äagaincade incadepa. Iincade
pancadepa otenta ditodo nä
ongoncadepa. Ayä pancacadea tië
ditodo nä ongoncadepa. ⁷Nê cædäni
inänite Itota,

—Æpæncadecoo iñömö æpæ eyede
pönï pe ñiñæedäni.

Angä ëñëninque pe ñiñængadänimpa.

⁸Ayä tömënanäni inänite,

—Owæta ænte wædænque mä iyænte
monguimäno ante nê cædongä ingante
godömini æncæcäimpa, ämopa.

Angä ëñëninque mänömaï
cægadänimpa. ⁹Ayä monguimäno ante
nê cædongä æpæ inimæ inca biinömæ
badimæ æninqe, Æbänö imæ, ante
bedinque tömengä, Itota nänö badönimæ
impa, ante ëñënaï inongäimpa.
Nê cædönäni Itota weca æpæ pe
ñiñænänique ëñëñönänimpa. Ayä
monguimäno ante nê cædongä iñömö
nê monguingä ingante, Nänënë pöe, aa
pecä pongä ate, ¹⁰iïmaï angantapa.

—Wadäni tömänäni waimæ biinömæ
täno godönäni bedänipa. Ayä ate æämæ
becæ pönäni tömo pönï bedäni adinque
tömënanäni biinömæ wædænque godonte
nani ænimæ wæætë godönäni bedänipa.
Bitö guiquënë ñowoyedë waimæ biinömæ
bitö nänënë concædimæ ænte pömipa.

¹¹Itota, Acædänimpa, ante mänömaï
cædinque tömengä Cänaa quëwëñömö
Gadideabæ iñömö mänii mä nänö

bamönengæ cægacäimpa. Mänii täi piñante bamönengæ cæcä adinque waodäni, Tömengä waemö pöni inte cæcampa, ante edonque agadänimpa. Ayæ tömengä emiñænäni iñömö tömengä ingante godömenque wede pönänäni bagadänimpa.

¹²Ayæ ate Capënaömö quëwëñömö Itota tömengä wäänä tönö tömengä biwiidi tönö tömengä emiñænäni tönö wææ gogadänimpa. Mäniñömö godinque wædænque eönæ quëwengadänimpa.

Wængongui oncö tæiyæ waemö bacäimpa, ante cæcä

(Mäateo 21.12-13; Mäadoco 11.15-18; Odoca 19.45-46)

¹³Wodo pänta gogaiönæ, ante oodeoidi Patowa näni ææmæ cænguionæ oo pöni bayedë Itota Eedotadë iñömö æigacäimpa. ¹⁴Tömengä iñömö Wængongui oncö ñænæncönë yabæcönë pö guidiinque ayongä wagadaidi obegaidi tönö equemöidi inänite godonte æncæte ante në mänäni inänite acantapa. Ayæ wadäni campio næænte në godonte ænönäni iñömö näni godonte æimpaa tæ contayönänite tömengä acantapa. ¹⁵Yæguincamë ñænæmömö nää wënëninque que cæte ate æninque tömengä Wængongui oncö ñænæncönë yabæcönë në ongönäni inänite tatodongä tao godänitapa. Adobaï obegaidi tönö wagadaidi inänite, Tao gobæwedäni, angä tao godänitapa. Ayæ campio næænte në godonte ænönäni tömënanäni tiguitamö æninque tömengä wido cæcä gueogæ gotimpa. Ayæ adodäni näni æimpaa bæ tacä guidömëmæ go wææntapa. ¹⁶Ayæ equemöidi godonte æncæte ante në mänäni inänite Itota, —Minitö equemöidi ænte tao gobæwedäni. Botö Mæmpo oncönë incæ minitö ædö cæte, Mönö godonte æiñömö bai impa, ante cæminitapa töö, angacäimpa.

¹⁷Mäninö angä ëñëninque tömengä emiñænäni Awënë Dabii nänö yewæmongainö ante iimaï ante pönente wædänipa. “Bitö oncö ante waodäni waa

acädänimpa, ante cæcæboimpa, ante botö nangui cæinente wængui wæ,” ante yewæmongatimpa.

¹⁸Ayæ oodeoidi awënëidi pancadäniya tömengä ingante,

—Bitö mänii tömää awënë bai cæbi incæ æbänö bitö bamönengæ cæte odömömi adinque mönitö, Mäningä në angä ingampa, ante ëñencæmönimpa, ämönipa.

¹⁹Äñönäni Itota wæætë tömënanäni inänite,

—Wængongui tæiyæ waemö oncö incæ minitö iincö bæ tate ewëmini ininque botö mëönaa go adoönæque iñö miincö mänoncæboimpa, ämopa.

²⁰Angä ëñëninque oodeoidi awënëidi pancadäniya,

—Wængongui tæiyæ waemö oncö coadenta i tei wadepo ganca mänongadänimpa. Bitö iñömö ædö cæte, Botö mëönaa go adoönæque iñö miincö mänoncæboimpa, ämii, änänitapa.

²¹Itota iñömö nämä baö incæ ante, Wængongui tæiyæ waemö oncö bai impa, ante apænecä inongäimpa. ²²Tömengä iincayæ wængä ate Wængongui, Nänäni ömæmöe, angä nänäni ömæmongä ate, Æbänö angacäi, ante tömengä emiñænäni pönänitapa. Ayæ, Wængongui angä ëñente näni yewæmongainö nö impa, ante pönänäni inte ayæ Itota tömënanäni inänite nänö äninö ante adobaï pönengadänimpa.

Itota, Mönö waocabo æbänö imö, ante ëñengampa

²³Patowa näni ææmæ cæyedë Itota Eedotadë iñömö ponte quëwëninque, Acädänimpa, ante bamönengæ nangui cæcä adinque waodäni tæiyænäni iñömö, Mäningä mönö Codito ingampa, ante pönengadänimpa. ²⁴Itota edæ, Waodäni tömänäni æbänö entawënanäni inänii, ante do ëñënongä inte tömengä, Wabänö pönënanäni, ante tömënanäni inänite gomö adongä ingantapa. ²⁵Edæ tömengä waodäni näni entawënö ante do ëñënongä ingantapa. Ininque waocä iñömö, Waodäni æbänö cädänii,

ante apænecäcäimpa, ante Itota tömengä ingante, Bitö botö imo adodö ancæbiimpa, ante änämaï ingacäimpa.

Itota tönö Niicodemö

3 ¹Paditeocä adocanque tömengä emöwo Niicodemö tömengä iñömö oodeoidi awënëidi tönö nê godongämæ cæcä ingacäimpa. ²Adocä woyowotæ Itota weca pöningue,

—Awënë nê Odömömi ëñëmi.

Wængonguï, Odömoncæbiimpa, ante bitö imite da pönongä pönimi imipa, do ëñëmönipa. Edæ Wængonguï waocä tönö godongämæ cädämaï ingä ininque mäningä ædö cæte bitö bai bamönengæ cæcä aquimönii.

³Angä ëñëningue Itota wæætë,

—Bitö imite näwangä ämopa. Nê mempoga ëñadinganque Wængonguï Awënë Odeye nempo guiite aquingä ingampa.

⁴Äñongä Niicodemö,

—Waocä picængä ba ate ædö cæte mempoga ëñaquingä. Tömengä nänö wäänä cæncadë ædö cæte mempoga guui æidingue ëñaquingä.

⁵Angä ëñëningue Itota angantapa.

—Bitö imite näwangä ämopa. Waocä æpænë guuidengä iñongante Wængonguï Önöwoca cæcä beyænque mempoga ëñadinganque Wængonguï Awënë Odeye nempo guiite quëwenguingä ingampa.

⁶Baonga beyænque nê ëñadäni iñömö edæ baonque ëñate quëwënänipa.

Wæætë Wængonguï Önöwoca cæcä beyænque nê ëñadäni iñömö Wængonguï Önöwoca ingante ewocate quëwënänipa. ⁷Botö, Bitö mempoga ëñaquënëmi imipa, ante botö äno ëñëningue, Æbämë impa, ante änämaï incæbiimpa. ⁸Woboyæ nänö cægaï bai wayömö wayömö pämmænte gopa. Woboyæ nänö pämmämö ëñëmö incæ, Ædonö pämmænte pö, ædonö pämmænte go, ante ëñënämaï imompa. Wængonguï Önöwoca cæcä beyænque nê ëñadäni tömänäni inänite tömengä æbänö cæcää, ante adobaï ëñënämaï imompa, ämopa, ante Itota apænecantapa.

⁹Apænecä ëñëningue Niicodemö, —Æbänö inguüi.

¹⁰Äñongä Itota wæætë,

—Idægoidi inänite nê odömömi imi incæte mäninö ante ædö cæte ëñënämaï imii. ¹¹Bitö imite näwangä ämopa. Mönitö quiëmë ante ëñënimöni inte mäninö ante apænemönipa. Mönitö quiëmë ante adimöni ininque, Mänömaï impa, ante apænemönipa. Minitö guiquënë möni äno ante apænemöni ëñëningue ayæ Baa ämïni inte pönënämaï iminipa. ¹²Botö minitö iminïte, Inguipoga quëwënäni weca æbänö i, ante apænedimo imo incæte minitö ëñënämaï iminipa. Ininque Wængonguï cæcä beyænque öönædë mïni quëwenguinö ante æbänö i, ante apænebo bai ædö cæte pönenguimïni, ante apænecantapa.

¹³Ayæ apænedinque, “Woadäni tömänäni öönædë æidämaï ingadänimipa. Waobo nê ëñagaïmo inte öönædë quëwente nê wææ pömo iñömö botö adoboque öönædë æibo imopa. ¹⁴Möitee wodi önömäca tantæ näni badöninto æningue awäa nã cædingue gö cæcä a ongongatimipa. Waobo ëñagaïmo imote adobaï awäa timpodinque tiwadinque gö cædäni wægonquënëmo imopa. ¹⁵Mänömaï botö imote cædäni adingue botö imote nê wede pönënäni iñömö tömänäni cöwë wänämaï quëwencädänimipa,” ante Itota apænecäcäimpa.

Wængonguï nänö waadete pönëno

¹⁶“Edæ Wængonguï incæ inguipoga quëwënäni inänite nê waadete pönengä inte tömengä Wengä adocanque onguïñængä iñongante pönongä pongacäimpa. Ininque æcänö tömengä ingante nê wede pönëna iñömö tömengä wë womönämaï inte cöwë wänämaï quëwencæcäimpa. ¹⁷Edæ Wængonguï incæ tömengä Wengä ingante inguipoga iñömö da pönongä pongacäimpa. Incæte, Inguipoga quëwënäni nänï pante wæquinque, ante apænte ancæte ante wïi pongacäimpa. Wæætë

inguipoga quëwënnäni inänite tömengä ængä beyænque quëwencädänimpa, ante tömengä ingante da pönongä pongacäimpa.”

¹⁸“Æcänö tömengä ingante në wede pönëna iñömö Wængonguï tömengä ingante, Bitö pante wæquinque cæbipa, ante apænte änämaï incæcäimpa. Æcänö guiquënë wede pönënämaï ina iñömö Wængonguï tömengä ingante, Botö Wengä adocanque iñongante bitö tömengä ëmowo ante pönënämaï inömi inte wæcæbiimpa, ante do apænte angä ingampa. ¹⁹Wængonguï nänö apænte änö iñömö iïmaï impa. Në ñäö bai inongä iñömö, Wængonguï æbänö ingäa, ante inguipoga iñömö ancæte ante pongacäimpa. Incæte waodäni tömënnäni nani cædimämo wënæ wënæ i beyænque wëmö iñömö ante waadete pönënnäni inänipa. Wæætë në ñäö bai inongä ingante waadedämaï inänipa. ²⁰Në wënæ wënæ cædönäni inte ñäö iñömö ante pïiniquine Baa äninque, Mönö cædinö edonque pönï badämaï ingæimpa, ante ñäö iñömö pönämaï inänipa. ²¹Waodäni Wængonguï näwangä nänö ämaï në cædönäni guiquënë, Mönö cædinö ante Wængonguï mönö tönö godongämæ cæcä beyænque cætamompa, ante edonque pönï acädänimpa, ante cædinque ñäö iñömö pöninque cædänipa.”

Wäo në guidönongä Itota ingantedö ante apænecä

²²Ayæ ate Itota tömengä ëmiñænäni tönö Oodeabæ wædænque nani quëwëñömö godänitapa. Gote pöninque mäniñömö tömënnäni tönö wædænque quëwënnäni Itota angä beyænque tömënnäni waodäni inänite æpænë guidönäni guigadänimpa. ²³Ënöö quëwëñömö æpæ nanguï mä adinque Wäo mäniñömö guidongä guigadänimpa. Ayæ waodäni, Wäo mönitö imönite æpænë guidonguingä, ante cöwë tömengä weca pönäni inänite guidongä guidänimpa. Ënöö

quëwëñömö Tadiï quëwëñömö eyequeï inimpa. ²⁴Mäniñedë Wäo ingante ayæ tee mönedämaï ingadänimpa.

²⁵Wäo ëmiñænäni pancadäniya oodeocä adocanque tönö apænedinque, Mönö oodeocabo æbänö cæte Wængonguï weca guicæte ante waëmö bacæmöimpa, ante tömënnäni nani pönëno ante guëadö guëa ante tedewënnäni. ²⁶Adodäni Wäo weca ponte apænedinque,

—Në odömömi ëñëmi. Oododänö æmæmäa bitö weca në pöningä ingantedö ante bitö, Mäningä ingampa, ante apænebitawo. Edæ mäningä onguïñængä iñömö adobai æpænë guidongä guidänipa töö. Waodäni tömänäni tömengä weca godänipa, ante wædänitapa.

²⁷Ante wædäni ëñënninque Wäo, —Wængonguï öönädë quëwënnongä pönö angä æninque waocä mänömaï beyæ cæcampa. ²⁸Botö wiï Codito inömo imopa. Inæmpa Wængonguï botö imote täno da pönongä pönimo imopa. Tömengä ayæ Ponguingä, ante apænetabopa. Mänömainö ante apænebo ëñënimini inte minitö tömëmimi mäninö ante në apænequënnimini iminipa. ²⁹Monguingä iñömö mongä ate tömengä onquiyængä nänöogængä bacampa. Tömengä guidengä iñömö në monguingä ante wänö cönninque ëñëñongä monguingä apænecä ëñënninque, Monguingä apænecä ëñëmopa, ante watapæ tocampa. Botö adobai Codito apænecä ëñëmopa, ante mäningä bai nanguï watapæ tobo imopa. ³⁰Tömengä iñömö godömenque ñænængä inte cædongä baquënnengä ingampa. Botö guiquënë pönömenque wædämo inte cædömo baquënnemo imopa, ante Wäo apænegacäimpa.

Öönädë në quëwente wææ pongä

³¹Ayæ Wäo godömenque apænecantapa. Öönädë në quëwente wææ pongä iñömö tömengä iñömö wiï wadäni bai wædangä inte wæætë ñænængä inte cædongä ingampa.

Öönædē nē quēwente wææ pongā
 īñōmō tōmengā godōmenque ñænængā
 inte cædongā ingampa. Inguipoga
 īñōmō nē ēñacā guiquēnē waodāni bai
 quēwēnongā inte inguipogaque ante
 apænecampa. ³²Tōmengā Wængonguī
 weca quīēmē adingā inte quīēmē
 ēñēningā inte mānīnō ante apænecā
 ēñēninge wadāni wæætē, Nāwangā
 impa, ante ānāmaī inānīpa tōō.
³³Mānīnō ante nē Ao angā guiquēnē
 tōmengā, Wængonguī nāwangā angā
 ingampa, ante edonque pōnī angā
 īnongā ingampa. ³⁴Edæ Wængonguī
 nānō da pōnōningā īñōmō Wængonguī
 nānō ānō ante apænecampa. Tōmengā
 ingante Wængonguī īñōmō tōmengā
 Ōnōwoca ingante godongā ænīnque
 tōmengā ædæmō ēwocate quēwengampa.
³⁵Mæmpo Wængonguī īñōmō tōmengā
 Wengā ingante nē waadete pōnengā
 ingampa. Wængonguī tōmengā
 ingante, Bitō nempo quīnō īnīncoo
 tōmancoo pōnōmo ænīnque bitō awēnē
 bācabi impa, ante pōnō cægacā impa.
³⁶Æcānō Wængonguī Wengā ingante
 nē wede pōnēna īñōmō tōmengā cōwē
 wænāmaī quēwencæcā impa. Æcānō
 Wængonguī Wengā ingante nē Baa ante
 pōnēnāmaī īna guiquēnē tōmengā wīī
 cōwē wænāmaī quēwencæcā impa. Edæ
 Wængonguī tōmengā ingante ænguī
 nānō panguīmāmo cōwē cædongā
 ingampa, ante Wäo mānīñedē īnque
 apænecacā impa.

**Itota Tāmadiabæ onquiyængā
 ingante apænecā**

4 ¹Paditeoidi inānite īīmaī ante
 tededāni ēñēnānitapa. Itota pōnō
 cædinque æpænē guidongā guīdinque
 tōmengā nānō ēmīñænāni īñōmō wīī
 Wäo ēmīñænāni bai wædænque badāni
 inte nanguī īnāni badānīpa, ante
 tededānitapa. ²Mānōmaī ānāni incæte
 wīī Itota nē guidongā īnongā impa.
 Wæætē tōmengā ēmīñænāni waodāni
 inānite guidōnāni guīgadānīpa.
³Mānīnō ante Paditeoidi dō ēñēnānīpa,
 ante ānāni ēñēnīnque Awēnē Itota

Oodeabæ quēwēnīnque wadæ go
 Gadīdeabæ īñōmō ocæ ēmānte
 gogacā impa.

⁴Gadīdeabæ taadō Tāmadiabæ
 īñōmō tæcæguedē inō godō tōmengā
 goquēnengā īnongā impa. ⁵Tāmadiabæ
 īñōmō godīnque tōmengā Ticada nāni
 āñōmō pongantapa. Mānīī Ticada
 quēwēñōmō eyequeī docā AACobo wodi
 tōmengā wengā Ootee wodi ingante,
 Pancabaa bitō ōmæ baquīñōmō, ante
 tōmengā ingante nānō godongaīmæ
 īnīpa. ⁶Ayæ æpāamōnīcæ AACobo
 wodi nānō ææ wogaīmōnīcæ adoyōmō
 īnīpa. Itota taadō gobæ inō godīnque
 nangæ badīnque æpāamōnīcæ īñōmō
 pō tæ contayongā mānīñedē tæcæ bæcā
 bagatīpa. ⁷Tæ contate ongōñongā
 Tāmadiabæ quēwengā onquiyængā
 æpæ iyante tadonte æncæte ante pongā
 adīnque Itota tōmengā ingante,

—Æpæ pōnōmi beboe, angantapa.

⁸Edæ tōmengā mīñæ nē godāni
 mānīnāni quēwēñōmō cænguī godonte
 æncæ godāni īnōnānīpa.

⁹Tāmadiaidi inānite oodeoidi cōwē
 gomō adāni inānīpa, ante ēñengā inte
 Tāmadiabæ quēwengā onquiyængā
 īñōmō Itota ingante,

—Bitō oodeobi īmi incæte botō

Tāmadiabæ quēwēmo īñōmote bitō ædō
 cæte botō īmote, Æpæ pōnōmi beboe,
 āmīī, āmopa.

¹⁰Āñongā Itota wæætē,

—Bitō, Wængonguī quīnō nānō pōnōnī
 ī, ante ēñente bai ayæ, Æbodō īnōmo
 inte bitō īmite, Æpæ pōnōmi beboe,
 ante apænēboo, ante ēñente bai bitō
 wæætē botō īmote, Æpæ pōnōmi beboe,
 ancædōmī impa. Ayæ botō bitō īmite æpæ
 quēwenguīmæ pōnōmo becædōmī impa,
 āmopa.

¹¹Angā ēñēnīnque onquiyængā,

—Awēnē, bitō æpæ mā iyancæde
 dæ ampa. Ayæ æpāamōnīcæ guībæ
 impa. Mānīmæ æpæ quēwenguīmæ
 bitō nē apænēdīmæ ædōnō mā iyante
 ænguīmīī. ¹²Mōnō docā mæmpo AACobo
 wodi īñōmō, Botō æmæwo wæmo
 adīnque botō æpāamōnīcæ mīnītō quī

bacæimpa, ante iimōnicæ mōnō imonte godongacæimpa. Tōmengä adomōnicæ æpæ begacæimpa. Tōmengä wēnāni tōnō tōmengä cæningäidi adobai adopæ begadänimpa. Adocä mōnō docä wædangä iñongante bitō godōmenque ñænæmi inte nē cædōmi imitawogaa, ämopa.

¹³ Äñongä Itota wæætē,

—Æcämenque iñōmō mǎnimæ bedinque wæætē gæwænte bacæcæimpa.

¹⁴ Æcämenque botō godonguimæ nē becä guiquenē tōmengä gæwænāmai cōwē quēwencæcæimpa. Wæætē botō tōmengä ingante tōmēmo godonguimæ godōmo bedinque tōmengä botō quēwēnō entawente quēwencæcæimpa. Æpāamōnicæ cōwē cægō bai botō tōmengä mīmōno godonguimæ beyænque tōmengä wænāmai nānō quēwenguinō do æninque quēwencæcæimpa, ämopa.

¹⁵ Onquiyængä tōmengä ingante,

—Awēnē, äninque, Botō gæwænāmai bacæboimpa, ante mǎnimæ botō imote pōnōmi beboe, ämopa. Ayæ mǎniñōmō cōwē æpæ iyæncæ pōnāmai incæboimpa.

¹⁶ Ante äñongä tōmengä wæætē,

—Goe, bitō nānōogængä ingante aa pedinque ænte māmōmi pongæe, angantapa.

¹⁷ Äñongä tōmengä wæætē,

—Botō nānōogængä dæ ampa.

Angä eñēninque Itota tōmengä ingante, —Bitō, Botō nānōogængä dæ angampa, äninque nō ante ämipa. ¹⁸ Iñæmpa bitō nānōogæidi ònompō æmæmpoque iñōnānite bitō tōmēnāni inānite mōnīmi imipa tōō. Ayæ ñōwoyedē onguñængä bitō weca nē quēwengä iñōmō wīi bitō nāwä nānōogængä ingampa. Iñinque ñōwo bitō äñō iñōmō edæ nāwangä impa, ämopa.

¹⁹ Angä eñēninque onquiyængä,

—Awēnē, Bitō Wængonguī beyæ nē apænebi imi adinque eñēmopa. ²⁰ Mōnitō dodāni mæmpoidi wodi, Ii onquiyabo inō gote Wængonguī ingante, Bitō Awēnē Wængonguī imidō anguēnē, ante ædæ wææninque angadänimpa. Mōnitō

nē oodeoidi imini guiquenē, Wængonguī ingante waa ate apænecæte ante Eedotadēē quēwēñōmō mǎniñōmonque godinque ædæ wæænte apænecæcæimpa, ämīnīpa tōō.

²¹ Äñongä Itota wæætē,

—Onquiyæmi eñēmi. Botō äñō eñēninque pōnēe. Mōnitō iñōmō ædæ wææninque botō Mæmpo ingante, Bitō Awēnē Wængonguī imidō anguēnē, ante iī onquiyabo inō incæ Eedotadēē mǎniñōmō incæ mōnitō mǎniñō ante änāmai anguñōnæ oo pōñi impa. ²² Mōnitō tāmadiadi iñōmō nē Wængonguī ingante, Bitō Awēnē Wængonguī imidō anguēnē, ante ædæ wææninque apænemīni incæte adocä ingante, Æbānō ingää, ante eñēnāmai imīnīpa tōō. Mōnitō guiquenē nē ædæ wææninque Wængonguī ingante waa ate apænemōni inte adocä, Æbānō ingää, ante do eñēmōni imōnīpa.

Edæ, Nē wēnæ wēnæ cædāni wæncæ cædināni incæ quēwencædänimpa, ante nē Ængä iñōmō oodeocä inongä ingä apa änewēē. ²³ Botō Mæmpo ingante, Bitō Awēnē Wængonguī imidō anguēnē, ante ædæ wææninque nāwangä ante apænedōnāni inte apænecædänimpa. Adodāni, Nāwangä impa, ante nō pōnente ewocadāni inte ædæ wææninque Wængonguī ingante mǎniñō ante watapæ apænecædänimpa. Mǎniñō ante nāni apænequñōnæ iñōmō edæ oo pōñi impa. Edæ do iinque batimpa. Wængonguī, Mǎnōmai entawente nō pōnēnāni bai ināni inānite diqui diqui mīninque, Mǎniñānique botō imote, Bitō Awēnē Wængonguī imidō anguēnē, ante ædæ wææninque watapæ apænecædänimpa, angampa. ²⁴ Wængonguī Öñōwocaque ewocate quēwengä ingampa. Iñinque nē ædæ wæænte tōmengä ingante watapæ apænedāni iñōmō tōmēnāni, Nāwangä impa, ante nō pōnente ewocadāni inte ædæ wææninque tōmengä ingante watapæ apænequēnēnāni inānīpa, ämopa.

²⁵ Angä eñēninque onquiyængä,

—Botō, Mēetiya nāni Codito äñongä poncæcæimpa, ante do eñēmopa. Tōmengä pongä ate, Æbānō inguūi,

ante mönō imonte tömänō odömönte
apænecä ēñencämönimpa.

²⁶ Äñongä Itota wæætē,

—Botō nē apænebo iñömō Codito
inömo imo apa cæbii, ämopa.

²⁷ Tæcæ apæneyongante tömengä miñæ
nē godäni ocæ emænte ponte ayönäni
tömengä iñömō onquiyængä ingante
apænecä adinque, Æbänō cæ wæmönii,
ante guiñente wædänitapa. Incæte,
Æbänō ämii, ante, Quinante tömengä
ingante tedebii, ante adocanque incæ
änämaï ingantapa. ²⁸ Ayæ onquiyængä
tömengä iyæncade emō cæte näni
quëwëñömō ocæ emænte gote pöninque
waodäni inänite apænedinque,

²⁹ —Ægodöedäni, onguiñængä iñömō
botō imote tæcæ adinque, Botō æbänō
cæboo, ante tömänō ante botō imo nē
apænecä ingante pō aedäni. Mäningä
wabänō mönō Codito inongä ingantawo,
ante ämopa.

³⁰ Angä ëñëninque tömënäni näni
quëwëñömō tao godinque tömengä
weca gogadänimpa. ³¹ Onquiyængä näni
quëwëñömō tæcæ goyongä Itota nänō nē
ëmiñænäni iñömō tömengä ingante,
—Awënë nē Odömömi imi wædænque
cæe, ämönipa.

³² Ante äñönäni tömengä wæætē
tömënäni inänite,

—Botō cængui botō eadō ante quino i,
ante minitō guiquënë tömää ëñënämaï
imönipa töö.

³³ Angä ëñëninque tömengä
ëmiñænäni godongämæ nämanque
apænedinque,

—Wabänō wacä tömengä ingante
cængui ænte pongantawo.

³⁴ Äñönäni Itota,

—Botō imote nē da pönongä nänō äno
baï botō cædō iñömō mäniï tömömo
cængui baï impa. Ayæ, Tömengä nänō
cædō ante tömänō iinque cæbopa, ante
botō cædō iñömō botō cængui baï
adobaï impa. ³⁵ Minitō iñömō, Mëa
go mëa apäicä bayonte amiñayedē
tömëmoncodē gæcämönimpa, ante
wiï äminitawo. Botō guiquënë minitō
iminite ämopa. Waodäni inänite

wi æmante aedäni. Edæ mäninäni
tömëmoncoo gæyedē bai inänipa. ³⁶ Itota,
Botō beyæ ante waodäni inänite nē
gædongä ingante botō, Bitō cæbipa,
ante paga cædinque ñowoyedē incæ do
pönömo ængampa. Wänämaï wantæpiyæ
quëwencædänimpa, ante cædinque
ñowoyedē incæ tömengä tömënäni
inänite do gædongä ingampa. Iinque
botō äno ante waodäni mimöno nē
quiyadingä tönō nē gædingä tönō guëa
tocædaïmpa. ³⁷ Mänömaï wëñëñedē
näni angäinō ante, Waocä adocanque
tömmō quiyacä ate wacä guiquënë
nē gædongä ingampa, ante näwangä
ante impa. ³⁸ Tömëmoncodē iñömō
cædäni baï cædämaï imini incæte
minitō tömëmoncoo gæquinäni baï
bacämiminpa, ante botō, Waodäni botō
quinäni inänite gæcämiminpa, ante
minitō iminite da godömo gominitapa.
Wadäni iñömō do mänincodē nanguï
pöni quiyate cædinque botō äno ante
waodäni inänite apænegadänimpa.
Minitō guiquënë mini cædämaï iñömō
incæ önonque gædimini imönipa, ante
Itota apænegacäïmpa.

³⁹ Onquiyængä guiquënë tämadiaidi
mäniñömō näni quëwëñömō
quëwënäni inänite, “Tömengä iñömō
botō imote tæcæ adinque, Botō
æbänō cæboo, ante tömänō ante botō
imote apænecantapa,” ante apænecä
ëñëninque tömënäni nanguï inäni Itota
ingante pönengadänimpa. ⁴⁰ Tämadiaidi
tömengä weca godinque, Bitō mönitō
weca a ongöe, änäni ëñëninque
tömengä mëönaa iñonte tömënäni
weca owocantapa. ⁴¹ Tömengä nänō
owoyedē tömengä nänō äno beyænque
godömenque tæiyænäni iñömō tömengä
ingante wede pönente badänitapa.

⁴² Adodäni onquiyængä ingante,

—Wiï bitō apænete änonque ante
ëñëninque pönëmöni inte mönitō tömengä
apænecä adobaï ëñënimöni imönipa.
Ayæ, Mäningä iñömō inguipoga mönō
quëwencabo iñömönte tömengä näwangä
mönō imonte nē Änongä ingampa, ante
do ëñëmönipa, apænegadänimpa.

**Itota cæcä beyænque awënë
tönö cæcä wengä waa bacäi**

⁴³Mëönaa go ate tömengä mäniñömö quëwëninque wadæ godinque, Gadideabæ gocæboimpa, ante gocantapa.

⁴⁴Itota incæ wëñëñedë, Ìimaï impa, ante äñongäimpa. Wængongui beyä nê apäñecä inte tömengä nänö pægaimæ incæ mäniñömö apäneyongä tömengä tönö pægainäni guiquënë tömengä ingante wii waa adänipa töö, ante äñongäimpa. ⁴⁵Tömengä mäniï Gadideabæ nänö ponque pongä adinque gadideaidi edæ Eedotadëë iñömö Patowa nani äëämæ cæyedë Itota bai mäniñömö gote ongöñönäni, Tömengä æbänö cæcää, ante tömää adinäni inte, Bitö pömi waa amönipa, ante tömengä ingante apäñegadänimpa.

⁴⁶Ayæ Gadideabæ godinque Itota wæætë Cänaa nani quëwëñömö, Æpä incæ biinömæ bacäimpa, ante wëñëñedë nänö cædiñömö adoyömö gocantapa. Capënaömmö nani äñömö quëwëninque adocanque pancabaa awënë tönö godongämæ cæcä iñömö tömengä wëñængä onguiñængä wënæ wënæ inongäimpa. ⁴⁷Adocä onguiñængä iñömö, Itota Oodeabæ quëwente Gadideabæ pongä, änäni ëñëninque tömengä Itota weca gote angantapa. Botö wëñængä onguiñængä wænæ cæcä iñongante bitö tömengä ingante cæbi waa bacæ. Ægodöe. ⁴⁸Itota tömengä ingante,

—Botö, Acæminimpa, ante bamönengæ cæbo ate wæmini inte minitö mäninö beyænque botö imo pönëmini awædö.

⁴⁹Ante apäñecä ëñëninque pancabaa awënë tönö godongämæ cæcä,

—Awënë, botö wëñængä ayæ wänämaï iñedë ægodöe gocäimpa.

⁵⁰Ante äñongä Itota wæætë,

—Ñowo wadæ goe. Bitö wëñængä iñömö quëwencæcäimpa, ämopa. Angä ëñëninque onguiñængä, Itota nänö änö nö impa, ante pönëninque wadæ gogacäimpa. ⁵¹Tömengä, Botö oncö, ante taadonque goyongante tömengä

beyä nê cædönäni tömengä ingante apäñecæte ante pö bee ténänitapa. Pö bee téninque,

—Bitö wëñængä waa bacäi.

⁵²Ante apäñedäni ëñëninque tömengä tömëñäni inänite, Botö wëñængä æyedënö waa bacäi, ante äñongä tömëñäni wæætë tömengä ingante,

—Ìimö ædæ gowayedë mäniñedë tömengä ganæ bacantapa, ante apäñedänitapa. ⁵³Ayæ wëñængä mæmpo, Bitö wëñængä quëwencæcäimpa, ante Itota botö imote nänö äniñedë adoyedë botö wëñængä do waa bacantapa, ante wædinque tömengä tönö tömengä nani quëwencabo tömancabo Itota ingante wede pönëñäni bagadänimpa. ⁵⁴Itota oodeoidi weca quëwente Gadideabæ ocæ ëmante pöninque tömengä mäniñömö ii bamönengæ cædinque mempoga nänö cædö bamönengæ bagatimpa.

**Itota cæcä beyænque pæ opa
pæ opa gocä waa bacäi**

5 ¹Ayæ ate oodeoidi, Mönö Wængongui beyä, ante nani äëämæ cæyedë Itota Eedotadëë iñömö æidinque ado ante gogacäimpa. ²Eedotadëë wææ cæte iñömö obegaidi nani pö guidemö gäänë gäwapæ impa. Mänimæ gäwapæ ebedeo tededö Betadapæ nani ämæ yæwedeca önompo æmæmpoque ñoncæcate inoncöimpa. ³Mänincönë wënæ wënæ inäni tæiyänäni cöwë öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni inänipa. ⁴Adodäni, Æpä incæ gopæ, ante wänö cönönäni inönänimpa. Edæ Wængongui anquedo wæætë wæætë, Mänimæ incæ incæ gopængäimpa, ante wææ pöninque cædongäimpa. Gäwapæ incæ incæ go cæpæ adinque æcänö täno mänimänë guida inte adocä quïëmë wënæ wënæ i waa badongäimpa. ⁵Mäniñömö öñönäni weca adocanque nê öñönongä iñömö todëinta i ocho wadepo ganca wënæ wënæ inte wægaingä inongäimpa.

⁶Adocä mäninömö öñongä ingante Itota ponte ayongä wadäni, Mäninä wantæpiyæ mänömai wënæ wënæ inte wægaingä ingampa, ante apænädäni ëñëningue Itota tömengä ingante,
—Bitö, Waa bainëmo, ämitawo.

⁷Ante äñongä nê wënæ wënæ ingä wæætë,

—Awënë, gäwapæ incæ incæ gopæñedë æcänö botö imote ænte guiquinaa edæ dæ angampa. Ayæ botö, Æpænë guicæboimpa, ante goyömo wacä pöningue do täno guicä.

⁸Ante wäyongante Itota,

—Ængä gantie, bitö bee podonte möimo ænte goe. ⁹Äñongä onguifnængä inñömö inñontobæ waa badingä inte tömengä bee podonte möimo ænte cægonte gocantapa. Oodeoidi nani guëmanguionæ inñonte Itota mänömai cæcantapa. ¹⁰Mänömai beyæ oodeoidi awënëidi inñömö onguifnængä nê waa badingä ingante,

—Nöwoönæ guëmanguionæ inñonte mönö æbänö cæquiï, ante do wææ yewæmonte impa cæbii. Bitö bee podonte möimo næænämai incæbiimpa.

¹¹Ante piñönäni tömengä wæætë,

—Botö imote, Waa bae, ante nê cædingä inñömö adocä incæ, Bitö bee podonte möimo ænte goe, angä cætabopa.

¹²Angä ëñëningue tömënanäni tömengä ingante,

—Mäninä inñömö bitö imite, Bitö bee podonte möimo ænte goe, ante nê angä inñömö æcänö ingä. Apænëbi ëñëmönie, änänitapa.

¹³Itota guiquënë do waodäni nanguï inäni ongönäni tæcæguedë go wadæ godongäimpa. Mänömai beyæ onguifnængä nê waa badingä inñömö, Nê cædingä æcänö ingä, ante ëñënämai ingantapa. ¹⁴Ayæ ate Itota Wængonguï oncö ñænæncö yabæcönë go guidinque tömengä ingante bee tënningue,

—Ëñëmi, bitö wæætë waa babi imipa. Inñingue godömenque wënæ wënæ cädämai incæbiimpa. Bitö mäninö wënæ wënæ bitö cægäinö ante ñimpo

cädämai imi inñingue wabänö bitö wæwenguingue godömenque babaimipa, ämopa.

¹⁵Angä ëñëningue onguifnængä wadæ gote oodeoidi awënëidi weca pöningue angantapa. Botö imote, Waa bae, ante nê cædingä inñömö Itota ingampa, ante apænecantapa.

¹⁶Mänömai beyæ Itota mäninö nänö cædinö ante guëmanguionæ inñonte cæcä adinque oodeoidi awënëidi inñömö tömengä ingante togænte wënæ wënæ cädänitapa. ¹⁷Itota tömënanäni inänite,
—Botö Mæmpo nöwoönæ ganca tömengä nänö cædö ayæ cæcä ingampa. Ayæ botö adobai cæbo imopa, ante apænecantapa.

¹⁸Mäninö angä ëñëningue tömënanäni godömenque piñningue, Mönö tömengä ingante æbänö cæte wænömö wænguingä, ante godömenque nangui cægadänimpa. Tömënanäni, Tömengä guëmanguionæ inñonte do cæcä ingampa. Ayæ godömenque, Wængonguï botö Mæmpo inongäimpa, ante tededinque tömengä, Botö Wængonguï bai imopa, ante bai cæcampa töö, ante tömënanäni godömenque piingadänimpa.

Tömengä Wengä ingante Wængonguï pönö cæcä ate Awënë bacampa

¹⁹Itota adodäni inänite iimaï äningue, “Botö minitö iminite näwangä ämopa. Botö Wængonguï Wëmo inömo incæ adö cæte adoboque nämanque cæbo imoo. Botö Mæmpo æbänö cæcä adinque botö adodonque cæbopa. Edæ botö Mæmpo nänö cædö bai botö Wængonguï Wëmo inte adobai cæbopa. ²⁰Edæ Mæmpocä Wëmo inñömote tömengä botö imote waadete pönëningue tömengä nänö cædö tömännö ante botö imote odömongä abo imopa. Ayæ minitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nänö cædö ante botö imote odömongä ate botö wæætë cæbo acæminimpa. ²¹Edæ botö Mæmpo inñömö æmæwo wængainäni inänite, Nänäni ömæmöninque minitö miimäni

quëwencæminimpa, ante pönö cæcä bai botö tömengä Wëmo iñömö adobai cæbo imopa. Æcänö ingante, Bitö miï quëwencæbiimpa, ante äinëmo inte botö tömengä ingante pönö cæbo ate miïngä quëwencæcäimpa. ²²Adobai botö Mæmpo iñömö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ingampa. Wæætë edæ botö tömengä Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³Mänömaï cædinque botö Mæmpo, Waodäni botö imo nani waa abai adobai botö Wengä ingante tömänäni waa acædänimpa, ante cægacäimpa. Botö tömengä Wëmo iñömote nê waa adämaï ingä iñömö tömengä botö Wæmpocä botö imote da pönongä ingante adobai waa adämaï ingampa töö,” ante Itota apæncantapa.

²⁴Ayæ apænedinque, “Minitö iminite näwangä ämopa. Waocä botö änö ëñëninque botö imote nê da pönongaingä ingante nê wede pönengä iñömö tömengä nänö apænte pante wæwenguinö godämaï incæcäimpa. Wæætë tömengä nänö wænämaï quëwenguinö gocæcäimpa. Edæ tömengä mönö æmæwo wænguino ñimpo cædinque wænämaï mönö quëwenguinö do gocäimpa. ²⁵Minitö iminite näwangä ämopa. Waodäni nê quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencædänimpa. Nöwoönæ tömënäni nani ëñenguionæ do batimpa. Nê ëñënäni iñömö tömënäni nani wænämaï quëwenguinö gocædänimpa. ²⁶Wængongui nämä nê quëwëmongä inte tömänäni nani quëwëmämo ante nê godongä ingampa. Mänömaï beyænque botö tömengä Wëmo adobai nämä nê quëwënömo inte tömänäni nani quëwëmämo ante nê godömo imopa. ²⁷Ayæ Waobo ëñagaïmo iñömote tömengä pönö cæcä beyænque botö nê ämo badinque nämä

tæï piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nê apænte anguïmo imopa. ²⁸Botö mänömainö ante apænebo ëñëninque minitö, Æbänö angä wæmöö, ante änämaï incæminimpa. Edæ æmæwo wængainäni tömänäni tömënäni nani wodido nê öñongainäni iñönänite edæ botö tedepämo incæ tömënäni nani ëñenguionæ oo pönö impa. ²⁹Botö tedepämo ëñëninque tömënäni tömänäni ta poncædänimpa. Nê waa cægainäni iñömö wænämaï nani quëwenguinö nani goquinque ñäni ömæmoncædänimpa. Nê wënæ wënæ cægainäni guiquënë nani apænte pante æmæwo wæwenguinö nani goquinque ömæmoncædänimpa cæminii,” ante Itota apænegacäimpa.

**Æcänö äna ëñente cæbii, ante
Itota ingante änänipa**

³⁰Ayæ godömenque apænedinque Itota iïmaï apæncantapa. “Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte änö iñömö cöwë nöinö ante impa. Edæ botö tömëmo ämaï cædämaï imopa. Wæætë botö Mæmpo botö imote nê da pönongaingä nänö ämaï cæbo imopa. ³¹Botö nämanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³²Botö æbänö cæboo, ante wacä botö beyæ ante nê apæncä ingampa. Tömengä botö imotedö ante nänö apænedö iñömö edæ nö impa, ante ëñëmopa. ³³Minitö botö imotedö ante, Æbänö cæcää, ante ëñencæte ante Wäö nê æpænë guidönongä weca wadäni inänite da godöminitapa. Ayæ Wäö mäninäni inänite botö imotedö ante nö apæncä ëñënanitapa. ³⁴Botö æbänö cæboo, ante waodäni botö beyæ apæncædänimpa, ante botö änämaï imopa. Wæætë, Minitö botö æmo beyænque quëwencæminimpa,

ante cædinque botō mänōmainō
 ante apænetabopa. ³⁵Wäo nē æpænē
 guidōnongä tömengä iñōmō tī
 wodōnoincade bæco bai ingacäimpa.
 Ayæ, Tömengä nänō angainō nāō bai
 impa, ante adinque mīnitō wantæyō
 iñonte, Waa impa, ante watapæ
 tomīnitapa. ³⁶Botō æbänō cæboo, ante
 Wäo nē æpænē guidōnongä nänō
 angainō beyæ woadäni mäninō ante
 do ewocadäni ingadänimpa. Ayæ botō
 Mæmpo, Bitō iīmaī cæe, ante, Tömää
 iñne cæcæbiimpa, ante botō imote
 nänō angainō bai ante do cædōmo
 imopa. Botō Mæmpo botō imote da
 pōnongaingä ingampa, ante wadäni
 botō cædinō beyæ do eñēnänimpa.
³⁷Ayæ botō Mæmpo botō imote nē da
 pōnongaingä iñōmō adobaī, Botō æbänō
 cæboo, ante apæneçä eñengadänimpa.
 Mīnitō guiquēnē tömengä ingante
 adāmaī imīni inte tömengä nänō
 tedepāmo incæ cōwē eñēnāmaī imīnīpa
 tōō. ³⁸Ayæ botō Mæmpo botō imote da
 pōnongä pōnīmo imopa, ante mīnitō
 pōnēnāmaī imīni inte edæ tömengä
 nänō angainō ante entawēnāmaī
 quēwēmīni imīnīpa. ³⁹Wængonguī
 angä eñēnīnque nāni yewæmongainta
 ædæmō adōmīni inte edæ mīnitō,
 Mäninō nāni yewæmongainta amōni
 beyænque mōnitō wænāmaī mōni
 quēwenguīnō gocæmōnīmpa, ante
 pōnēmīni imīnīpa. Iñæmpa mänintaa
 yewæmōnīnque botō imotedō ante
 apænedīnque yewæmongadāni apa
 quēwēmīnīi. ⁴⁰Botō, Mīnitō wænāmaī
 mīni quēwenguīnō ante pō æedāni,
 äñōmote mīnitō wæætē Baa äninque
 botō weca pōnāmaī imīnīpa,” ante Itota
 apænecantapa.

⁴¹Ayæ apænedīnque tömengä,
 “Woadäni botō imote waa adinque
 apænecädänimpa, ante änāmaī
 imopa, angantapa. ⁴²Iñæmpa, Mīnitō
 æbänō cæmīnīi, ante botō do eñēmopa.
 Wængonguī nänō waadete pōnente
 entawēnō mīnitō entawēnāmaī
 quēwēmīnīpa, ante do eñēmopa.
⁴³Wængonguī angä eñēnīnque botō

wææ pōnīmo adinque mīnitō Baa ante
 botō imote pōnēnāmaī imīnīpa. Wacä
 guiquēnē nāmā äninque pongä iñinque
 mīnitō mäningä ingante Ao ante
 pōnēmaīmīnīpa, ante awædō. ⁴⁴Mīnitō
 wacä ingä wacä ingä, Botō imote waa
 adinque waa apænecädänimpa, ante
 cæmīni awædō. Incæte mīnitō, Mönō
 Wængonguī nē adocanque ingaingä
 ingampa, ante, Tömengä mönō imonte
 waa adinque apænecæcäimpa, ante
 cædāmaī imīnīpa. Mänōmaī beyæ
 mīnitō botō imote ædō cæte pōnēmīni
 imīnīi. ⁴⁵Botō Mæmpo weca ongōnīnque
 mīnitō imīnitedō ante botō, Iñāni
 wænæ wænæ cædāni inānitapa, ante
 ancæboimpa, ante mīnitō pōnēmīnitawo.
 Mänōmainō ante edæ pōnēnāmaī iedāni.
 Wæætē Möitee wodi nänō angainō
 eñente beyænque mönō quēwengäimpa,
 ante pōnēmīnīpa. Iñæmpa adocä Möitee
 wodi mīni nē pōnēnongä iñōmō, Nē
 wænæ wænæ cæmīni imīnīpa, ante
 ancæcäimpa cæmīnīi. ⁴⁶Mīnitō Möitee
 wodi ingante pōnente bai adobaī
 botō imote pōnecädōmīnīmpa.
 Edæ tömengä botō imotedō ante
 yewæmongacäimpa. ⁴⁷Möitee wodi nänō
 yewæmongainō ante pōnēnāmaī imīni
 iñinque mīnitō ædō cæte botō apænedō
 ante eñēnīnque pōnenguīmīnīi,” ante
 Itota mänīñedē iñinque apænegacäimpa.

5.000 ganca ināni inānite

Itota godongä cænānīpa

6 ¹Mäninō iñinque apænete ate
 wantæyō iñonte Itota wadæ
 godīnque gāwapæ Gadideapæ nāni ämæ
 æmæmäa tao gogacäimpa. Mänīmæ
 Tibediapæ nāni ämæ impa. ²Tömengä
 wogaa tao gocä adinque woadäni
 tæiyænāni pō tee empo godänitapa.
 Tömengä, Acädänimpa, ante cædinque
 wænæ wænæ ināni inānite bamōnengæ
 cæte odōmongä do adināni inte
 godänitapa. ³Ayæ Itota tömengä nänō
 emīñænāni inānite änanquidi ænte
 mäicä æidinque tömēnāni tömengä
 tōnō tæe contadänitapa. ⁴Wodo pænta
 gogaiönæ, ante oodeoidi Patowa nāni

æëmæ cæonæ oo pōni ingatimpa. ⁵Itota gomō ayongā waodāni tæiyænāni tōmengā weca pōnāni adinque tōmengā Pedipe ingante,

—Mānināni waodāni beyæ ædōnō gote pāo godonte æninque godōmōni cænguīnāni, angantapa.

⁶Edæ Itota iñōmō, Æbānō cæbaïmo, ante do ēñëningā inte māninō ante, Pedipe æbānō cæcuingā, ante acæte ante angantapa. ⁷Pedipe wæætē tōmengā ingante,

—Iñæmpa pāo ante tōmānāni wædænque cæncædānimpā, ante ocho apāicā cæte beyæ paga æinta æninque mānimpota godonte æninque edæ wīi eyepæ imaimpa, angantapa. ⁸Ayæ tōmengā emiñængā Timōnō Pegodo biwi Æntade iñōmō Itota ingante,

⁹—Mōnitō weca nē ongongā edëningā iñōmō tebada nāni awënënimō guiyā pāo ònompo æmæmpoque tōnō guiyā gæyæ mēa pōni næængā ingampa. Incæte māniī cænguī tæiyænāni beyæ ædō cæte eyepæ i, ante wæbopa.

¹⁰Angā ēñëninge Itota,
—Mīnitō tæiyænāni godongāmæ ongōnāni inānite āmīni tæ contaedāni, angantapa. Tōmengā nānō āmaī ānāni ēñëninge waodāni ònomæcaque iñō nanguī gaguimæ pæyōmō do tæ contadānitapa. Onguīñænāni incæ ònompo æmæmpoque miido ganca ināni inte tæ contadāni ingadānimpā. ¹¹Itota pāo æninque, Wængonguī, Bitō waa pōni pōnōmi ænte cænguīmōni, ante apænedinque tōmengā nānō emiñænāni inānite godongā æninque tōmēnāni wæætē tæ contadāni inānite di mæñænāni cænānitapa. Ayæ tōmengā gæyæ æninque adobaī cæcantapa. Tōmānāni iñōmō nāni cæinēnō ante eyepæ cængadānimpā.

¹²Tōmēnāni tōmo pōni cænāni ate tōmengā emiñænāni inānite tōmengā,
—Cænguī nāni ao mæ ao mæ ñōnōni ee òñoncoo wote badāmaī ingæimpā, ante pædæ wææmpo ò æedāni.

¹³Angā ēñente cædinque nē cænāni pāo ònompo æmæmpoque tebada nāni

awënënimō nāni ao mæ ao mæ ñōnōni ee òñoncoo ò ænte da wënāni ate edæ otodē tipæmpoga go mentodēa cænguī eyede da wënāni contagatimpa. ¹⁴Waodāni iñōmō Itota bamōnengā nānō cædi adinque,

—Nāwangā iingā iñōmō Wængonguī beyæ nē apæncā ingampa. Tōmengā inguipoga Ponguingā, ante nāni angaingā inongāimpā, ante tæcæ ānānitapa.

¹⁵Tōmēnāni, Bitō mōnitō Awënē Odeye bacæbiimpā, ante botō imote bæi ongoncæte ante poncæ cædānipa, ante wædinque Itota wadæ godinque adocanque ānanquidi wæætē æigacāimpā.

Itota æpæ yædopæ dao dao gocā
(*Māateo 14.22-27; Mādaco 6.45-52*)

¹⁶Gāwadecæ pōni bayō tōmengā emiñænāni iñōmō gāwapæ yæwedeca wæi gogadānimpā. ¹⁷Itota angā ēñëninge māniñōmō wæi wipodē guiidinque tōmēnāni, Gāwapæ æmæmāa Capēnaōmō nāni quēwēñōmō mōnō taocæimpā, ante tæcæ wogaa tao goyōnāni dobæ wēmō bayō Itota ayæ tōmēnāni weca pōnāmaī inongāimpā. ¹⁸Ayæ woboyæ nanguī pæmænte pōñō æpæ mæ conta mæ conta cæyonte, ¹⁹tōmēnāni wodo tinco quidōmetodo wiyate cæyōnāni Itota iñōmō wipo gāmænō pōninque æpæ yædopæ wænōmēnæcapæ dao dao pongā adinque ancaī guīñēnānitapa. ²⁰Ancaī guīñēñōnānite Itota iñōmō tōmēnāni inānite,

—Botō imopa. Guīñēnāmaī iedāni, angantapa.

²¹Ante āñongā tōmēnāni Ao ante tōmengā ingante wipodē æninque tōmēnāni nāni goinēñōmō emōnaiya do tao gogadānimpā.

Waodāni Itota ante diqui
diqui minte pōnāni

²²Iimō ate tæiyænāni gāwapæ imæ wedeca a ongōnōnānimpā. Iinque tōmēnāni, Wipo adoque pōni māniñōmō

wäi wocæ incæte Itota iñömö
 mänimpodë guidämaï iñongante
 tömengä miñæ godäni adodänique
 guii wadæ tao godänitapa, ante
 adinque wædänitapa. ²³Awënë Itota
 do Wængongui ingante, Bitö waa pönï
 pönömi cænguimöni, ante apæneca
 ate waodäni nani päo cænïñömö
 pancadäniya ayæ ongönänimpa.
 Ñöwo iñömö wapocoo Tibedia nani
 quëwëñömö wo cæwodinque mäniñömö
 tömënanï nani cænïñömö eyequei
 pönäni adänitapa. ²⁴Ïniquë Itota tönö
 tömengä nänö ëmiñænäni edæ dæ änäni
 wædinque tæiyænäni iñömö wipodë
 guite Capënaömmö godinque Itota
 ante diqui diqui mincæte ante wogaa
 gogadänimpa.

**Itota, Mönö quëwenguinque,
 ante cænguï bai ingampa**

²⁵Adodäni gäwapæ æmæmäa tao
 godinque tömengä ingä adinque,
 —Awënë nê Odömmömi ïmi æyedëno
 iñömö pömitawo, änänitapa.

²⁶Äñönäni Itota wæætë,
 —Minitö iminite näwangä ämopa.
 Minitö tömo pönï päo cænïmini inte
 botö imote ante diqui diqui mincæ
 pöminitapa töö. Wæætë edæ botö,
 Acæminimpa, ante bamönengæ cæbo
 beyæ minitö wii pömini awædö.
²⁷Minitö, Mönö cænguï, ante æncæte
 ante cæmini incæte inguipogaque mïni
 woquïnonque ante æncæ cædämaï
 quëwëedäni. Wæætë edæ, Mönö cænguï
 iinque bayedë cænguï mäë öñongæimpa,
 ante cædinque minitö, Mönö wænämaï
 quëwenguinque gocæmöimpa, ante
 pönente quëwëedäni. Botö nê Waobo
 ëñagaimo imo mäniï cænguï minitö
 iminite pönömo æncæminimpa. Botö
 Mæmpo botö imotedö ante, ïngä nö
 cæcä ingampa, ante odömongacäimpa.

²⁸Angä ëñëninque tömënanï tömengä
 ingante,

—Mönitö, Wængongui nänö
 cæquimämo ante cæcæte ante quïno
 cæquëñëmöni imönii, ante wæmönipa.

²⁹Äñönäni Itota wæætë,

—Botö Wængongui nänö nê da
 pönongaimo iñömote minitö botö imote
 mini wede pönëno iñömö edæ mäninö
 Wængongui nänö cædö impa, angantapa.

³⁰Mänömaï beyæ tömënanï
 godömenque tömengä ingante,
 —Bitö, Eñencädänimpa, ante
 bamönengæ bitö cædö ante æbänö cæte
 odömmömi adinque pönëmaimönipa.
 Äbänö cæquimii, ante änewënanitapa.

³¹Mönö wæmæidi önomæca nani
 quëwëñedë cænguï mänää nani
 angai cængadänimpa. Ïmaïno ante
 yewæmongatimpa. “Tömengä, Minitö
 cænguï, ante tömënanï inänite öönædë
 inö mäwææ godongacäimpa,” ante
 nani yewæmongainö bai impa, ante
 apænedänitapa.

³²Itota wæætë tömënanï inänite,
 —Näwangä ämopa. Minitö iminite
 öönædë mäwææ cænguï nê pönongaingä
 iñömö tömengä wii Möitee wodi
 ingacäimpa. Wæætë botö Mæmpo
 iñömö tömengä minitö iminite öönædë
 nani näwa cænguï bai pönongä
 cæncæminimpa. ³³Öönædë quëwente
 wææ pongaingä iñömö tömengä iñömö,
 Cænguï bai ingampa, ante Wængongui
 nänö nê angaingä ingampa. Adocä
 inguipoga quëwënanï inänite, Mïni
 wantæpiyæ wænämaï quëwenguïno ante
 pönongä æninque quëwënanipa.

³⁴Ante Itota apæneca ëñëninque
 tömënanï,

—Awënë, ñöwo mäniï cænguï iimö iñö
 iimö iñö pönömi cæmönie.

³⁵Äñönäni Itota godömenque
 apænedinque,

—Botö iñömö, Mïni quëwenguinque,
 ante mini cænguï bai inömo imopa. Botö
 weca nê pongä iñömö cöwë cænguï
 gue ænënanämaï bai quëwencæcäimpa.
 Ayæ botö imote nê wede pönengä
 iñömö cöwë tepæ gæwænämaï
 bai quëwenguingä ingampa, ante
 apænecantapa. ³⁶Ayæ wæætë, Minitö
 iminite do botö änö bai impa. Botö
 imote do adimïni incæte minitö ayæ
 wede pönënanämaï iminipa. ³⁷Botö
 Mæmpo, Bitö quïnäni bacädänimpa,

ante cædinque botö imote pönongä ämo ininque botö quinäni nē badäni inte tömēnāni tömänāni iñömö botö weca edæ do pönānīpa. Ayæ æcāmenque botö weca pōna inate, Botö weca pönāmaī imīpa, ante cōwē ānāmaī incæboīmpa. ³⁸Edæ öönædē quēwēninque botö wīi tömēmo āmaī cæcæboīmpa, ante wææ pontabopa. Wæætē botö imote nē da pönongaingä nānō āmaī cæcæboīmpa, ante wææ pontabopa. ³⁹Ayæ botö imote nē da pönongaingä botö imo nānō angainō iñömö iīmaī impa. Waodāni bitö quinäni bacädānīmpa, ante pönömo æninque bitö quinäni badinque adocanque incæ wē womonte wænāmaī incæcāīmpa. Wæætē iinque baquiönæ iñonte bitö, Nāni ömæmöedāni, āmi ēñēninque bitö quinäni tömänāni edæ nāni ömæmoncädānīmpa. ⁴⁰Edæ botö Mæmpo nānō angainō iñömö iīmaī impa. Botö Wængonguī Wēmo iñömote botö imote ædæmō adināni inte edæ botö imote nē pönēnāni tömänāni cōwē wænāmaī wantæpiyæ quēwencädānīmpa. Mänömainō ante impa. Ayæ iinque baquiönæ iñonte botö mänināni inānite, Minitö nāni ömæmöedāni, āmo ate ömæmoncädānīmpa. Itota mänömaī apænecantapa.

⁴¹Apænecä ēñēninque oodeoidi iñömö, Tömengä, “Botö cænguī bai imopa, ante öönædē inö wææ pontabopa,” angampa, ante tömengä ingantedö ante tæcæ pīinte tedewēnānitapa. ⁴²Tömēnāni, —Iingä iñömö wīi Ootee wengä Itota ingantawo. Tömengä mæmpo tönö wäänä wīi mönō adōna inatawo. Tömengä ædö cæte, Botö öönædē quēwente wææ pontabopa, angä ānewēē.

⁴³Ante pīiñönāni Itota wæætē, —Minitö nāmanque godongāmæ pīinte tededāmaī iedāni. ⁴⁴Botö Mæmpo botö imote nē da pönongaingä wīi pönö cæcä bai æcāmenque incæ botö weca pönāmaī incædongāīmpa. Ayæ iinque baquiönæ iñonte botö weca nē pongä ingante, Nāni ömæmöe, āmo nāni ömæmoncæcāīmpa. ⁴⁵Wængonguī beyæ nē apænegaināni

nāni yewæmongaintaa iīmaī ante yewæmongadānīmpa. “Wængonguī waodāni tömänāni inānite odömonte apænecä ēñencädānīmpa.” Botö Mæmpo apænecä nē ēñēnāni iñömö tömengä nānō odömonte apænecä ante nē ēñēnāni inönāni ininque tömēnāni tömänāni botö weca pönānīpa, ante Itota apænecantapa.

⁴⁶Ayæ apænedinque, “Mini waocabo tömämini incæ botö Mæmpo ingante cōwē adāmaī imīnitapa. Botonque iñömö Wængonguī weca nē quēwente pōmo inte botö Mæmpo ingante nē adimo iñömö adoboque pōni imopa. ⁴⁷Minitö imīnite nāwangä ämopa. Botö imote nē wede pönengä iñömö tömengä cōwē wantæpiyæ nānō quēwenguīmāmo do entawente quēwengä ingampa. ⁴⁸Botö iñömö, Mini quēwenguinque, ante mīni cænguī bai imopa. ⁴⁹Mini wæmæidi önomæca quēwēñedē cænguī mänää nāni angai cængaināni incæte edæ do wængadānīmpa. ⁵⁰Botö iñömö cænguī bai inömo inte öönædē quēwente wææ pōmo imopa. Ininque waocä, Cænguī cænte bai quēwengäīmpa, ante botö imote pönengä ininque tömengä cōwē wænāmaī quēwēmaingampa. ⁵¹Botö cænguī bai imo inte öönædē quēwengāīmo incæ wææ pontabopa. Æcānō cænguī cænte bai botö imote pönēna tömengä iñömö cōwē wænāmaī quēwencæcāīmpa. Ii cænguī botö godonguī botö nāmā baö impa. Inguipoga quēwēnāni inānite, Minitö quēwenguīmīni, ante botö nāmā baö incæ godoncæboīmpa,” ante Itota mänömaī apænecantapa.

⁵²Mäninö angä ēñente wædinque oodeoidi nāni cabo iñömö godongāmæ nāmanque tededinque wæætē godö wæætē godö ānewēnānitapa.

—Māningä iñömö mönō imö tömengä nāmā baö ædö cæte pönongä cænguīmōni.

⁵³Ante tedewēñönāni Itota wæætē tömēnāni inānite,

—Minitö imīnite nāwangä ämopa. Botö Waobo ēñagaīmo iñömote

mīnitō botō baō cænāmai inte botō wepæ bedāmai imīni inique ædō cæte Wængongui wantæpiyæ nānō quëwenguimāmo entawēmīni inguimīni.
⁵⁴Botō baō nē cængā ayæ botō wepæ nē becā tōmengā iñōmō Wængongui wantæpiyæ nānō cōwē quëwenguimāmo do entawente quëwengā ingampa. Ayæ iinque baquīōnæ iñonte botō māningā ingante, Bitō ñāni òmæmōe, āmo ñāni òmæmoncæcāimpa. ⁵⁵Edæ botō baō nāwā cænguī baī impa. Ayæ botō wepæ nāwā bequī baī impa.
⁵⁶Botō baō nē cængā inte ayæ botō wepæ nē becā iñōmō tōmengā botō nempo ee quëwēnongā ingampa. Ayæ adobai tōmengā botō imote entawēnongā ingampa. ⁵⁷Botō Mæmpo nē Quëwēnongā inte botō imote da pōnongā pōnimo imopa. Tōmengā pōnō cæcā ate quëwēmo imopa. Botō imote nē cængā iñōmō adobai botō cæbo beyænque quëwencæcāimpa.
⁵⁸Botō cænguī baī imo inte òönædē wææ pōnimo iñōmō māniī cænguī baī imopa. Mōnō wæmæidi cænguī mānāā nāni angai cængaināni incæ edæ do wængadānimpā. Wæætē ñōwo wææ pōmo iñōmote, Cænguī impa, ante nē cænongā iñōmō tōmengā cōwē wænāmai quëwencæcāimpa, ante Itota apænecacāimpa.

⁵⁹Tōmengā māninō ante Capēnaōmō nāni quëwēñōmō nāni odōmōincōnē ongōnīnque tōmēnāni inānite odōmonte apænecacāimpa.

**Itota nānō ānō beyænque mōnō
wænāmai quëwengæimpa**

⁶⁰Māninō odōmonte apænecā ēñēnīnque tōmengā ēmiñænāni nanguī ināni,

—Tōmengā nānō odōmonte apænedinō iñōmō waadedāmaiñō impa. Edæ æcānō ēñēmaināa, ante ānānitapā.

⁶¹Māninō nānō odōmonte apænedinō ante tæcæ piinte tedewēnāni wædinque Itota tōmēnāni inānite,

—Mīnitō botō āninō ante oda cæmīni inte pīimīni imīnitawo, angantapā.

⁶²Ayæ godōmenque apænedinque, Botō Waobo ēñagaimo imo òönædē quëwente wææ pongaimo inte adodō adoyōmō æibo adinque mīnitō æbānō ante āmaiimīni. ⁶³Wængongui Ōñōwoca pōnō cæcā beyænque waocā quëwengā inique tōmengā baonque nānō ēñayō beyænque ædō cæte quëwēmaingāā. Botō Wængongui Ōñōwoca tōnō apænedinque mīnitō imīnite botō apænedinō beyæ mīnitō òñōwoca ēwocate quëwencæmīnimpā. ⁶⁴Incæte mīnitō wecā pancadāniya iñōmō botō imo pōnēnāmai inānipa tōō, ante Itota apænecantapā.

Edæ tōmēnāni wecā æcānō tōmengā ingante pōnēnāmai ingāā, ante Itota do ēñēnongāimpā. Ayæ tōmengā ingante nē godō odōmonguingā æcānō imaingāā, ante tōmengā adobai do ēñēnongāimpā.

⁶⁵Itota godōmenque apænedinque,
 —Botō māniī beyæ mīnitō imīnite do antabopā. Botō Mæmpo wiī pōnō cæcā baī æcāmenque incæ botō wecā pōnāmai incædongāimpā, ante apænecacāimpā.

⁶⁶Māniōnæ ganca tōmengā miñæ nē godāni incæ nanguī ināni wadæ godinque tōmengā miñæ ayæ tee empo godāmai ingadānimpā. ⁶⁷Tōmēnāni wadæ godāni adinque Itota ònompō tipæmpoga go mēa ganca ināni inānite,
 —Mīnitō diyæ æbānō cæquimīni.

Mīnitō tōmēnāni bai adobai botō imote emō cæte, Wadæ goinēmōnipā, āmīnitawo.

⁶⁸Āñongā Timōnō Pegodo wæætē,
 —Awēñē, æcānō miñæ gobaimōniī.

Wacā mōnitō imōnite nē ēmiñængā iñōmō edæ dæ angampā. Wantæpiyæ wænāmai mōni quëwenguinō ante æbānō gocæmōnimpā, ante wæyōmōni bitō iñōmō nē apænēbi imipā. ⁶⁹Bitō iñōmō Wængongui nānō da pōnōnōmi inte tōmengā nānō Tæiyæ Waēmō inōmi imipā, ante pōnēmōni inte ēñēmōnipā.

⁷⁰Ante apænecā ēñēnīnque Itota,
 —Mīnitō ònompō tipæmpoga go mēa ganca imīni inte wiī botō apænte ænōmīni imīnitawo. Incæte mīni cabo incæ adocanque iñōmō wēnæ quī ingampā, ante apænecacāimpā.

⁷¹Timönö Icadote wengä Codaa ingantedö ante Itota mänömaï angacäimpa. Tömengä önompö tipæmpoga go mänaa näni cabo adocanque ïnogä incæte ayæ ate Itota ingante odömonte në godonguingä ïnogäimpa.

**Itota biwiidi tömengä ingante
pönänämaï ïnäni**

7 ¹Ayæ ate Itota Gadideabæ tömämæ wayömo wayömo gocä ingacäimpa. Oodeabæ ïñömo oodeoidi awënëidi botö ïmote wænoncæ cädänipa, ante wædinque Itota, Oodeabæ wïï goinëmopa, ante mäniömæ godämaï ïnogäimpa. ²Oodeoidi, Mönö wæmäidi oncontaicoo mänoninque quëwengadänimpa, ante pönëninque tömënäni ææmäe oo pönï ingatimpa. ³Itota biwiidi tömengä ingante, —Bitö ëmiñänäni bitö bamönengä cæbi acädänimpa, ante cæcæte ante bitö ïñömo ongönämaï inte wæætë Oodeabæ goquënëmi ïmpa. ⁴Woadäni tömänäni ayönäni cæbo edonque acädänimpa, ante cæinengä ïñömo tömengä wïï awëmö cæcampa. Bitö mäniï cædinö do cæbi inte woadäni tömänäni bitö ïmite edonque pönï acädänimpa, ante odömonte cæe, ämönipa.

⁵Edæ tömengä biwiidi incæ tömengä ingante pönänämaï ïnäni ïnönänimpa. ⁶Mänömaï beyæ Itota tömënäni ïnänite, —Botö wïï nõwo goquënëmo ïmpa. Minitö guiquënë æyedëmë gomini incæ cöwë waa ïmpa. ⁷Inguipogaque quëwënëni minitö ïminite ædö cæte piinte badänii. Wæætë botö tömënäni ïnänite, Minitö wënæ wënæ cæmini ïminipa, ante apænebo beyæ tömënäni botö ïmo pïinänipa. ⁸Minitö ææmäe cädäni weca æite goedäni. Botö goquïönæ wïï eyepæ ïmpa, ante pönëninque botö ayæ mäniimæ cädäni weca godämaï ïmpa. ⁹Mäninö äninque tömengä godömenque Gadideabæ ongonde quëwengacäimpa.

**Itota näni ææmäe cæyömo
gote pongacäimpa**

¹⁰Incæte tömengä biwiidi ææmäe ante godäni ate tömengä adobaï godinque wïï

woadäni näni ayömo gocampa. Wæætë awëmö gocantapa. ¹¹Ayæ näni ææmäe cæyömo oodeoidi awënëidi ïñömo, —Mäningä onguifnægä æyömönö ingäa, ante tömengä ingante ante diqui diqui minte wææ wänönänitapa.

¹²Tæiyänäni ponte a ongönäni godongämæ nämä tededinque tömengä ingantedö ante wæntæ wæntæ tededänitapa. Pancadäniya, “Tömengä waa cæcä ingampa.” Äñönäni wadäni ïñömo, “Baa, mäningä woadäni ïnänite wapiticæ mäodinque, Oda cæquänänimpa, ante cæcä ingampa,” ante apænedönänimpa.

¹³Oodeoidi awënëidi ïnäni adinque guifnente wædinque wadäni tömänäni tömengä ingantedö ante woadäni ëñëñönäni apænedämaï ïnönänimpa.

¹⁴Tömënäni ææmäe do cæyedë Itota ïñömo Wængongui oncö ñänæcönë yabæcönë æite pö guidinque woadäni ïnänite mä odömonte apæneçä ëñengadänimpa. ¹⁵Tömengä odömonte apæneçä ëñëninque oodeoidi ancai guifnëninque,

—Æbänö cæte nangui ëñengä ingäa. Edæ tömengä ecoeda adämaï ïnogä ingampa.

¹⁶Äñönäni Itota wæætë, —Botö odömonte apænedö ante wïï nämä pönëninque odömonte apænebo ïmpa. Wæætë Wængongui botö ïmote në da pönongaingä nänö angainö ante odömonte apænebopa. ¹⁷Minitö, Wængongui nänö angainö ante Itota odömonte apæneçampa, ante pönëminitawo. Wæætë, Nämä pönëninque Itota odömonte apæneçampa, ante pönëminitawo. ïñæmpa waocä, Wængongui nänö ämaï cæcæboimpa, ante æcänö änaa tömengä ïñömo, Æcänö angä ëñëninque Itota odömonte apæneçäa, ante do ëñæcæcäimpa. ¹⁸Në nämä pönëninque apæneçä ïñömo tömengä nämä ante, Botö ïmo waa acädänimpa, ante äinente apæneçä ingampa. Wæætë edæ, Botö ïmo në da pönongainganque ingante waa acädänimpa, ante në äinente

cæcä iñömö tömengä edæ nê nõ cæte quëwënongå ingampa. Adocä, Waodäni oda cæquinänimpa, ante tömënanï inänite wii wapiticæ mäocä ingampa, ante Itota apænecantapa. ¹⁹Ayæ apænedinque, “Wængongui nänö wææ angainö ante Möitee wodi wii minitö beyæ ante yewæmongacäi. Incæte minitö tömämïni Wængongui nänö wææ angainö adinque ëñente cædämaï iminipa töö. Minitö quïnante botö imote, Wænöinëmönimpa, ante pönëninque cæminii.”

²⁰Ante awënëidi inänite äñongante nanguï inäni adoyömö ongönäni wæætë, —Bitö wënæ tönö cæbi imipææ, ante tömengä ingante äninque, Bitö imite æcänö wænöinente cæcäa.

²¹Ante änanï ëñëninque Itota godömenque tömënanï inänite, —Guëmanguïönæ iñonte botö adopoque bamönengæ cæbo adinque minitö tömämïni ancaï guïñente wæminipa edæ. ²²Möitee wodi iñömö, Minitö wëñængä ëñacä ate önompo æmæmpoque go mëönaa go adoönæque iñonte mäniönæ tömengä yabæque ëö togæncæminimpa, ante minitö iminïte odömonte apænecacäimpa. Wii Möitee wodi mänömaï mä cæcä ingacäimpa. Wæætë wëñëñedë incæ minitö wæmæidi do adodö cægädänimpa. Incæte Möitee wodi, Mänïönæ iñonte ëö togæncæminimpa, ante pönö angä beyænque minitö guëmanguïönæ i incæte minitö wëñængä onguïñængä ingante ëö togæminï iminipa töö. ²³Möitee wodi nänö wææ yewæmongainö wido cædämaï ingäimpa, ante cædinque minitö guëmanguïönæ iñonte edæ wëñængä onguïñængä ingante do ëö togæminïpa. Incæte edæ guëmanguïönæ iñonte botö wënæ wënæ iningä ingante ämo ate tömengä baö tömäñö waa bacä beyænque quïnante botö imote piimïni iminïi. ²⁴Wacä wabänö nänö cædi wënæ wënæ i, ante pönëninque ædæmö ëñënamäi iminï inte minitö tömengä ingä, Bitö wënæ wënæ cæbi imipa, ante

apænte änamäi iedäni. Wæætë, Æbänö i, ante ædæmö ëñëninque nöingä ante ancæminimpa, ante Itota mänömaï apænecacäimpa.

Itota iñömö Codito mönö në Ponguingä ingampa

²⁵Mänömaï beyæ Eedotadëë quëwënanï pancadäniya, —Mäningä ingante wænömöni wæncæcäimpa, ante awënëidi wii änanitawo, ante mäniñedë tæcæ tedewëñänitapa. ²⁶Aedäni, tömengä iñömö edonque pönï a ongöninque waodäni inänite apæneyongä incæ mönö awënëidi tömengä ingante änamäi pæ wënete inänipa töö. Tömënanï wabänö, Mäningä iñömö näwangä Codito mönö änogä ingampa, ante pönëñänitawo. ²⁷Iñæmpa, Mäningä onguïñængä æyömönö quëwente pongä ingäa, ante do ëñëmöpa. Mönö Codito, Në Ponguingä, ante nänï angaingä iñömö æyömönö quëwente pongäa, ante mönö waocabo tömämo incæ ëñënamäi inguimö imompa, äñänitapa.

²⁸Ayæ Itota Wængongui oncö ñænæncönë yabæcönë odömonte apænedinque aa pecantapa.

—Ao, Botö æbodö imoo, ante minitö ëñëmïniyaa. Ayæ botö, Æyömönö quëwente pömoo, ante minitö adobaï ëñëmïniyaa. Botö wii nämä pönëninque pontabopa. Botö imote nê da pönongaingä näwangä inongä ingampa. Minitö, Tömengä æbänö ingäa, ante ëñënamäi iminipa töö. ²⁹Botö wæætë edæ tömengä weca quëwëmo iñömote tömengä botö imote da pönongä pönimo inte edæ botö iñömö edæ tömengä ingante do agaïmo inömo imopa, angacäimpa.

³⁰Mäninö angä ëñëninque tömënanï, Quinö cæte tömengä ingante bæi ongonguimönimpa, ante pönengädänimpa. Incæte tömengä nänö wænguiönæ wii eyepä i beyæ tömengä ingante ö änamäi ingädänimpa.

³¹Tæiyænäni adoyömö pö ongönäni weca ongöninque nanguï inäni tömengä ingante wede pönëñänitapa. Tömënanï,

—Mäningä onguifnängä iñömö nangui bamönengä cæcä inongäimpa. Mönö Codito iñömö tömengä pongä ate godömenque bamönengä cæquingä ingantawogaa.

**Itota ingante bæi ongoncæte
ante cædäni**

³²Tæiyænäni mäniñömö ongönäni iñömö Itota ingantedö ante mänömainö ante wæntæ wæntæ tedehyönäni Paditeoidi ëñëñanitapa. Ayæ, Wængongui qui, ante nê godönäni ñænänäni tönö Paditeoidi iñömö Wængongui oncö ñænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pöedäni, änänitapa. ³³Itota godömenque apænedinque,

—Minitö weca wantæyö quëwëninque botö ayæ ate botö imote nê da pönongaingä weca ocæ ëmænte gocæboimpa. ³⁴Botö ocæ ëmænte gobo ate minitö botö imote ante diqui diqui mimiñi incæte adämaï inguimini iminipa. Ayæ botö go quëwëñömö minitö adoyömö ædö cæte ponguimini iminii.

³⁵Angä ëñëñinque oodeoidi awëñëidi nämanque tededänitapa.

—Mäningä, Gocæboimpa, ante ædönö goyongante mönitö diqui diqui mininque adämaï inguimöni imöni. Tömengä, Edæ mönö guidëñäni do panguimæ godinque guidiegoidi weca wayömö wayömö näni quëwëñömö tömengä wabänö goquingää. Ayæ guidiegoidi mäniñömö quëwëñäni inänite odömönte apænebo ëñencædänimpa, ante apænequingää. ³⁶Tömengä iñæmpa, “Botö imote ante diqui diqui mimiñi incæte minitö botö imote adämaï inguimini iminipa, angampa töö. Ayæ, Botö go quëwëñömö minitö adoyömö dicæ ponguiminiyaa,” ante mäninö ante æbänö ante apæñecantawo, angadänimpa.

**Waëmö æpæ tayömö ta gopæ
mönö quëwenguimæ impa**

³⁷Ayæ tömëñäni näni ææmæ iinque cæönæ iñonte, Ñænæ ææmæ impa, ante

godömenque nangui cæyönäni Itota iñömö ængæ gantidique yedæ yedæ tedecantapa.

—Nê gæwænte wæcä iñömö tömengä botö weca poncæcäimpa. Ayæ botö tönö godongämæ becæcäimpa. ³⁸Æcämenque botö imote nê wede pönengä iñömö tömengä quëwenguimæ ænte entawencæcäimpa. Ayæ waëmö æpæ tayömö ta gote cægömæ bæi tömengä adobaï tömengä nänö entawëno godonte bæi cædinque, Wadäni bete bæi quëwencædänimpa, ante godö cæcæcäimpa. Wængongui angä ëñente näni yewæmongainö bæi ante mänömainö ante impa.

³⁹Mänömainö ante Itota iñömö, Botö imote nê wede pönëñäni inte ayæ ate Wængongui Önöwoca ingante ænte entawenguinäni inänipa, ante pönëñinque mäningä Wængongui Önöwoca ingantedö ante apænegacäimpa. Edæ Itota ayæ wænämaï inte öönædë ocæ ëmænte æidämaï nänö iñedë Wængongui iñömö Tæiyæ Waëmö Önöwoca ingante ayæ da pönönämaï inongäimpa.

**Waadäni wæætë godö wæætë
godö näni änewëno**

⁴⁰Mäninö nänö änö ëñëñinque waodäni pancadäniya,

—Nawangä impa. Mäningä iñömö, Wængongui beyæ nê apæñecä nê Ponguingä, ante näni angaingä adocä inongä ingampa.

⁴¹Ante äñönäni wadäni quiquënë, —Mönö Codito nê Ponguingä, ante näni angaingä mäningä ingampa.

Änäni ëñëñinque wæætë wadäni, —Mönö Codito ædö cæte Gadideabæ quëwente pongä ingää, änänitapa.

⁴²Iñæmpa mönö Codito iñömö Awëñë Dabii pæingä inguingäimpa. Ayæ Bedëë Dabii nänö quëwengaiñömö adoyömö ëñaquingä ingampa, ante Wængongui angä ëñente näni yewæmongainö ongö adämaï iminitawo.

⁴³Angä ëñëñinque waodäni, Itota æcänö ingää, ante mänömaï wadö

wadō ante pōnente tedewengadānimpa.
⁴⁴Pancadāniya, Tōmengā ingante
 bæi ongōinēmōnipa, ānāni incæte
 tōmengā ingante bæi ongonte ænāmaī
 ingadānimpa.

**Awēnēidi Itota ingante
 pōnēnāmaī īnōnāni**

⁴⁵Wængonguī oncō tæiyæ waēmō
 oncōnē wææ wānōnāni īñōmō,
 Wængonguī quī, ante nē godōnāni
 ñænænāni tōnō Paditeoidi weca ocæ
 emænte pōnānipa. Ocæ emænte pōnāni
 adinque tōmēnāni,
 —Quinante tōmengā ingante ænte
 pōnāmaī imīnii.

⁴⁶Ante āñōnāni wææ wānōnāni
 wæætē,
 —Māningā onguīñængā waa apænecā
 baī æcānō adobaī tedecā īñōmō edæ dæ
 angampa.

⁴⁷Ānāni ēñēninque Paditeoidi
 guiquēnē,
 —Tōmengā mīnitō imīnite adobaī
 wapiticæ māocā oda cæte gobaimīni
 bamīnitawo. ⁴⁸Āninque tōmēnāni
 godōmenque, Awēnēidi incæ Paditeoidi
 incæ adocanque tōmengā ingante
 pōnengā ingantawogaa. ⁴⁹Nanguī ināni
 īñōmō ongōnāni guiquēnē tōmēnāni
 nē ōnōnāni que inte Wængonguī nānō
 wææ angainō ante ēñēnāmaī ināni inte
 tōmengā ingante pōnēnāni inānipa.
 Mānōmaī beyæ tōmēnāni Wængonguī
 nānō pangaimāmo ante wæquīnāni
 inānipa.

⁵⁰Niicodemō īñōmō wēēnēnēdē Itota
 weca nē godingā adobaī tōmēnāni baī
 Paditeocā inongā inte apænecantapa.

⁵¹—Waoçā, Æbānō cæboo, ante nāmā
 beyæ wææ ānāmaī īñongante mōnō,
 Tōmengā ingante pangæimpa, ante ædō
 cæte apænte anguīī. Edæ, Wææ ānāmaī
 īñongante pangæimpa, ante dicæ wææ
 yewæmongadāniīnaa.

⁵²Ante āñongā tōmēnāni,
 —Bitō adobaī Gadideabæ quēwente
 ponte baī tedebipææ. Wængonguī beyæ
 nāni yewæmongainta ae. Adinque
 bitō, Wængonguī beyæ nē apænecā

wīī Gadideabæ quēwente pongā
 ingampa, ante do ēñencæbiimpa, ante
 angadānimpa.

Onquiyængā nānō towēnō

⁵³Mānīnō ānāni ate tōmānāni oncōnē
 ocæ emænte gogadānimpa.

8 ¹Itota guiquēnē Odibowænquidi
 nāni anquidi gocantapa. ²Īimō ate
 ñāō bayedē tōmengā Wængonguī oncō
 ñænæncōnē yabæcōnē wæætē pō guiciā
 adinque waodāni tōmānāni tōmengā
 nānō ongōñōmō goto pōnāni adinque
 Itota tōmēnāni inānite odōmoto
 apænecæte ante tæ contacantapa.

³Māniñedē onquiyængā adocanque
 tōmengā nānōogængā ināmaī īñongante
 wacā onguīñængā tōnō tæcæ godō
 guēa mongā adāni ate nē odōmōnāni
 tōnō Paditeoidi īñōmō māningā
 onquiyængā ingante ænte pōnānitapa.
 Tōmengā ingante tæcæguedē gō cædāni
 ongōñongā ⁴tōmēnāni Itota ingante,

—Awēnē nē Odōmōmi imi, iingā
 onquiyængā īñōmō wacā ingante
 tæcæ godō guēa mongā adāni
 wæmōnipa. ⁵Wængonguī nānō angainō
 ante Mōitee wodi iīmaī ante wææ
 yewæmongacāimpa. Onquiyænāni
 māningā onquiyængā baī cædāni
 īñōnānite mīnitō tōmēnāni inānite
 dicaca tacamīni wæncædānimpa. Bitō
 guiquēnē quīnō āmii.

⁶Mānīnō ante tōmēnāni īñōmō,
 Æbānō apænecāā, āninque, Wabānō
 pancadea wapiticæ tedecæcāimpa,
 ante cædānitapa. Edæ wapiticæ tedecā
 īninque mōnitō, Adocā wēnæ wēnæ
 cæcā ingampa, ante ancæmōnimpa,
 ante cædānitapa. Itota guiquēnē ædæ
 wææninque onguipoga tōmengā
 ōnongompoga yewæmongacāimpa.

⁷Tōmēnāni godōmenque tōmengā
 ingante ēñencæte ante āñōnāni Itota
 ængæ gantite tōmēnāni inānite,

—Mīnitō weca adocanque ongōninque
 nē wēnæ wēnæ cædāmaī ingā īninque
 māningā tāno onquiyængā ingante,
 Wænguīmi, ante dicaca tacacæcāimpa,
 ante angantapa.

⁸Äninqe wæætē ædæ wææninqe onguipoga yewæmongacäimpa. ⁹Mäninö angä nē ēñēnāni iñömö adocanque wadæ go wacä wadæ go wacä wadæ go tömänāni wadæ godänipa. Picänāni täno wadæ godāni ayæ wadāni wadæ godänitapa. Tömānāni dæ godāni adinque Itota adocanque ee ongöñongä onquiyängä ayæ adoyömö nä gongängantapa. ¹⁰Itota ængæ gantidinque onquiyängä ingante, —Æyömönö inānii. Bitö imite apænte äninque tacadāmaï inānitawo.

¹¹Äñongä tömengä wæætē, —Awēnē, tömänāni mänōmaï cædāmaï inānitapa.

Angä ēñēninqe Itota, —Botö adobaï bitö imite apænte äninque tacadāmaï incæboimpa. Nöwo goe ämopa. Bitö wēnæ wēnæ cæte quēwēnimāmo ñimpo cæte waa quēwēe, angacäimpa.

**Inguipoga quēwēnāni beyæ
Itota ñäö baï inongäimpa**

¹²Ayæ Itota wæætē waodāni inānite apænedinque, —Botö iñömö inguipoga quēwēnāni beyæ ñäö baï imodö anguēnē. Æcänö botö miñæ tee empo goda tömengä wēmö iñömö cōwē cægönāmaï ingampa. Wæætē tömengä nānö quēwēnö taadö edonque acacäimpa, ante botö tömengä beyæ ñäö baï imopa, ante apænegantapa.

¹³Paditeoidi guiquēnē tömengä ingante, —Bitö iñömö nāmā äninque, Æbänö imoo, ante apænebi imipa töö. Mänōmaï nāmanque ante apænebi beyæ bitö äninö önonquedö ante impa, ämönipa, piinānitapa.

¹⁴Itota wæætē, —Botö iñömö nāmā äninque, Æbänö imoo, ante apænebo incæ botö apænedö näwangä impa. Edæ, Botö æyömönö quēwēnte pōmo imoo, ante ayæ, Ædönö gobo imoo, ante do ēñēmopa. Minitö guiquēnē, Botö æyömönö quēwēnte pōmoo imoo, ante ayæ, Ædönö gobo imoo, ante wīi ēñēmīnīpa töö.

¹⁵Waodānique, Iïmaï cædāni, ante nāni wææ ante cægäi baï minitö wacä ingante apænte ämīni imīnīpa. Botö guiquēnē waodāni tömänāni inānite adinque, Æcänö waa cæcantawo, ante, Æcänö wēnæ wēnæ cæcantawo, ante apænte änāmaï imopa. ¹⁶Incæte botö mänōmaï apænte ämo baï, Æbänö apænte ämoo, ante pönēninqe tömēmö nö ante apænte ämopa. Edæ wīi botonque apænte ämopa. Wæætē botö Mæmpo botö imote nē da pönongaingä iñömö tömengä iñömö botö tönö godongämæ cæcä ate apænte ämopa. ¹⁷Minitö minī wææ yewæmongaintaa iïmaï ante wææ yewæmongatimpa. Mēnaa onguīñæna nē adīna inte tömēna nāna adīnö ante apænedä ēñēninqe minitö wæætē, Nö impa, ante ēñēcämīnīmpa. ¹⁸Botö iñömö nāmā äninque, Æbänö imoo, ante apænebo imopa. Ayæ botö Mæmpo botö imote nē da pönongaingä iñömö tömengä botö imotedö ante, Æbänö ingää, ante adobaï apæneca ēñēcämīnīmpa.

¹⁹Angä ēñēninqe tömēnāni tömengä ingante,

—Bitö Mæmpo æyömönö quēwēngää. Äñönāni Itota wæætē,

—Minitö iñömö, Botö incæ æbänö imoo, ante, Botö Mæmpo incæ æbänö ingaingä ingää, ante ēñēmīni imīnitawogaa. Botö æbodö imoo, ante ēñēmīni inte baï minitö, Botö Mæmpo æbänö ingaingä ingää, ante adobaï ēñēmīni incædömīnīmpa, ante apænegacäimpa.

²⁰Itota Wængonguï oncö ñænæncönē yabæcönē go guiidinque, Wængonguï quī, ante nāni da wencade gäänē ongonte apænedinque mäninö ante apænegacäimpa. Incæte tömengä nānö wænguïönæ wīi oo pönī i beyanque tömengä ingante bæi ongonte ænāmaï ingadänipa.

**Itota, Botö goquīñömö minitö
ædö cæte goquīmīnii, angä**

²¹Itota wæætē tömēnāni inānite äninque,

—Botö wadæ goquimo imopa. Gobo ate minitö botö imote ante diqui diqui minguiimini iminipa. Minitö wænæ wænæ cædömini inte wæncæminimpa. Botö goquiñömö minitö ædö cæte ponguimīni, angantapa.

²²Māninö beyæ oodeoidi awënëidi, Tömengä iñömö, Botö goquiñömö ante minitö ædö cæte ponguimīni, ante quinante angää. Tömengä nämä incæ, Wænguimo, ante pönëninque iīmai angantawo, ante änānitapa.

²³Itota godömenque,

—Minitö iñömö inguipoga quëwëmini iminipa. Botö guiquënë öönædë quëwente pömo imopa. Minitö iñömö iī inguipogaque nāni quëwencabo tönö adömini iminipa. Botö guiquënë iī inguipogaque nāni quëwencabo tönö adobo ināmai imopa. ²⁴Mänömai beyæ botö, Minitö wænæ wænæ cædömini inte wæncæminimpa, ante minitö iminite apænetabopa. Botö, Æbänö imoo, ante ämo ëñëninque pönënamāi imīni inique minitö wænæ wænæ cædömini inte nö wæmaimīnipa.

²⁵Ante apæncä ëñëninque tömënanī, —Æbidö imitawo.

Ante äñönāni Itota wæætë,

—Botö do minitö iminite, Æbodö imoo, ante nē äñimo imopa. ²⁶Botö minitö iminitedö ante nanguī angüëñemo imopa. Minitö iminitedö ante ämo bai māñi botö äno mīni apænte anguinque imaimpa. Incæte botö imote nē da pönongaingä iñömö tömengä nöingä inte tömengä, Quinö botö imote angää, ante botö ëñëninö ante botö adodö ante inguipoga quëwënanī inānite apænebo imopa, angantapa. ²⁷Incæte tömënanī, Itota tömengä Mæmpo ingantedö ante mönitö imönite apæncampa, ante ëñënamāi ingadānimpa. ²⁸Mänömai beyæ Itota,

—Botö Waobo ëñagaimo iñömote minitö botö imote awāa timpodinque tiwadinque gö cæmini wægöñömo minitö māñidëdë edæ, Botö æbodö imoo, ante ëñëncæminimpa. Ayæ botö nämä pönëninque cædāmai imopa. Wæætë

Wæmpo nänö odömonte apænedö ante botö imote apæncä botö ëñëninö ante adodö ante apænebopa, ante minitö adobai māñidëdë ëñëncæminimpa. ²⁹Botö imote nē da pönongaingä botö imote ëmö cædāmai inte cöwë botö tönö godongämæ ongongä ingampa. Edæ botö cöwë, Æbänö cæbo ate tömengä waa aqingää, ante cæbopa, ante Itota apænegacäimpa.

³⁰Māninö äñongä nanguī ināni iñömö tömengä ingante pönengadānimpa.

Wænæ beyænque nē cædāni

³¹Oodeoidi pancadāniya nē pönënanī iñönānite Itota iñömö,

—Minitö cöwë botö odömonte apænedinö bai cæmini inique botö miñæ nö gomīni imaimīnipa.

³²Ayæ botö äno nöinö impa, ante ëñëncæminimpa. Māninö nö botö äno beyænque minitö ñimpo cæte quëwëncæminimpa.

³³Ante äñongä tömënanī wæætë,

—Mönitö iñömö Abadö nänö pæimöni imöni inte mönitö cöwë waocä æcämenque beyænque nē cæmöni ināmai intamönipa töö. Bitö iñömö, Wacä beyænque minitö godömenque cædāmai inte ñimpo cæte quëwëncæminimpa, ante ædö cæte ämii.

³⁴Äñönāni Itota wæætë,

Minitö iminite näwangä ämopa. Nē wænæ wænæ cæcä iñömö tömengä wacä beyænque cæte nē quëwengä bai wædongä inte edæ tömengä nänö wænæ wænæ cægäinonque ante cædinque ædö cæte aamö cæte goqingää. ³⁵Wacä beyænque cæte nē quëwengä iñömö tömengä awënë nāni wencabo tönö wii cöwë godongämæ quëwengä ingampa. Awënë wengä guiquënë tömengä mæmpo tönö nāna wencya ina beyænque tömengä awënë tönö cöwë guëa quëwengä ingampa. ³⁶Mänömai beyæ Wængongui Wengä minitö iminite ñimpo cæcä inique minitö nö ñimpo cæte quëwëninque wacä beyænque nē cæcä bai ināmai inte quëwenguimīni imaimīnipa. ³⁷Minitö iñömö Abadö

nänö päimīni imīnīpa, ante do ēñēmopa. Incæte botö äno ante mīmönē entawēnāmai quēwēmīni beyæ mīnitö botö imote, Wänömōni wæncæcäimpa, ante pönēmīni imīnīpa. ³⁸Botö iñömö botö Mæmpo weca tömēmo adinö ante mīnitö imīnite apænebo imopa. Mīnitö guiquēnē mīni mæmpo nänö angainö mīni ēñēninö ante cæmīni imīnīpa.

³⁹Ante apæneyongä tömēnāni wæætē, —Abadäo mönö docä mæmpo ingaingä ingampa.

Änāni ēñēninque Itota,
—Mīnitö nö Abadäo wēmīni inte bai mīnitö tömengä nänö cægainö bai adobai cæcædömīnīpa töö. ⁴⁰Ñowo iñæmpa botö, Wængonguī nāwangä nänö angainö ante botö ēñēninö ante mīnitö imīnite nē apænebo iñömote mīnitö, Mönitö æbänö cæte wänömōni wænguingää, ante pönēmīni imīnīpa. Abadäo mänīi mīni cægai bai cædāmai ingacäimpa. ⁴¹Mīnitö iñömö tömēmīni mæmpo nänö cægai bai adobai cædömīni imīni awædö.

Äñongante tömēnāni,
—Mönitö wīi wegöwæ wēmōni imōnīpa töö. Wængonguī incæ tömengä adocanque mönitö Mæmpo inongäimpa.

⁴²Änāni ēñēninque Itota tömēnāni inānite,

—Wængonguī nāwangä mīnitö Wæmpocä ingä bai mīnitö botö imote waadete pönencædömīnīpa. Edæ botö Wængonguī weca quēwente mīnitö weca ñowo wææ pontabopa. Botö wīi nāmä pönēninque pontabopa. Wæætē tömengä botö imote da pönongä pongaimo imopa. ⁴³Mīnitö imīnite botö quīnō apæneboo, ante mīnitö quīnante ēñēnāmai imīnīi. Edæ botö äno ante, Quīnō apæneboo, ante mīnitö babetamö ināni bai inōmīni inte ædö cæte ēñenguīmīni. ⁴⁴Wænæ iñömö mīnitö mæmpo inongäimpa. Ayæ mīnitö mæmpo nänö cæinēwēnō ante mīnitö adodö ante, Mönitö cæinēmōnīpa, ante cæmīnīpa. Wēēñēdē inguipoga mä badōñedē tömengä, Botö wænonguīmo, ante do entawengä ingacäimpa.

Tömengä, Quīnō nāwangä impa, ante cōwē änāmai ingampa. Ayæ edæ, Quīnō äno nöinō impa, ante tömengä entawēnāmai inongäimpa. Adocä babæ tededinque tömengä babæ nänö entawēnonque ante tedewengä ingampa. Edæ tömengä nē babæ änongå ingampa. Ayæ tömengä iñömö mä babæ angaingä ingampa. ⁴⁵Incæte botö nāwangä ämo beyænque mīnitö botö äno ante pönēnāmai imīnīpa töö. ⁴⁶Mīnitö weca ongongä iñömö æcāmenque incæ botö imote apænte äninque, Bitö wænæ wænæ cæbi imīpa, ante, Nāwangä impa, ante odömönatawogaa. Botö nāwangä ämo bai mīnitö quīnante botö angainö ante pönēnāmai imīnīpa. ⁴⁷Wængonguī wēnāni nē inōnāni iñömö Wængonguī nänö angainö ante ēñēnāni inānīpa. Mīnitö guiquēnē tömengä wēmīni ināmai imīni beyæ, Tömengä quīnō angää, ante ēñēnāmai imīnīpa, ante Itota apænegacäimpa.

**Abadäo ayæ ēñadāmai iñedē
mönö Codito do ingaingä**

⁴⁸Oodeoidi wæætē tömengä ingante,
—Bitö Tämadiabæ quēwēmi imipææ.
Ayæ wænæ tönö cæbi imipææ, ante wīi nāwangä ämöni intamōnīi.

⁴⁹Ante piñāni ēñēninque Itota wæætē apænedinque,

—Botö wīi wænæ tönö cædōmo imopa. Wæætē botö iñömö, Botö Mæmpo ingante waa acæboimpa, ante cæbo imopa. Mīnitö guiquēnē botö imote waa adāmai imīnīpa töö. ⁵⁰Wadāni, Bitö waēmö imīpa, ante botö imote apænecædänīpa, ante botö cædāmai imīpa. Wæætē wacä iñömö, Wadāni bitö imite apænedinque, Waēmö imīpa, ante apænecædänīpa, ante nē cæcä ingampa. Māningä nē apænte änongå ingampa. ⁵¹Mīnitö imīnite nāwangä ämopa. Botö angainö ante nē ēñente cæcä tömengä iñömö wantæpiyæ wænāmai quēwencæcäimpa, angantapa.

⁵²Ante apæncä ēñēninque oodeoidi,
—Bitö wænæ tönö cæbi imīpa, ante ñowo ædämö ēñēmōnīpa. Abadäo

wodi iñæmpa do wængacäimpa. Ayæ Wængongui beyæ nê apænedäni adobaï do wængadänimpa. Incæte bitö, “Botö angaiñö ante nê ëñente cæcä tömengä iñömö wantæpiyæ wænämaï quëwencæcäimpa, ante apænebi töö.”

⁵³Mönö docä mæmpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo imopa, ämitawo. Tömengä iñömö edæ do wængacäimpa. Ayæ Wængongui beyæ nê apænedäni adobaï do wængadäni apa änewëë. Bitö nämä äninque, Æcämë bai imoo, ante ämi.

⁵⁴Äñönäni Itota wæætë,

—Botö nämä äninque, Waodäni, Bitö waëmö imipa, ante botö imote apænecædänimpa, ante ëñëinente wæbo bai waodäni botö imote näni waa apænedö wæætë önonquedö ante incædönimpa. Botö Mæmpo incæ minitö, Mönö Wængongui ingampa, ante mini änogä guiquënë tömengä iñömö, Bitö waëmö imipa, ante botö imote pönö apæneçä apa quëwëminii. ⁵⁵Minitö tömengä ingante wii adinque pönënamäi iminipa töö. Botö guiquënë tömengä ingante do agaïmo inte pönëmo imopa. Botö tömengä ingante adämaï imopa, ante bai botö minitö bai babæ ante ancædömoimpa. Wæætë tömengä ingante do adinque nê pönegaïmo inte botö iñömö edæ tömengä nänö angaiñö bai nê cæbo imopa.

⁵⁶Inguipoga botö ponguiönæ ante minitö docä mæmpo Abadäo wodi incæ, Codito ponguiönæ pongä acæboimpa, ante pönëninque do edæ watapæ togacäimpa. Ìninque tömengä mäniönæ Codito nänö ponguiönæ adinque godömenque togacäimpa, ante Itota apænecantapa.

⁵⁷Oodeoidi tömengä ingante,

—Bitö ëñagai iñömö tincoenta wadepo iñämaï i incæte bitö ædö cæte, Botö Abadäo ingante atabopa, ante ämii.

⁵⁸Ante piñönäni Itota wæætë,

—Minitö iminite näwangä ämopa. Abadäo wodi ayæ ëñadämaï iñedë botö iñömö edæ do quëwëmo ingaïmo imopa, ante apænecantapa.

⁵⁹Mäninö ante apæneçä ëñëninque tömënäni iñömö tömengä ingante dicaca tacacæte ante cædinque dicacoo wææmpo äñänitapa. Incæte Itota wë womöninque Wængongui oncö ñænæncodo tao wadæ gogacäimpa.

Babetamö ëñagaingä incæ waa bamonte acampa

9 ¹Itota gomonga godinque onguiñængä babetamö ëñagaingä ingante acantapa. ²Tömengä ëmiñænäni iñömö tömengä ingante,

—Awënë nê Odömömi imi, mäningä onguiñængä incæ tömengä mæmpoda incæ æcänö wënæ wënæ cæda beyæ tömengä babetamö ëñacantawo, ante ëñencæte ante äñänitapa.

³Itota tömënäni inänite,

—Ïngä onguiñængä incæ tömengä mæmpoda incæ tömänäni wënæ wënæ cædämaï inänitapa. Wæætë tömengä babetamö ëñagaingä inte quëwëñongante Wængongui nänö cædö iñömö edonque pönï acäimpa, ante mäningä mänömaï ingacäimpa. ⁴Iñänäni ëñëedäni. Botö imote nê da pönongaingä tömengä nänö cædö ante mönö mii quëwenganca mönö cæquënëmo imopa. Mönö wænguiönæ iñonte mönö ædö cæte ayæ cæquimö.

⁵Botö inguipoga quëwëñedë botö inguipoga quëwënäni beyæ ñäö bai inömo imopa.

⁶Mäninö ante äninque Itota onguipoga towæ tänöninque wëä wëä gopodinque aquimæ bayente äninque babetamögä awinca öni öni pæmongantapa. ⁷Ayæ tömengä ingante, —Goe. Gäwapæ Tidoeë näni ämä godinque bitö awinca ñäö mëmöe, ämopa, angantapa. Tidoeë näni ämä iñömö mönö tededö, Da godömæ, ante impa.

Angä ëñente godinque onguiñængä ñä mëmöninque tömengä oncönë ocæ ëmænte pöninque do acä ingacäimpa. ⁸Tömengä mänömaï do acä inte pongä adinque godongämæ quëwënäni tönö wëñëñedë tömengä, Pönömi æmoe, äñongante nê adinäni tönö,

—Æ, Ìingä onguiñængä diyæ,
 Pönömini æmoedäni, ante në
 äncöningä wii adocä ingantawo.
⁹Änani ëñëningue pancadäniya,
 —Mäningä ingampa, änänitapa.
 Wadäni guiquënë,
 —Wii tömengä ingä, önonque tömengä
 nänö emö bai emönongä ingampa.
 Ante tedeyönäni onguiñængä
 tömenganque,
 —Botö mänimodö inömo imopa,
 angantapa.
¹⁰Ayæ tömënäni,
 —Æbänö cæte bitö waa bamonte abii.
¹¹Äñönäni tömengä wæætë,
 —Onguiñængä iñömö tömengä
 emöwo Itota iñömö onguipoga towæ
 tänöningue wëä wëä gopodique aquimæ
 bayonte æninque botö awinca öni öni
 pæmongantapa. Ayæ botö imote, “Goe.
 Gäwapæ Tidoepæ nani ämæ godinque
 bitö awinca ñä mëmöe” angantapa.
 Angä ëñëningue botö wadæ gote ñä
 mëmöninque do waa bamonte abopa,
 angantapa.
¹²Tömënäni tömengä ingante,
 —Ìingä onguiñængä bitö änongå
 iñömö æyömönö ingää.
 Ante äñönäni tömengä wæætë,
 —Botö ëñënamai imopa, angacäimpa.

**Babetamö ìiningä ingante
 Paditeoidi ancaä änäni**

¹³Ayæ Paditeoidi weca onguiñængä
 në babetamö ëñagaingä ingante ænte
 mämönäni pongantapa. ¹⁴Itota mänii
 aquimæ badöningue babetamö ìiningä
 awinca wi æmonte bai nänö cæönæ
 iñömö oodeoidi guëmanguionæ
 inönimpa. ¹⁵Mänömai beyæ Paditeoidi
 iñömö adobai ëñencæte ante babetamö
 ìiningä ingante edæ, Æbänö cæte
 bitö waa bamonte abii, ante äñönäni
 tömengä wæætë,
 —Mäningä iñömö aquimæ æninque
 botö awinca öni öni pæmongantapa. Ayæ
 botö tömëmo awinca ñä mëmöninque
 ñöwo waa bamömo inte abopa,
 angantapa.
¹⁶Paditeoidi pancadäniya,

—Ìingä onguiñængä iñömö wii
 Wængongui weca quëwente pongä
 ingampa. Edæ tömengä mönö
 guëmanguionæ iñonte guëmänämai inte
 do cæcampa, änänitapa.
 Wadäni guiquënë,
 —Ìñæmpa waocä në wënæ wënæ
 cæcä inongä inte ædö cæte mänömai,
 Acæminimpa, ante mä cæquiringä,
 änänitapa.
 Ìinque tömënäni wadö wadö ante
 pönente tedewengadänimpa. ¹⁷Ayæ
 tömënäni wæætë babetamö ìiningä
 ingante,
 —Tömengä cæcä ate bitö waa abi inte
 bitö edæ tömengä ingantedö ante quinö
 ämii.

Ante äñönäni onguiñængä wæætë,
 —Tömengä Wængongui beyæ në
 apæncä ingampa, angantapa.
¹⁸Babetamö ìiningä iñömö, Waa
 bamömo imopa, ante apæncä
 ëñëningue oodeoidi awënëidi ayæ
 pönënamai inänitapa töö. Tömengä
 mæmpoda inate aa pedäni ponte
 apænedä ate mäniiwedë pönënanitapa.
¹⁹Tömënäni tömëna inate,
 —Ìingä onguiñængä edæ minatö
 wengä ingantawo. Mäningä në
 babetamö ëñagaingä minatö änongå
 adocä ingantawo. Æbänö cæte tömengä
 ñöwo waa bamonte acäi.

²⁰Ante äñönäni tömengä mæmpoda
 wæætë, Në babetamö ëñagaingä iñömö
 tömengä mönatö wengä ingampa, ante
 ëñëmönäni. ²¹Incæte mönatö, Æbänö
 cæte tömengä ñöwo waa bamonte
 acää, ante, Æcänö tömengä awinca
 wi æmonte bai cæcää, ante ëñënamai
 imönäni. Minitö tömengä ingante
 ëñencæte ante ædäni. Tömengä do
 picængä ingampa. Tömenganque
 apæncä ëñencæminimpa, änatapa.

²²Tömengä mæmpoda oodeoidi
 awënëidi inänite guifñëningue
 mäninö ante apænedatapa. Edæ
 oodeoidi awënëidi iimäi ante do
 apænedönänimpa. Æcänö Itota ingante
 Ao ante, Mönö Codito ingampa, äna
 ëñëningue edæ, Mönitö odömöincönë

ongönāmaī incæbiimpa, ante tōmengā ingante da tadōmōni tao gōcæcāimpa, ante godongāmē pōnente apænedōnānīmpa. ²³Mānōmaī beyæ tōmengā mæmpoda, “Tōmengā do picængā ingampa. Mīnitō tōmengā ingante ēñencæte ante ædāni,” angadairopa.

²⁴Onguīñængā nē babetamō iningā ingante wæætē aa pedāni pongā ate tōmengā ingante,

—Bitō Wængonguī ēñēñongā nāwangā ante apænee, āmōnīpa. Edæ iingā onguīñængā mānīnō nē cædingā wēnæ wēnæ cæcā ingampa, ante edæ do amōnīpa.

²⁵Ante pīñōnāni tōmengā wæætē,
—Māningā wēnæ wēnæ cæcā incæ wīi wēnæ wēnæ cæcā incæ botō ēñēnāmaī īmōpa. Botō babetamōmo īnīmo incæ ñōwo waa bamonte abōpa. Mānīnque ēñēmo īmōpa.

²⁶Ante apæneccā ēñēnīnque tōmēnāni tōmengā ingante,

—Tōmengā īñōmō bitō īmite æbānō cæcantawo. Æbānō cæte bitō waa bamonte abīi, ānānītapa.

²⁷Tōmengā wæætē,
—Mīnitō īmīnite do antabōpa. Botō āñōmote mīnitō ēñēnāmaī īmīnīpa tōō. Quīnante wæætē adodō ante ēñēñēmīnīi. Mīnitō adobāi, Mōnitō tōmengā ēmīñæmōni baquīmōni, ante āmīnītawo, ante angantapa.

²⁸Ayæ tōmēnāni tōmengā ingante pīinte wēnæ wēnæ badete todīnque,
—Bitō māningā ēmīñæmī īmīpa tōō. Mōnitō guīquēnē Mōītee ēmīñæmōni īmōni apa quēwēmīi, ānānītapa.

²⁹Wængonguī Mōītee ingante apænegacāimpa, ante do ēñēmōnīpa. Īngā guīquēnē æyōmōnō quēwente pongāā, ante ēñēnāmaī īmōnīpa.

³⁰Āñōnāni onguīñængā wæætē,
—Mānīnō mīnitō ānīnō wīwa impa āmīnīi. Tōmengā pōnō cæcā waa bamonte abo incæte tōmengā æyōmōnō quēwente pongāā, ante mīnitō ēñēnāmaī īmīnīpa. ³¹Nē wēnæ wēnæ cædāni īñōmō Wængonguī ingante apæneyōnāni

tōmengā tōmēnāni īnānite ēñēnāmaī ingampa, ante do ēñēmōmpa. Wæætē Wængonguī ingante, Bitō adobīque mōnō Wængonguī īmidō anguēnē, ante nē apæneccā īñōmō tōmengā Wængonguī nānō angainō nē ēñente cædongā inte apæneyongante Wængonguī tōmengā ingante ēñencæcāimpa. ³²Waocā nē babetamō ēñagaingā īñongante wacā tōmengā awīnca wī æmōnte baī cæcā ante æyedēmenque incæ īnguīpoga quēwēnāni dicæ ānāni ēñēnānītawogaa. ³³Īngā onguīñængā īñōmō wīi Wængonguī nānō da pōnongā pongaingā inte baī tōmengā tōmānō cædāmaī incædongāimpa, angantapa.

³⁴Mānīnō angā ēñēnīnque tōmēnāni wæætē,

Bitō ēñagaīñedē do wēnæ wēnæ cæte ēñagaīmī īmīpa. Incæte bitō mōnitō īmōnite ædō cæte, Ēñencæmīnīmpa, ante odōmōnte apænebi īmīpa tōō.

Ānāni īnīnque tōmēnāni, Bitō mōnitō odōmōincōnē ongōnāmaī tao gobāwe, ante tōmengā ingante da tadōnāni tao gōgacāimpa.

**Nē babetamō baī īnāni īnānite
ante Itota apæneccampa**

³⁵Tōmēnāni tōmengā ingante da tadōnānīpa, ante tededāni ēñēnīnque Itota tōmengā ingante ante dīquī dīquī mīnte gote adīnque.

—Bitō Waocā nē ēñagaingā ingante pōnēmitawo.

³⁶Angā ēñēnīnque onguīñængā,
—Awēnē, māningā æcānō īnaa. Botō tōmengā ingante pōnencæboīmpa, ante apænebi ēñēmoe.

³⁷Ante āñongā Itota wæætē,
Bitō tōmengā ingante do abitapa. Ayæ bitō īmite nē apænebo īñōmō tōmēmo īmōpa.

³⁸Angā ēñēnīnque onguīñængā,
—Awēnē, botō wede pōnēmo īmōpa. Ayæ, Bitō Wængonguī Wēmi īmidō anguēnē, ante tōmengā Itota weca ædæ wæēnīnque apæneccantapa.

³⁹Itota īñōmō edæ,
—Botō, Īnguīpoga quēwēnāni æbānō cædānīi, ante apænte ancæte

ante pöninge iīmaī cæbopa. Botö nê babetamönäni bai inäni waa bacædänimpa, ante cædinque pontabopa. Ayæ wæætê, Mönitö waa amönipa, ante nê änäni inänite, botö, Babetamömīni bai imīnīpa, ante edonque odömoncæte ante pontabopa.

⁴⁰Mäninö angä êñeninque Paditeoidi pancadäniya tömengä weca nê ongönäni guiquênê tömengä ingante,

—Ebänö ämii. Inæmpa mönitö adobai babetamömōni bai imōnitawogaa.

⁴¹Ante äñönäni Itota wæætê,
—Mīnitö babetamömīni bai inte bai wënæ wënæ cædämaī incædöminimpa. Wæætê mīnitö, Mönitö waa amönipa, ante nê änömīni inte mīni wentamö mongæncōo ee mongæmīni inguimīnidö anguênê, ante apænecäcäimpa.

Nê aacä tönö tömengä obegaidi

10 ¹Itota ayæ iīmaī apænecantapa. “Mīnitö imīnite näwangä ämopa. Onguīñangä obegaidi nāni wææ cæyömö guidēmō nê guidämāi inte wæætê wayömō da ēwa æi guicä iñömō tömengä iñömō nê awēmō ö ængä inongä inte adobai wadāni ayönāni nê pö ö ænte gocä ingampa. ²Odemö nê guicä guiquênê tömengä obegaidi inänite nê aacä ingampa. ³Nê aacä beyæ odemö nê wææ cæcä wi ænecampa. Wi ænecä ate nê aacä pö guiite tedeyongä obegaidi tömengä nänö tedepāmo êñente inänipa. Tömengä obegaidi inänite nāni emöwo nāni emöwo ante aa pecä pōñönānite tömengä tömēnāni inänite ænte taocampa. ⁴Tömengä obegaidi tömānāni inänite ænte taodīnque tömengä önömæca iñömō tāno beyænte gocä ate tömengä obegaidi tömengä nänö tedepāmo êñeninque tömengä ingante tee empo godänipa. ⁵Wacä ingante guiquênê tömēnāni tee empote godāmaī inänipa. Wæætê wacä nänö tedepāmo êñēnāmaī ināni inte tömēnāni tömengä weca ongönāmaī wodii gocædänimpa,” ante Itota apænecantapa.

⁶Tömengä mänōmaī tömēnāni inänite odömoncæte ante, Nê aacä æbänö

cæcää, ante odömonte apænecä incæte tömēnāni tömengä nänö äninö ante êñēnāmaī ingadänimpa.

Itota mönō imonte nê Aacä ingä

⁷Mänōmaī beyæ Itota wæætê äninque, “Botö mīnitö imīnite näwangä ämopa. Botö iñömō nê obegaidi bai ināni nāni wææ cæyömö, Guicædänimpa, ante odemö bai imopa. ⁸Wēēñēñedē botö ayæ pönāmaī iñedē wadāni odömonte apænecæ pongadänimpa. Tömēnāni tömānāni waodāni inänite nê awēmō ö ænāni bai inönāni inte adobai wadāni ayönāni nê pö ö ænte gogaināni bai ingadänimpa. Incæte waodāni iñömō nê botö obegaidi bai inönāni inte nê ö æinēnāni inänite wæætê êñēnāmaī ingadänimpa. ⁹Botö nê odemö bai imopa. Odemö nê guicä bai iñömō tömengä botö imote pönengä iñongante botö æmo beyænque quēwencæcäimpa. Adocä nê obega bai inte tömēnāni nāni wææ cæyömö guidēmō nê guicä bai ininque tömengä piyænē cæte quēwencæcäimpa. Ayæ tömengä wæætê nê taocä bai ininque tömengä nänö cængui mä öñö adinque eyepæ cæncæcäimpa,” ante Itota apænecantapa.

¹⁰Ayæ apænedinque, “Nê awēmō ængä guiquênê tömengä iñömō awēmō æncæte ante pongä inongä inte adobai wænoncæte ante wo ewencæte ante mäninganca cæcæte ante pongä ingampa. Botö iñömō, Waodāni quēwencædänimpa, ante ayæ, Tömēnāni nāni quēwenguinque ante watapæ pōni quēwencædänimpa, ante pontabopa. ¹¹Botö obegaidi bai ināni inänite nê waa aacä bai imopa. Nê waa Aacä iñömō nāmā incæ obegaidi beyænque wæncæcäimpa. ¹²Godonte æinta ante wacä ingante nê cæcä iñömō tömengä iñömō obegaidi nê êacä ināmaī inongä inte nê aacä ināmaī ingampa. Mänōmaī beyæ adocä iñömō mēñe bai ingä pongä adinque tömengä obegaidi inänite emö cæte wodii winongampa. Tömengä wodii winongä adinque mēñe bai ingä wæætê obegaidi weca pogodo

ponte obega ingante yao ongöinque, Obegaidi pangocæ goquïnäni, ante cæcampa. ¹³Godonte æintaque ante nê cæcä iñömö, Æbänö cæte obegaidi waa quëwenguïnäni, ante änämaï inongä inte edæ wodii winongampa,” ante Itota apæncantapa. ¹⁴⁻¹⁵Ayæ apænedinque, “Obegaidi inänite waa aacä bai edæ botö iñömö nê waa Aabo imopa. Botö Mæmpo edæ botö imote do ate pönengä bai botö adobaï tömengä ingante do adinque pönëmpo. Ayæ tömö obegaidi bai inäni inänite do adinque tömënäni inänite pönëmpo. Ayæ tömënäni guiquënë botö imote do adäni inte botö imote pönënanipa. Botö nämä incæ obegaidi bai inäni beyænque wæncæboimpa. ¹⁶Ayæ wadäni iñömö botö obegaidi bai nê inäni incæ wii mänïñömö wæx cæyömö quëwënäni inänipa. Botö mäninäni inänite adobaï æante mämö ponguënëmo imopa. Adodäni adobaï botö tedepämo, Æbänö ämoo, ante ëñenguïnäni inänipa. Mänömaï beyæ mäninäni iñömö do botö quïnäni tönö tömänäni adocabodänique baquïnäni inänipa. Ayæ nê Aabo adoboque iñömö tömänäni beyæ cæcæboimpa.” ante Itota apæncantapa.

¹⁷Ayæ apænedinque, “Botö nämä incæ Ao ante wäninque ñäni ömæmoncæboimpa, ante cædinque wæætë tömö mii quëwenguïmo incæboimpa. Mänömaï beyæ botö Mæmpo botö imote waadete pönengä ingampa. ¹⁸Waadäni iñömö ædö cæte botö imote wænguïnänii. Botö nämä incæ Ao äninque wæncæboimpa. Botö nämä tæi piñæmo iñömö, Wænguïmo, ante nê ämo inömo imopa. Ayæ adobaï botö nämä tæi piñænte nê ämo inte botö, Ñäni ömæmoncæboimpa, ante cædinque wæætë tömö mii quëwenguïmo incæboimpa. Botö Mæmpo iñömö botö imote nänö wæx angainö botö ëñëninö ante ëñente cæbopa,” ante apæncantapa.

¹⁹Mäninö apæncä ëñëninque oodeoidi wæætë wadö wadö ante pönente tedewengadänimpa. ²⁰Oodeoidi nanguï inäni iñömö,

—Tömengä wënæ tönö cæcä inte edæ ömæcacä inongä ingampa. Ædö cæte tömengä ingante ëñëmini iminii.

²¹Äñönäni oodeoidi incæ wadäni guiquënë,

—Tömengä wënæ tönö cæcä inte bai tömengä iïmaï nänö äninö ante wii angä incædongäimpa. Nê wënæ inte quëwente cæcä iñömö babetamönäni awinca wi æmonte bai cæcä waa bamönäniyaa.

Oodeoidi Itota ingante Baa änäni

²²Yoguite tedæ iñonte waodäni Eedotadë quëwënäni, Wængongui oncö tæiyæ waëmö oncö ante dodäni mænongadänimpa, ante pönente ææmæ cæyönäni. ²³Itota Wængongui oncö ñænæncönë yabæcönë Tadömö nänï änoncönë iñömö cægongantapa. ²⁴Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinënämaï imii. Bitö mönitö Codito imi ininque mönitö imönite edonque pönï apænebi ëñëmönii.

²⁵Ante äñönäni Itota wæætë,
—Minitö iminite do antabopa.

Incæte minitö pönënamäi iminipa töö. Botö edæ botö Mæmpo ëmöwo ante bamönengæ cæbo adinque minitö, Botö æbänö imoo, ante ëñëngüënëmini iminipa. ²⁶Minitö wii botö obegaidi bai inömini inte botö imote pönënamäi iminipa töö. ²⁷Waadäni botö obegaidi bai nê inäni inte botö tedepämo, Æbänö ämoo, ante do ëñënanï. Ayæ botö tömënäni inänite adinque pönëmo iñömote tömënäni wæætë botö imote tee empote godänipa. ²⁸Botö adodäni inänite wantæpiyæ nänï quëwenguïnö godömo äninque quëwencædänimpa. Ayæ cöwë wänämaï incædänimpa. Tömënäni tömö önonempe ongöñönänite æcänö tömënäni inänite gä pe æmpoda iñömö edæ dæ angampa. ²⁹Botö Mæmpo edæ adodäni inänite botö imote nê pönongaingä inongä ingampa. Tömänäni wædänäni iñönäni tömengä iñömö godömenque ñænængä inte nanguï cædongä ingampa. Ininque

tömengä önönempo ongöñönänite æcänö tömënäni inänite gä pe æmpoda iñömö edæ dæ angampa. ³⁰Botö iñömö botö Mæmpo tönö äawocaque bai ewocamöna imönapa, ante Itota apænegacäimpa.

³¹Mäninö angä ëñëningue oodeoidi wæætë tömengä ingante dicaca tacacæte ante cædinque dicacoo wææmpo æñänipa. ³²Tömënäni dicacoo wææmpo æñönänite Itota tömënäni inänite,

—Botö minitö weca botö Mæmpo nänö angai bai nangui bamönengæ odömönte cætäbopa. Ædö botö bamönengæ cædinö ante adinque minitö botö imote dicaca tacacæ cæminii.

³³Ante añongä oodeoidi wæætë,
—Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætë bitö babæ ante Wængongui ingante godö wënæ wënæ ämipa, ante bitö imite tacacæ cæmönipa. Edæ mönitö waomöni bai inte bitö adobai waobi imi incæte bitö, Botö Wængongui inömo imopa, ante ämipa töö.

³⁴Ante wæyönäni Itota wæætë tömënäni inänite,
—Minitö mini wææ yewæmongainö wii iimai ante yewæmongatii. “Minitö iñömö wængonguüdi iminipa, ante do antabopa,” ante yewæmongadänimpa.

³⁵Wængongui angä ëñente nani yewæmongainö ante waodäni ædö cæte Baa äninque wido cæquänäni. Wængongui nänö angainö ante apænecä nê ëñänäni iñönänite tömengä, Minitö wængonguüdi iminipa, angantapa.

³⁶Ayæ botö Mæmpo botö imote inguipoga da pönoncæte ante, Botö adoboque quimi imipa, ante botö imote apænte ængacäimpa. Inique edæ botö tömengä quimo inömo inte tömengä nänö nê da pönongaimo iñömöte edæ botö imote edæ æbänö anguii. Iñæmpa botö iñömö Wængongui Wëmo inömo imopa, añömöte edæ minitö wæætë, Bitö babæ ante Wængongui ingante godö wënæ wënæ ämipa, ante quinante äminitawo. ³⁷Botö edæ Mæmpo nänö cædö bai cæðamai imo bai minitö

mäniñedë botö imote pönënämai imini bai waa incædönimpa. ³⁸Minitö botö imote pönënämai imini incæte botö guiquënë botö Mæmpo nänö cædö bai adobai cæbo inique minitö, Botö æbänö cæboo, ante adinque pönencæminimpa. Mänömai cædinque, Botö Mæmpo ingante botö ewocabo imopa, ante ayæ, Botö adobai botö Mæmpo nempo quëwëmopa, ante ëñenguimini inte ayæ ëñëningue pönencæminimpa, ante Itota angacäimpa.

³⁹Mäninö angä ëñëningue tömënäni wæætë tömengä ingante bæi ongoncæ cæyönäni tömengä do aamö cæte gocantapa.

⁴⁰Ayæ Eedotadë wadæ godinque Oododänö æmæmäa ocæ ëmænte taodique tömengä Wäo wëñëñedë waodäni inänite apænë nänö guidöninömo adoyömö gote ongongä ingantapa. ⁴¹Ayæ tömengä mäniñömö ongöñedë waodäni nangui inäni tömengä weca goto pöningue änänitapa.

—Ate ëñencæminimpa, ante Wäo wodi cöwë bamönengæ cæðamai ingä incæte tömengä mäningä Itota ingantedö ante nänö angainö tömänö näwangä ante angantapa, ante apænedänitapa.

⁴²Ayæ mäniñömö ongöningue waodäni nangui inäni Itota ingante wede pönënäni bagadänimpa.

Datado wængäimpa

11 ¹Mäniñedë wacä onguifængä tömengä ëmöwo Datado wënæ wënæ badinque önönongäimpa. Mäadiya tönö Mäadota tömengä töninada nana quëwëñömö tömengä adoyömö Betänia iñömö quëwëñongäimpa.

²Iingä Mäadiya guiquënë ayæ ate ogui wapæ ænte Awënë Itota ingante öni pædinque nämä ocagui inte tömengä önöwa amimö cæquingä adocä Mäadiya iñongä tömengä töninacä Datado ñowo wënæ wënæ bacä inongäimpa. ³Inique Datado töninada iñömö, Itota ingante aa pebi pongæ, äna ëñente wacä gote,

—Awënë ëñëmi, Bitö nê waadecä iñömö wënæ wënæ ingampa cæbii, ante änapa, ante apænecantapa.

⁴Mäninö nana änö ante apäñecä
ëñëñinque Itota,

—Mäninö wənæ wənæ inte nänö
wædö iñömö wii wængui impa. Wæætë
waodäni, Wængongui ñäö apäite
ëmönongä ingampa, ante acädänimpa.
Ayä botö imote, Bitö Wængongui Wëmi
adobaï ñäö apäite ëmönömi imipa, ante
apäñecädänimpa, ante mäningä wənæ
wənæ ingampa, angantapa.

⁵Mäadota tönö tömengä tönïñacä
Mäadiya nana caya inate ayä Datado
ingante Itota tömënäni inänite waadete
pönëñongäimpa. ⁶Datado wənæ wənæ
ingampa, ante apäñecä ëñengä incæte
Itota nänö ongöñömö adoyömö meönaa
ayä ongongantapa. ⁷Tömengä ayä ate
tömengä ëmiñänäni inänite,

—Ægodöedäni, wæætë Oodeabæ mönö
gocäimpa.

⁸Äñongä tömënäni wæætë tömengä
ingante,

—Awënë nē Odömömi imi, wantæyö
itapaca oodeoidi bitö imite dicaca
tacacæ cädäni incæte bitö ñöwo wæætë,
Mäniñömö goquimo, ämitawo.

⁹Ante änäni Itota wæætë,

—Iñämpa nænque wii tömää itädë
apaitawo. Itädë nē gocä mönö nænque
inguipoga apäicä ate beyä tēwadämaï
gocampa. Botö iñömö itädë gocä bai
adobaï miimo botö quēwenganca botö
cæquënëñö iinque cæquinque gobopa.

¹⁰Woyowotä nē gocä bai guiquënë
tömengä wæætë ñäö dæ ä beyä tēwate
bai gocampa, angacäimpa.

¹¹Mäninö angä ate tömengä
godömenque tömënäni inänite,

—Mönö æmigo Datado iñömö mö
ñongä. Botö ñöwo tömengä weca
gote, Näni ömæmöe, ämo ñäni
ömæmonguingä, ante apäñecantapa.

¹²Tömengä ëmiñänäni wæætë
tömengä ingante,

—Awënë Itota, tömengä mö
ñongä iinque edæ gancaë baquingä,
apäñedänitapa.

¹³Itota Datado nänö æmäwo
wänimämo ante apäñecä incæte
tömengä ëmiñänäni guiquënë, Datado

önonque mö ñongampa, ante Itota
apäñecampa, ante pönëñönänimpa.

¹⁴Mänömai beyä Itota tömënäni inänite,

—Datado æmäwo wængäimpa, ante
edonque pönï apäñecantapa. ¹⁵Minitö
pönencæminimpa, ante botö, Tömengä
wæncæ cæyongä botö tömengä weca
ongönämai intabopa, ante minitö beyä
ante tobopa. Ægodöedäni, tömengä
weca mönö gocäimpa, angantapa.

¹⁶Ayä Tömato Äncadënaque näni
änongä iñömö Itota ëmiñänäni wädäni
inänite,

—Ægodöedäni, äñinque, Tömengä
tönö godongämæ wæncæte ante
tömengä miñä gocäimpa, angacäimpa.

**Itota mönö ömæmonguimämo
mönö mi quēwenguimämo
ante nē pönongä ingampa**

¹⁷Ayä Itota ponte ëñëñongä, Datado
baö tömënäni näni wodintatodë meönaa
go meönaa do daga wënänitapa, ante
apäñedäni ëñengacäimpa. ¹⁸Betänia
iñömö näni taadö godö Eedotadëë näni
quēwëñömö godö eyequei inönimpa. Mäni
taadö wodo tedete quidömetodo ganca
inönimpa. ¹⁹Oodeoidi nangui inäni iñömö
Mäadota tönö Mäadiya weca pöninque,
Minatö tönïñacä wängä ate wæwëmina
incæte piyänë cæte quēwencæminäimpa,
ante waadete apäñecæte ante pönänitapa.

²⁰Itota oo pönï pongampa, ante änäni
ëñëñinque Mäadota tömengä ingante bee
tencæte ante gocantapa. Mäadiya guiquënë
oncönë ee ongongantapa. ²¹Mäadota Itota
weca pöninque tömengä ingante,

—Awënë Itota, bitö mönitö weca
ongömi bai botö tönïñacä wii
wæncædongäimpa. ²²Tömengä æmäwo
wängä incæte bitö ñöwo Wængongui
ingante quiëmë ante apäñebi tömengä
pönö cæcä ænguimi imipa, ante botö
ëñëmopa, ante apäñecantapa.

²³Angä ëñëñinque Itota tömengä
ingante,

—Bitö tönïñacä wodi ñäni
ömæmonguingä.

²⁴Ante apäñecä ëñëñinque Mäadota
wæætë,

—Ao, inguipoga iinque bayedē mōnō ñāni ōmāmōñedē tōmengā do wængaingā incæte ñāni ōmæmoncæcäimpa, ante botō do eñēmopa, angantapa.

²⁵Itota tōmengā ingante äninque,

—Botō nē ñāni ōmæmōnguīmo inōmo inte cæbo beyænque mīnitō ñāni ōmæmoncæminimpa. Mīni wantæpiyæ quëwenguinque ante nē Quëwēmo inōmo imopa. Botō imote nē wede pōnengā iñōmō do wængā incæte ayæ ate wantæpiyæ quëwencæcäimpa. ²⁶Ayæ nē mīi quëwengā inte botō imote wede pōnengā iñōmō tōmengā cōwē wænāmaī quëwencæcäimpa. Bitō mäninō ante pōnēmitawo.

²⁷Angā eñëninque Mäadota tōmengā ingante,

—Awënë Itota Ao ämopa, ante apænecantapa. Bitō mōnitō Codito inōmi imipa, ante pōnēmopa. Wængonguī Wēmi inōmi inte bitō iñōmō edæ, Inguipoga nē Ponguingā, ante ñāni angaīmi imipa, ante pōnēmopa, ante apænecantapa.

Itota Datado wodintatodē gote wæcä

²⁸Mänōmaī ante apænedinque Mäadota ocæ emænte gote Mäadiya ingante aa pecä pongā ate Mäadota tōmengā ingante awēmō äninque, —Mōnō nē Odōmongā do pōninque bitō imite aa pecampa.

²⁹Angā eñëninque Mäadiya quingæ ængæ gantite tōmengā weca gocantapa.

³⁰Itota Betānia iñōmō ayæ guiidāmaī inongäimpa. Mäadota tōmengā ingante nänō bee tēniñōmō tōmengā adoyōmō ayæ a ongōnongäimpa.

³¹Oodeoidi Mäadiya tōnō oncōnē godongāmæ ongōninque, Tōmengā piyænē cæcæcäimpa, ante tæcæ waadete apæneyōnāni tōmengā quingæ ængæ gantidinque taocä adinque tōmēnāni, Tōmengā Datado wodi nänō wodintatodē wæcæte ante gocampa, ante pōnente tōmengā ingante tee empote godānitapa.

³²Itota nänō ongōñōmō pōninque Mäadiya tōmengā ingante adinque

tōmengā ōnōwa ædæ wæænte apænedinque,

—Awënë Itota, bitō mōnitō weca ongōmi baī botō tōniñacā wīi wæncædongäimpa, ante wæcantapa.

³³Mäadiya mänōmaī wæyongä oodeoidi tōmengā tōnō godongāmæ nē pōnināni adobaī wædāni adinque Itota wæwente entawëninque wæcantapa.

³⁴Ayæ,

—Datado wodi baō æyōmōnō da wēmīnitawo,

Angā eñëninque tōmēnāni,

—Awënë Itota, pō ae.

³⁵Ante äñōnāni Itota Ca wæcantapa.

³⁶Tōmengā mänōmaī wæcä adinque oodeoidi,

—Aedāni, tōmengā Datado wodi ingante nō waadete pōnengā ingantapa.

³⁷Ante tedeyōnāni pancadāniya,

—Tōmengā iñæmpa nē babetamongä awinca wi æmonte baī cædingā inte adocä Datado wodi ingante cæcä baī tōmengā wīi wæncædongäimpa, ante wægadānimpā.

Datado nänō ñāni ōmæmōmämo

³⁸Itota wæætē wæwente entawëninque Datado wodintatodē pongacäimpa. Tōmengā wodido ontatodē i iñonte dicabo ñænængade da pæñæ pōnō tee mōnodāni. ³⁹Adinque Itota,

—Dicabo da tæ ñæedāni, äñongä Datado wodi tōniñacä Mäadota wæætē,

—Awënë Itota, eñēmi. Mëönaa go mëönaa tōmengā wodido ññōninque tōmengā wodi do öö wadingā ingampa.

⁴⁰Ante wææ angā eñëninque Itota,

—Bitō wede pōnēmi ininque edæ Wængonguī æbānō ñāō apāite emōnongā inte cæcää, ante bitō acæbiimpa, ante bitō imite wīi antawo, angacäimpa.

⁴¹Ininque tōmēnāni dicabo tæ ñænānitapa. Ayæ Itota æmō adinque,

—Mæmpo botō apænedinō ante do eñëmitapa, ante adinque botō bitō imite waa ate pōnëninque apænebopa.

⁴²Botō apænedō ante æyedēmē apænebo inca bitō cōwē eñēmipa, ante botō do

ēñēmopa. Wæætē edæ waodāni botō weca godongāmæ gongænāni beyæ ante botō māniñō ante apænetabopa. Bitō botō ïmote da pönömi pontabopa, ante tömēnāni pönencædānimpa, ante apænetabopa.

⁴³Mänömainō ante Wængonguī ingante apænedinque Itota,
—Datado ta pöe, ante yedæ aa pecantapa.

⁴⁴Nē wæningä ïñömö edæ do ta pongantapa. Tömengä önompo weocoo inte nāni wīni wīni cædincoo ayæ empodinque önöwa nāni wīni wīni cædincoo ayæ ewadinque tömengä awinca weocoo nāni ñāne cæmönincoo ayæ ëmongä inte ta pongä adinque Itota tömēnāni inānite,

—Mänincoo ñi cæmīni gocæe, angacäimpa.

**Itota ingante bæi ongonde ængäimpa,
ante tedewēnāni**

*(Mäateo 26.1-5; Mäadoco
14.1-2; Odoca 22.1-2)*

⁴⁵Mänömai beyæ oodeoidi nanguī ināni Mäadiya weca ēñacæ nē pönināni inte ïināni ïñömö Itota mänömai cæcä adinque tömengä ingante wede pönēnāni bagadānimpa. ⁴⁶Pancadāniya guiquēnē Paditeoidi weca godinque, Itota quīnō cæcää, ante adodō angadānimpa. ⁴⁷Ïninqe Wængonguī quī, ante nē godönāni ñænēnāni tönö Paditeoidi ïñömö wæætē tömēnāni ömæ nāni Apænte Äincabo tömānāni inānite, Mönö godongāmæ apænecäimpa, ante adoyömö pöedāni, ante äñönāni pönāni adinque tömēnāni,

—Ïngä ïñömö, Acædānimpa, ante nanguī bamönengä cæcä ingä. Mönö quīnō cæquīmöö. ⁴⁸Ante wædinque mönö tömengä ingante, Bitō mänömai godömenque cædāmai incæbiimpa, ante wīi wææ ämö ïninqe waodāni tömānāni tömengä ingante pönēmainānipa. Tömengä ingante pönēnāni ïninqe, Itota oodeoidi Awēnē bacæte ante cæcampa, ante pönente wædinque odömānoidi incæ edæ

wææ cæbainānipa. Ïninqe tömēnāni pöninque mönö tæiyæ waëmö oncö wo ewēmainānipa. Ayæ mönö ömæ ïñömö mönö quēwencabo incæ nāmā nē ämö ïñömö tömēnāni pö ö ænte bai cædinque tömēnānique nē änāni babainānipa, änānitapa.

⁴⁹Tömēnāni weca adocanque Caiapato māniī wadepo, Wængonguī quī, ante nē godongä ñænængä pönī inongä inte tömengä ïñömö,

—Mīnitö tömānō ante ēñēnāmai ïminīpa töö, apænecantapa. ⁵⁰Mönö ömæ quēwencabo wīi tömāmö wængäimpa, ante wæætē tömēmö beyæ ante adocanque onguīñængä wængä ïninqe godömenque waa ïmaimpa, ante mīnitö ēñēnāmai ïmīni inte tedewēmīni awædö.

⁵¹Mänömainō ante apænedinque Caiapato mä nänö pönēnonque ante wīi angacäimpa. Wæætē tömengä māniī wadepo ïñonte, Wængonguī quī, ante nē godongä ñænængä pönī inongä inte Wængonguī beyæ apænedinque, Itota ïñömö oodeoidi beyæ ante wæncæcäimpa, ante apænegacäimpa. ⁵²Ayæ wīi Oodeabæ quēwēnānique beyæ ante wænguingä. Wæætē, Wængonguī wēnāni wayömö wayömö pangote godināni inte adodānique badinque adoyömö godongāmæ poncædānimpa, ante tömengä wæncæcäimpa. ⁵³Caiapato māniñō ante nänö äñönæ ïñonte täno godongāmæ pönēninque oodeoidi ömæ nāni Apænte Äincabo ïñömö, Æbänö cæte Itota ingante wænömö wænguingää, ante cöwē tedewēnönānimpa.

⁵⁴Mänömai beyæ Itota ayæ oodeoidi weca wīi edonque gocä inongäimpa. Wæætē wadæ godinque tömengä önomæca eyequei Epadaimē nāni äñömö godinque māniñömö tömengä ëmiñænāni tönö ongönongäimpa.

⁵⁵Wodo pänta gogaiönæ, ante Patowa nāni cæönæ oo pönī inönimpa. Māniñedē Oodeabæ wayömö wayömö quēwēnāni nanguī ināni Eedotadēē quēwēñömö pö æidinque tömēnāni Patowa nāni ææmä ayæ cædāmai ïñedē

dodäni angai bai cædinque, Mönö wënæ wënæ cægäinö ante mönö mënongate bai waëmö bacæimpa, ante nämä incæ äacæte ante cædinque æi gogadänimpa. ⁵⁶Adodäni Wængongui oncö ñænæncönë yabæcönë pö guidinque adiyæ gongæninque, Itota æyömönö ingää, ante pönente gomö adinque nämæneque godongämæ apænedinque,

—Mäningä iñömö ææmæ beyæ ante edæ pönämaï ingantawo. Æbänö ante pönëminii, ante apænedönänimpa.

⁵⁷Wængongui qui, ante godönäni ñænænäni tönö Paditeoidi wæætë waodäni inänite wææ änönänimpa. Æcänö Itota nänö a ongöñömö ante në ëñengä iñömö tömengä mönitö imönite angä ëñëninque mönitö wæætë Itota ingante yao ongonte æmaimönipa, ante do wææ änönänimpa.

Awënë Itota önöwa ogui wapæ gao cæwacampa

(Mäateo 26.6-13; Mäadoco 14.3-9)

12 ¹Önompö æmæmpoque go adoönæque ate Patowa nänäi ämä bacæ cæyedë Itota Betänia iñömö pongantapa. Itota do angä ate në ñäni ömæmönigä Datado iñömö tömengä adoyömö Betänia quëwëngäimpa.

²Itota pongä adinque waodäni mäniñömö quëwënäni, Itota ingante waa amönipa, ante tömengä beyæ ææmæ cægadänimpa. Wadäni tönö Datado adobaï Itota tönö godongämæ tæ contate cæñönänite Mäadota iñömö tömënäni inänite cængui godongä cænänitapa.

³Ayæ Mäadiya iñömö mëedio ditodo ganca nänäi ogui wapæ öni pæquimæ näadodopæ nänö nanguï godonte ænimæ incæ ænte mämö Itota önöwa gao cæwadinque tömengä ocagui inte amimö cæcä iñinque oncönë tömancönë ogui waacönë ingatimpa. ⁴Itota miñæ në gocä adocanque Codaa Icadiote nänäi änogä iñömö edæ, Itota ingante æncädänimpa, ante odömönte në godonguingä inte ñöwo wææ apænecantapa.

⁵—Iimæ nänö ogui wapæ quinante ömæpodäni beyæ ante godonte ænämaï

ingantawo. Iñæmpa waocä adoque wadepo cæte beyæ paga æninque todetiento deënadiota nänö ænimpota beyæ mänimæ godonte ænimæ imæmpa, ante wæcantapa.

⁶Tömengä dicæ ömæpodäni beyæ ante pönëninque mänömainö ante apænecantawogaa. Wæætë tömengä në awëmö ænogä inte mäninö ante apænecantapa. Tömënäni da wente æintaa næænogä inte tömengä iñömö, Tömënäni da wëninta incæ pancataa botö qui bacæimpa, ante awëmö ænogä inte mänömaï apænecantapa. ⁷Itota wæætë tömengä ingante,

—Onquiyængä ingante piinte änewënämaï incæbiimpa. Mänimæ botö daga wenguïönæ ante manguënegä inte tömengä botö baö nänäi daga wenguinque ante eyepæ iñonte öni paacantapa. ⁸Ömæpodäni cöwë minitö weca quëwënäni inänipa. Botö guiquënë wiï cöwë minitö weca quëwëmö imopa, ante apænegacäimpa.

Datado ingante wænogæimpa, ante tedewënäni

⁹Itota Betänia ponte ongongampa, ante apænedäni ëñëninque oodeoidi nanguï inäni tömengä weca pönäni incæte wiï tömengä beyænque pönänitapa. Wæætë adobaï Datado ingante angä në ñäni ömæmönigä ingante acæte ante pongadänimpa.

¹⁰Mänömaï beyæ Wængongui qui, ante në godönäni ñænænäni iñömö, Æbänö cæte Datado ingante adobaï wænömö wænguingää, ante godongämæ tedewënanitapa. ¹¹Iñæmpa oodeoidi nanguï inäni, Datado beyæ mönitö imönite ëmö cæte Itota ingante pönëninque tömengä gämænö godänipa, ante wægadänimpa.

Itota Eedotadëe iñömö pongä
(Mäateo 21.1-11; Mäadoco 11.1-11; Odoca 19.28-40)

¹²Iimö ate, Eedotadëe iñömö poncæte ante Itota idömæ pongampa, ante apænedäni ëñëninque ææmæ beyæ

ante tæiyænāni pōnināni iñōmō,
¹³yædēmāmā wangō tate māo bee
 tente taodinqe yedæ aa pedinqe,

—Mōni quēwenguinqe ante, Badogaa,
 ante tomōnīpa. Bitō Awēnē Wængonguī
 ēmōwo beyænque pōmi iñinqe bitō
 toquinqe edæ Wængonguī bitō imite
 waa cæcæcāimpa. Bitō idægoidi Awēnē
 iñōmi inte bitō toquinqe ingæimpa.

¹⁴Ante yedæ āñōnāni Itota iñōmō bodo
 wengā ate æninqe tōmengā æi contate
 pongantapa. Wēēnēhedē Wængonguī
 beyæ iīmaī ante nāni yewæmonte
 angaiñō bai iinqe cædinque pongantapa.

¹⁵“Tiōno iñōmō quēwēmīni iñōmō
 edæ guiñēnāmaī iedāni.

Mīnitō Awēnē Odeye ñōwo mīnitō
 weca pongā aedāni. Edæ bodo
 wengā æi contate pongampa,”
 ante yewæmongadānīpa. ¹⁶Tōmēnāni
 dodāni nāni angai bai cædinque Itota
 ingante bee tencæ taodāni adinqe Itota
 nānō nē ēmiñænāni iñōmō, Æbānō
 cædāni, ante māniñedē ēñēnāmaī
 inte wædōnānīpa. Wæætē edæ Itota
 Wængonguī ñāō ēmōñōmō ocæ ēmænte
 gocā adinqe tōmengā ēmiñænāni
 māniñedē ate edæ, Itota ingante
 waodāni ñōwo nāni cædōnō ante dodāni
 wēēnēhedē yewæmongadānīpa, ante
 pōnente wædōnānīpa.

¹⁷Datado wodi ontatodē ongōñongante
 Itota, Ta pōe, ante aa pecā ēñēninqe
 nē wæningā incæ ñāni ōmæmōninqe
 ta pongā adinqe Itota weca godongāmæ
 ongōñināni nanguī iñāni iñōmō, Itota
 mānōmaī cæcā atamōnīpa, ante gode
 ā gode ā cædōnānīpa. ¹⁸Iñinqe edæ,
 Itota mānōmaī bamōnengæ cæcampa,
 ante apænedāni ēñente beyænque
 waodāni tæiyænāni Itota weca bee
 tencæ pōnānitapa. ¹⁹Mānōmaī beyæ
 Paditeoidi iñōmō nāmanque godongāmæ
 tedewēnānitapa.

—Waadāni tōmānāni æbānō tōmengā
 miñæ tee empo godāni ante aedāni.
 Māniī beyæ ante, Mōnō cædinō wīi
 eyepæ impa, ante adinqe, Mōnō æbānō
 cæte godōmenque cæquimōō, ante
 wægadānīpa.

Guidiegoidi pancadāniya Itota ingante diqui mīnāni

²⁰Eedotadēē iñōmō tōmēnāni æāmæ
 cæyedē Wængonguī ingante waa ate
 apænegæte ante nē pōnāni pancadāniya
 iñōmō guidiegoidi inōnānīpa. ²¹Mānīnāni
 iñōmō Pedipe weca pōninqe edæ,

—Awēnē, ēñēmi. Mōnitō Itota ingante
 ainēmōnīpa, ante ānānitapa. Māningā
 Pedipe iñōmō Betaida quēwēñōmō
 Gadideabæ quēwente pongā inongāimpa.

²²Tōmengā iñōmō ÆEntade weca gote
 tōmengā ingante guidiegoidi nāni ānīnō
 ante apænegā ate tōmēna wæætē Itota
 weca guēa godinqe tōmengā ingante
 āñōna, ²³Itota wæætē,

—Wængonguī nānō cæōnæ do ba
 iñinqe tōmengā pōnō cæcā beyænque
 botō Waobo ēñagaīmo iñōmō ñāō apāite
 ēmoncæboimpa. ²⁴Mīnitō iminite nāwangā
 āmopa. Tōmēmō onguipo quiyadimō
 incæ yabæque ñōmāadāmaī i bai ædō
 cæte tā bocate pædinque tōmēmō nanguī
 pōni imonguīi. Wæætē tōmēmō yabæque
 ñōmāate ate tā bocate pædinque nanguī
 pōni imōmpa. Botō adobai wænguēnēmo
 imopa. Botō wīi wæmo bai ædō cæte
 waodāni tæiyænāni botō quīnāni
 baquīnāni. ²⁵Nē, Nāmanque pōnente
 quēwēmote, ante pōnengā iñōmō edæ
 tōmengā nānō quēwenguīmāmo incæ wo
 ewente bacæcāimpa. Inguipoga quēwēñedē
 nē, Wīi nāmanque pōnente quēwēmote,
 ante pōnengā guiquēnē tōmengā nānō
 wantæpiyæ quēwenguīnō ante do
 ēadingā inte tōmengā nānō wænāmaī
 quēwenguīnque gocæcāimpa. ²⁶Æcānō
 botō imote nē cæda ina tōmengā iñōmō
 edæ botō imote tee empo goquēnengā
 ingampa. Ayæ ayōmōnō botō quēwēmō
 botō imote nē cædongā adoyōmō
 quēwencæcāimpa. Botō Mæmpo iñōmō
 botō imote nē cædongā ingante waa
 acæcāimpa, ante Itota apænegacāimpa.

**Itota, Botō wæncæboimpa,
 ante apænegā**

²⁷Ayæ godōmenque apænedinqe
 Itota iīmaī apænegantapa. “Botō

guiñēmāmo entawēninque wæbo inte quīnō anguīmoo. ‘Botō Mæmpo ēñēmi, āninque, Botō nantate wæwenguīōnæ oo pōni ba incæte bitō pōnō ò æmi ate wæwēnāmaī bacæboimpa,’ ante botō wīī mǎnōmaīnō ante ancæboimpa. Edæ botō wæwenguīnō beyæ ante pontabopa. ²⁸Mæmpo, Bitō æbānō nǎo apāite ēmōmi imii, ante odōmōmi acædānimpa,” angantapa.

Åñongā oōnædē inō tedepāmo apænedinque, “Botō æbānō nǎo apāite ēmōmo imopa, ante do odōmontabopa. Ayæ wæætē adodō cæcæboimpa,” ante apænecā ēñēnānitapa.

²⁹Māniñōmō godongāmæ ongōnāni nanguī ināni iñōmō mānimāmo ēñēninque edæ, Detæbo tæī tēmāmo baī impa, ante wædānitapa. Wadāni guiquēnē,

—Anquedo iñōmō tōmengā ingante apænecantapa, ante ānānitapa.

³⁰Itota iñōmō wæætē,
—Mānimāmo wīī botō beyæ ante apænecampa. Wæætē mīnitō beyæ ante apænecampa. ³¹Nōwoyedē Wængonguī inguipoga quēwēnāni inānite apænte nānō panguīnō iñōmō edæ oo baquīnō anguēnē. Inguipogaque quēwēnāni awēnē iñongante wēnæ ingante Wængonguī nōwoyedē, Gobāwe, angā gocæcāimpa. ³²Botō imote awāa timpodinque ængæ gantidēnāni wægōmo ate botō waodāni tōmānāni inānite, Mīnitō botō weca poncæmīnimpa, ante aa pecæboimpa, ante Itota apænecantapa.

³³Mānōmaīnō ante apænedinque tōmengā, Æbānō wænguīmoo, ante ēñencædānimpa, ante apænecantapa.

³⁴Ēñēninque māniñōmō ongōnāni nanguī ināni,

—Mōnitō iñæmpa, Mōnō Codito cōwē ee ongocæcāimpa, ante dodāni nāni wææ angāinō ante yewæmōnte ongōmpa, ante ēñentamōnīpa. Incæte bitō iñōmō nāmanque āninque, Botō Waobo ēñagaīmo iñōmote botō imote awāa timpodinque gō cædāni wængonguīmo imopa, ante ædō cæte āmii. Åninque,

Īngā Waocā nē ēñagaingā iñæmpa ee ongōnāmaī wænte goquingāa.

³⁵Ante wæyōnāni Itota tōmēnāni inānite,

—Botō, Waodāni mīmōnē nǎo baī entawēninque quēwencædānimpa, ante pontabopa. Wædænque ayæ iñō botō mīnitō weca quēwēninque mīnitō imīnite odōmōnte apænebopa. Mōnitō taadō wēmō badāmaī ingæimpa, ante mīnitō taadō ayæ nǎo iñedē goedāni. Edæ wēmō iñōmō nē gocā iñōmō tōmengā edæ, Ædōnō goboo, ante ēñēnāmaī ingampa. ³⁶Botō nǎo baī ēmōnōmo imopa. Nǎo iñōmō nē cægōmōni incæmōnimpa, ante bacæte ante cædinque mīnitō iñōmō botō mīnitō weca ayæ ongōñōmote botō imote pōnēedāni āmopa, angantapa.

Tōmengā iinque apænete ate wadæ godinque wē womōnte ongongacāimpa.

Oodeoidi Itota ingante iīmaī cæte pōnēnāmaī inānīpa

³⁷Itota oodeoidi weca nanguī bamōnengæ cæte odōmōngā incæte tōmēnāni ayæ tōmengā ingante pōnēnāmaī inānitapa. ³⁸Wængonguī beyæ nē apænecā Itaiya wodi iīmaī ante do nānō angāinō baī iinque baquinque tōmēnāni mānōmaī cædōnānimpa.

“Awēnē Wængonguī ēñēmi. Mōnitō apænemōni tōmēnāni nāni ēñēnō ante edæ æcānō ēñente pōnengāa. Īñæmpa nē pōnengā iñōmō edæ dæ angā awædō.

Ayæ Awēnē Wængonguī nānō tæī piñænte cægāinō ante æcānō ada iñōmō edæ dæ angampa.”

³⁹Iinque tōmēnāni ædō cæte pōnenguīnānī, ante Itaiya wodi edæ wayōmō yewæmōninque, Wængonguī iīmaīnō ante cæcā beyæ pōnēnāni inānīpa, ante yewæmongacāimpa.

⁴⁰“Tōmēnāni botō gāmæñō ocæ ēmænte pōnāni baī botō wæætē, Waa bacæmīnimpa, ante godō cæcædōmoimpa.

Incæte mānōmaī cædāmaī incæboimpa, ante Wængonguī iīmaī cægacāimpa.

Tömengä godö cæcä beyænque
 waodäni babetamönäni bai
 adämaï bagadänimpa.
 Adobaï mimönë nani pönëno ömæde
 badinque ëñënamaï bagadänimpa.
 Edæ, Tömënanäni nani adinö ante
 ëñënamaï incädänimpa, ante
 cædinque
 ayæ edæ, Tömënanäni nani ëñëno
 ante ëñënamaï incädänimpa,”
 ante wææ cægacäimpa.

ante Itaiya wodi yewæmongacäimpa.
⁴¹Itaiya wodi Itota nänö nãö ëmömämo
 æbänö ingui, ante do ate bai ingaingä
 inte edæ Itota ingantedö ante mäniinö
 ante doyedë angacäimpa.

⁴²Nöwo guiquënë oodeoidi
 awënëidi tæiyænäni Itota ingante
 pönënanimpa. Incæte Paditeoidi beyæ
 guifñënanäni inte, Mönö odömöincönë
 go guiyömönite tömënanäni mönitö
 imönite wii tatodoncädänimpa,
 ante wææ cædinque tömënanäni në
 pönënanäni incæ waodäni ëñëñönäni pæ
 wëenete tededämaï inänimpa. ⁴³Edæ
 mäniinäni, Waodäni mönitö imönite
 waa ate apænecädänimpa, ante nanguï
 aïnente wædäni inönänimpa. Adodäni,
 Wængongui mönitö imönite waa ate
 apænecæcäimpa, ante pönömenque
 aïnente wædäni inönänimpa.

**Itota nänö änö beyænque waodäni
 apænte wæcädänimpa**

⁴⁴Itota yedæ äninque aa pecantapa.
 “Botö imote në pönengä iñömö wii
 botö adoboque imote pönëngö
 ingampa. Wæætë edæ botö imote në
 da pönongaingä ingante tömengä
 adobaï pönengä inongäimpa. ⁴⁵Adocä
 botö imote në acä iñömö tömengä
 botö imote në da pönongaingä ingante
 adobaï acä ingampa. ⁴⁶Botö imote në
 wede pönënanäni iñönäni adocanque
 incæ wëmö iñömö wii godömenque ee
 ongoncæcäimpa, ante cædinque botö
 iñömö inguipoga quëwënanäni weca nãö
 bai inömo inte pontabopa.”

⁴⁷“Waoçä botö änö ëñëninque wii
 ëñente cæcä ingä incæte botö tömengä

ingante apænte änämaï imopa. Edæ
 botö wii inguipoga quëwënanäni inänite
 apænecæte ante pontabopa. Wæætë
 inguipoga quëwënanäni inänite æmo
 beyænque quëwëncæminimpa, ante
 pontabopa cæminii. ⁴⁸Botö imote
 në Baa angä iñömö tömengä botö
 änönö ante, Dicæ pönëmogaa, angä
 iñongante tömengä ingante në apænte
 änö incæ edæ mä ongompa. Inguipoga
 iinque baquionæ iñonte botö äniinö
 incæ në apænte anguingä bai ba
 iinque mäningä ingante, Bitö pante
 wæquinque Baa angabiimpa, ante bai
 apænete ingäimpa. ⁴⁹Edæ botö wii
 nämanque pönëninque apænëtabopa.
 Wæætë, Botö quino apænëquimoo, ante,
 Æbänö ante apænëquimoo, ante botö
 Mæmpo botö imote në da pönongaingä
 iñömö tömengä botö imote wææ angä
 ëñëninque apænëtabopa. ⁵⁰Tömengä
 nänö wææ angainö ëñente cæbo
 beyænque munitö wantæpiyæ cöwë
 quëwëncæminimpa, ante do ëñëmopa.
 Iinque botö Mæmpo botö imote
 nänö angainö ante botö adodö ante
 apænëbopa,” ante Itota mäniñedë iinque
 apænëgacäimpa.

**Itota incæ tömengä ëmiñænäni
 önöwa mënöwacä**

13 ¹Patowa nani ämæ wantæyö
 bacäimpa, ante nani cæyedë
 Itota iñömö, Botö inguipoga quëwente
 emö cæte botö Mæmpo weca ocæ
 emænte æi goquionæ do bacäimpa,
 ante do ëñëngöngäimpa. Itota ingante
 pönënanäni në inguipoga quëwënanäni
 iñönänite tömengä tömënanäni inänite
 waadete pönëninque ñöwoyedë, Botö
 æbänö nanguï waadete pönëmo imoo,
 ante odömöngäimpa.

²Gäwadcæ bayö Itota tömengä
 ëmiñænäni tönö godongämæ cæñönäni
 wënwæ awënë cæcä beyænque Timönö
 wengä Codaa Icadiote iñömö, Itota
 ingante odömönte godoncæboimpa, ante
 pönengä inongäimpa. ³Itota iñömö,
 Quincoomë ongoncoo incæ Wængongui
 pönö cæcä beyænque botö tömancoo

awënë badinque nämä tæi pīnænte nē ämo imopa, ante ëñëongäimpa. Ayæ edæ Wængongui weca quëwente wææ pönimo inte botö Wængongui weca ocæ ëmænte goquimo imopa, ante do ëñëongäimpa. ⁴Mäninö ante ëñëongä incæ tömengä iinque cænte ate ængæ gantidique yabæcoo gä tadongadinque wadæ caaincoo æninque önoncadayæ inö goti padengantapa. ⁵Ayæ ate æpæ mënongaquintadë pe ñiñæninque tömengä ëmiñænäni tömänäni önöwa mënöwadinque wadæ caaincoo goti padëincoo inte wadæ cæwacæ tæcæ cæcantapa.

⁶Mänömaï cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë imi incæte botö önöwa mënöwacæ pömitawo.

⁷Ante äñongä Itota wæætë,

—Ñöwoque botö æbänö cæboo, ante ëñënämaï imipa. Incæte ayæ ate ëñëcæbiimpa.

⁸Angä ëñëninque Pegodo,

—Botö önöwa cöwë mënöwadämaï incæbiimpa, ante Baa ämopa cæbii.

Ante äñongä Itota godömenque,

—Botö bitö önöwa mënöwadämaï imo bai bitö wii botö quimi imaïmipa, ante angantapa.

⁹Mäninö angä ëñëninque Timönö Pegodo wæætë,

—Awënë, Mänömaï i iinque bitö wii botö önöwaque mënöwaquimi. Wæætë botö önonpo adobai mënompodinique botö ocabo mënöncae.

¹⁰Ante äñongä Itota wæætë,

—Æpæ nē äadingä iñömö tömengä baö ëñayö tömäñö waëmö impa. Iinque tömengä önöwaque nämanque mënöwacä inte eyepæ impa. Minitö do mimö mënongate waëmö entawënomini iminipa. Incæte wii tömämini waëmö entawëmini iminipa, angantapa.

¹¹Edæ, Æcänö botö imote nē odömonte godonguingä ingäa, ante tömengä do ëñëongäimpa. Mänömaï beyæ tömengä, “Minitö wii tömämini do mënongate waëmö entawënomini iminipa,” angantapa.

¹²Ayæ tömënäni önöwa iinque mënöwadinque tömengä yabæcoo wëñadinque tömengä adodö gote tæ contadinque tömënäni inänite,

—Botö mänömaï cædinque minitö beyæ ante quinö cæboo, ante ëñëminitawo, ante äninque Itota godömenque,

¹³Minitö botö imote, Nē Odömömi imipa, äninque ayæ adobai, Awënë imipa, ämini iminipa. Edæ botö minitö Awënë inömo iinque minitö mänömainö ante näwangä ante äminipa. ¹⁴Botö iñömö minitö Awënë inömo inte nē minitö iminite Odömömo imo incæ minitö önöwa do mënöwabo aminipa. Iinque botö mänömaï mënöwabo bai minitö adobai wacä önöwa wacä önöwa mënöwaquëñëmini iminipa. ¹⁵Botö cæbo bai minitö adobai cæcæminimpa, ante cædinque botö minitö beyæ ante cæbo aedäni. ¹⁶Minitö iminite näwangä ämopa. Awënë ñænængä inongä iñongante tömengä ingante nē cæcä iñömö wii godömenque ñænængä ingampa. Awënë nē da godongä ñænængä iñongä tömengä nänö nē da godöningä wæætë wii godömenque ñænængä ingampa. ¹⁷Minitö ñöwo mäninö ante ëñënimini inte edæ ado ante cæmini iinque mini toquinque bacæimpa, ante Itota apæñecantapa.

¹⁸Ayæ apænedinique, “Botö wii tömämini beyæ antabopa. Botö apænte æninäni ædänidö inänii, ante botö nē ëñëmo imopa. Wængongui angä ëñente näni yewæmongainö bai iinque bacæimpa, ante iimaï bacæ cæpa. ‘Botö tönö godongämæ nē cængongä iñömö botö imote nē piinte cæcä bacantapa.’

¹⁹Mänömaï ba adinque edæ minitö botö imotedö ante apænedinique, Tömengä mönö Codito inongä ingampa, ante pönencæminimpa, ante cædinque botö ñöwo ayæ badämaï iñedë minitö iminite ämopa. ²⁰Minitö iminite näwangä ämopa. Æcämenque botö nē da godongaingä ingante äna tömengä iñömö edæ botö imote adobai ængä ingampa. Ayæ æcämenque botö imote äna tömengä iñömö botö imote nē da

pönongaingä ingante ængä ingampa cæmīniī,” ante Itota apænegacäimpa.

Itota ingante Codaa nē godonguingä ingampa, ante

(*Mäateo 26.20-25; Mäadoco 14.17-21; Odoca 22.21-23*)

²¹Mäninö angä ate Itota iñömö tömengä nänö wæwēmāmo entawēninge wæcä inte, Nāwangä ante apænebo ēñēdāni. Mīni cabo inca adocanque, Æncædänimpa, ante botö imote odömonte pædæ godonguingä ingampa.

²²Ante apæneca wædinqe tömengä emiñænāni, Æcänö ingante apænecaä, ante ēñenāmaī inte godongāmæ wacä ingä wacä ingä adānitapa. ²³Itota emiñænāni adocanque iñömö Itota nänö nē waadete pönengaingä inongäimpa. Tömengä iñömö Itota tönö äänömonque tæ contate ongönaimpa. ²⁴Timönö Pegodo iñömö iingä ingante ömö ömö cædinqe angampa. Bitö Itota ingante, Æcänö ingää, ante ämi angä ēñente ate apænebi ēñemönie. ²⁵Angä ēñeninqe mäningä Itota tönö äänömonque nē tæ contacä iñömö,

—Awënë, æcänö ingää, ante apænebi ēñemönie, ante tömengä ingante äñongä.

²⁶Itota wæætē,

—Botö iī päö owætaca mīi cæte godömo nē ænguingä iñömö tömengä nē cæquingä ingampa.

Ayæ päö owætaca mīi cædinqe Timönö wē Codaa Icadiote ingante godongantapa. ²⁷Codaa päö angä ate Tatāna iñömö tömengäa do guigacäimpa. Ininqe tömengä ingante,

—Bitö quinö cæcæ cæbii edæ quingæ cæe, ante Itota angantapa.

²⁸Wadāni adoyömö nē cænāni iñömö, Itota quinate mäninö ante tömengä ingante angää, ante ēñenāmaī inönänimpa. ²⁹Edæ Codaa tömēnāni da wente æinta næænongä ingä beyæ tömēnāni pancadāniya, Ææmæ beyæ ante mönö cænguī wīi eyepæ ēamöni ininqe, Bitö godonte æncæbiimpa, ante Itota angampa, ante pönēnönänimpa.

Adobaī ömæpodāni inānite, Godömi ænguīnänimpa, ante Itota angampa, ante pönēnönänimpa.

³⁰Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñowo angampa

³¹Codaa dæ gocä adinqe Itota, —Botö Waobo ēñagaiimo inte æbänö ñäö apäite emönömo imoo, ante ñowo edonque bacäimpa. Botö cæquinö beyæ Wængonguī æbänö ñäö apäite emongä ingää, ante edonque bacäimpa. ³²Ayæ botö cæquinö beyæ Wængonguī ñäö apäite nänö emönö edonque ba ininqe Wængonguī cæcä ate botö ñäö apäite botö emönö adobaī edonque bacäimpa. Ayæ mänömaī Wængonguī wantæyö cæcæcäimpa. ³³Botö wēmīni botö mīnitö weca wantæyö quēwēninge gobopa. Mīnitö botö imote ante diqui diqui minguimīni iminipa. Ayæ oodeoidi inānite botö angainö baī ñowo mīnitö iminite adodö ämopa. Botö goquiñömö ante mīnitö ædö cæte ponguimīni imīni. ³⁴Botö wææ änönö ante ñowo mīnitö iminite ämopa. Wacä ingä wacä ingä waadete pönencæmīnimpa. Botö mīnitö iminite waadete pönēnömo baī mīnitö adobaī wacä ingä wacä ingä waadete pönenguēñēmīni iminipa. ³⁵Mīnitö wacä ingä wacä ingä waadete pönēmīni adinqe wadāni tömānāni, Mīnitö Itota nänö nē emiñæmīni iminipa, ante ēñencædänimpa, ante Itota apænegacäimpa.

Pegodo inca, Dica abogaa, anguingä ingampa, ante

(*Mäateo 26.31-35; Mäadoco 14.27-31; Odoca 22.31-34*)

³⁶Timönö Pegodo tömengä ingante, —Awënë, ædömē gobii.

Ante äñongä Itota wæætē,

—Botö goquiñömö ante bitö ædö cæte botö imote ñowo tee empo ponguimī imii. Ayæ ate guiquēñē bitö botö imote tee empo ponguimī incæbiimpa, angantapa.

³⁷Pegodo godömenque,
—Awënë, äninque, Botö quinante bitö
imite ñowo tee empo godämaï imoo,
ante wæcampa. Botö Ao äninque bitö
beyä ante nämä wænguïmo imopa.

³⁸Ante äñongä Itota wæætë,
—Bitö Ao äninque botö beyä ante
näwangä wænguïmi imiyaa. Bitö imite
näwangä ante apänebo ëñëe. Tawadiya
pedämaï iñonte bitö iñömö botö
imotedö, Dicæ abogaa, ante mempoga
go adopoque anguïmi imipa, ante
apänegacäïmpa.

**Mæmpo weca mönö godö ante
Itota taadö bai ingampa**

14 ¹Itota tömengä ëmiñänäni
inänite, “Mimönë guiñente
wädämaï iedäni. Wæætë Wængonguï
ingante wede pönëedäni, angantapa.
Ayä adobaï botö imote wede pönëedäni.
²Botö Mæmpo nänö quëwëñömö
onconcoo bacoo pöni mä ongompa.
Mänömaï impa, ante wii näwangä i bai
botö minitö iminite ancädömoïmpa.
Minitö beyä ante botö, Mïni ponte
quëwenguï onconcoo ante tömäa
ædæmö badoncæte ante mäniñömö
gocæboïmpa. ³Ayä minitö quëwenguï
onconcoo tömäa ædæmö mänoncæte
ante gobo ininque botö ocä ëmænte
poncæboïmpa. Pöninque minitö botö
quëwëñömö adoyömö botö tönö
godongämä quëwencæminimpa, ante
botö minitö iminite ænte mäibo
æicæminimpa. ⁴Botö goquiñömö
goyömönö i, ante ayä mäniñömö
gocæte ante taadö godö ante minitö do
ëñëminipa,” ante Itota apänecantapa.

⁵Apänecä ëñëninque Tömato iñömö
tömengä ingante,

—Awënë, Ædömë goquïmii, ante
mönitö ëñënämaï imöni inte mönitö
mäninö bitö goquïnö ædönö i, ante
taadö ædö cæte ëñenguïmönii.

⁶Äñongä Itota wæætë,
—Botö iñömö tömëmo në taadömo
bai inömo imopa. Ayä botö adobo në
näwangä äno bai inömo bai iñömote
minitö æbänö näwangä impa, ante

ëñenguïmïni iminipa. Botö edä në
Quëwëmo inte pönö cæbo beyænque
minitö quëwenguïmïni iminipa. Botö
wii pönö cæbo bai waocä æcämenque
incæ botö Mæmpocä weca godämaï
incädongäïmpa. ⁷Botö imote do ate
pönëmïni ininque minitö botö Mæmpo
ingante adobaï ate pönëmïni imaiminipa.
Ñowo tömengä ingante tæcæ ate bai
pönëmïni inte minitö tömengä ingante
cöwë në agaïmïni incæminimpa, ante
apänecantapa.

⁸Mäninö apänecä ëñëninque Pedipe
iñömö,

—Awënë, Mæmpocä ingante odömömi
amönie. Mäninque adinque idæwaa.
Eyepä impa.

⁹Äñongä Itota wæætë,

—Pedipe ëñëmi. Botö minitö weca
wantæpiyæ quëwëmo incæ bitö ayä
botö imote adämaï inte bai pönënämaï
imitawo. Në botö imote acä iñömö
tömengä adobaï Mæmpocä ingante
në acä ingampa. Ininque bitö iñömö,
Mæmpocä ingante odömömi amönie,
ante ædö cæte botö imote ämii.

¹⁰Wæmpocä nempo botö në quëwëmo
imopa, ante ayä, Wæmpocä ingante
botö entawëmo imopa, ante bitö
pönënämaï imitawo. Botö minitö iminite,
Æbänö apäneboo, ante wii nämanque
pönëninque apänebopa. Wæætë botö
Wæmpocä incæ botö tönö në äawocaque
bai quëwëngä inte edä tömengä nänö
cädö ante në cæcä ingampa. ¹¹Tömengä
nempo quëwëmo imopa, ante ayä,
Tömengä ingante botö entawëmo imopa,
ante minitö iminite apänebo ëñëninque
pönëedäni. Wæætë edä minitö botö
änö beyænque ayä pönënämaï imini
incæte botö bamönengä nanguï cædinö
adinque mäninö beyænque pönëedäni.

¹²Minitö iminite näwangä ämopa. Botö
imote në wede pönengä iñömö tömengä
botö cæbaï adobaï cæcæcäïmpa. Ayä
botö Mæmpocä weca ocä ëmænte
gobo beyä në wede pönengä iñömö
edä wii ononque botö cæbaï cædinque
godömenque cæquingä ingampa.

¹³Minitö botö ëmöwo ante apänedinque

quiēmē æncæte ante apænemīni
 ēñēnīnque botō Wængonguī Wēmo
 īnōmo inte edæ, Mæmpocā nānō nīō
 ēmōmāmo edonque pōnī acædānīmpa,
 ante cædinque mīnitō ānō bai edæ do
 cæcæboīmpa. ¹⁴Mīnitō, Ænguīmōni,
 ante quiēmē beyæ ante botō ēmōwo
 ante botō īmo apænemīni ēñēnīnque do
 cæcæboīmpa, ante Itota apænecāīmpa.

**Wængonguī Tæiyæ Waēmō
 Ōnōwoca poncæcāīmpa, ante**

¹⁵Ayæ godōmenque apænedīnque Itota
 īmaī ante apænecantapa. “Mīnitō botō
 īmote waadete pōnēmīni īnīnque botō
 wææ angainō ante ēñente cæquiēmīni
 īmaīmīnīpa. ¹⁶Ayæ, Wacā botō beyæ
 ante mīnitō tōnō godongāmæ cæquīngā,
 ante botō īñōmō botō Mæmpocā ingante,
 Da godōmi gocæ, ante apænecæboīmpa.
 Ayæ tōmengā botō ānō ante do ēñente
 cædinque edæ, Tōmengā mīnitō tōnō
 cōwē ongonte godongāmæ cæcæcāīmpa,
 ante cædinque adocā ingante mīnitō
 weca da pōnongā ponguīngā ingampa.
¹⁷Wængonguī nē nō cæcā ingampa, ante
 nāwangā impa, ante Wængonguī Tæiyæ
 Waēmō Ōnōwoca incæ nē odōmongā
 īnongā ingampa. Incæte waodāni
 nē inguīpogaque quēwēnāni īñōmō
 tōmengā ingante adāmaī īnāni inte
 pōñēnāmaī īnōnāni inte edæ ædō cæte
 tōmengā ingante Ao ante ænguīnāni.
 Wæætē edæ tōmengā mīnitō weca
 quēwēnongā īñongante mīnitō tōmengā
 ingante nē entawenguīmīni inte
 tōmengā ingante do ate bai pōnēmīni
 īmīnīpa,” ante Itota apænecantapa.

¹⁸Ayæ apænedīnque, “Botō wīi
 mīnitō nōwamīni bai mīni baquinque
 ante edæ ēmō cæte goquīmo īmopa.
 Wæætē mīnitō weca ocæ ēmænte
 poncæboīmpa. ¹⁹Wantæ ate waodāni
 nē inguīpogaque quēwēnāni īñōmō edæ
 botō īmote adāmaī inguīnāni īnānīpa.
 Mīnitō guīquēnē botō īmote aquīmīni
 īmīnīpa. Edæ botō quēwēmo beyænque
 mīnitō adobaī quēwēncæmīnīmpa.
²⁰Ayæ Wængonguī Tæiyæ Waēmō
 Ōnōwoca nānō ponguīōnæ īñonte mīnitō

īñōmō edæ, Mōnō æbānō āanque bai
 quēwēmo īmōō, ante ēñencæmīnīmpa.
 Edæ, Botō Mæmpocā nempo quēwēmo
 īmopa, ante ayæ edæ, Mīnitō botō
 nempo quēwēmīni īmīnīpa, ante ayæ,
 Mīnitō īmīnite adobaī botō entawēmo
 quēwēnōmīni īmīnīpa, ante mīnitō
 ēñencæmīnīmpa. ²¹Æcānō botō wææ
 angainō ō ænīnque ēñente cæda
 tōmengā īñōmō botō īmote nē waadete
 pōnengā ingampa. Botō īmote nē
 waadete pōnengā ingante botō Mæmpo
 nāēmæ waadete pōnencæcāīmpa. Ayæ
 botō adobaī māningā ingante waadete
 pōnencæboīmpa. Ayæ, Botō æbānō
 īmoo, ante tōmengā ingante odōmōmo
 acæcāīmpa,” ante Itota apænecantapa.

²²Codaa īñōmō edæ wīi Codaa
 Icadiote wacā Codaa īñōmō edæ Itota
 ingante apænecantapa.

—Awēnē īñæmpa bitō mōnitō īmōnite
 apænedīnque, Botō æbānō īmoo, ante
 odōmōmo acæmīnīmpa, ānīnque
 quīnante wæætē, Inguīpogaque
 quēwēnāni īnānīte odōmōnāmaī
 incæboīmpa, ante pōñēnīnque cæbitawo,
 angantapa.

²³Itota wæætē,

—Wacā botō īmote nē waadete
 pōnengā īnīnque tōmengā īñōmō
 botō odōmonte apænedō ante ēñente
 cædongā īmaingampa. Botō Mæmpo
 adocā ingante waadete pōnenguīngā
 ingampa. Ayæ mōnatō tōmengā tōnō
 cōwē godongāmæ quēwēncæte ante
 tōmengā weca ponguīmōna īmōnāpa.
²⁴Botō īmote nē waadete pōñēnāmaī
 ingā guīquēnē tōmengā īñōmō botō
 odōmonte apænedōnō ante ēñēnāmaī
 cædongā ingampa. Mānīnō botō
 odōmonte apænebo mīni ēñēnīnō īñōmō
 wīi botō nāmā pōñēnīnque apænedīnō
 impa. Wæætē botō īmote nē da
 pōnongaingā nānō angainō impa, ante
 Itota apænecantapa.

²⁵Ayæ apænedīnque, “Mīnitō weca
 botō quēwēnedē botō mānīnō ante
 mīnitō īmīnite apænētabopa. ²⁶Botō
 Mæmpocā botō ēmōwo beyæ ante
 tōmengā Tæiyæ Waēmō Ōnōwoca

ingante da pönongä ponguingä inte tömengä mīnitō tōnō godongāmæ nē cædongä ingampa. Adocä mīnitō imīnite tömänō ante odōmonte apæneceä ēñencæmīnīmpa. Ayæ botō apænedō mīni ēñēñinō tömänō ante tömengä adodō apæneceä wæætē pōnencæmīnīmpa,” ante Itota apæneceantapa.

²⁷Ayæ apænedinque, “Botō pōnō cæbo beyænque mīnitō gänē entawente quēwēedāni, ante pōnō cædinque gobopa. Botō gänē entawēmāmo incæ mīnitō imīnite pōnōmo æñinque mīnitō gänē pōnente quēwencæmīnīmpa. Botō inguipogaque quēwēnāni nāni godōnō bai wīi pōnōmo imopa. Nō cæte pōnōmo imopa. Mīnitō mīmōnē guīñente wædāmaī inte piyænē cæte quēwencæmīnīmpa. ²⁸Botō mīnitō imīnite ēmō cæte godinque mīnitō weca ocæ ēmænte poncæboīmpa, ante botō apænebo ēñēmīnitapa. Botō edæ, Botō Mæmpocä weca gocæboīmpa, ante apænebo ēñēñimīni inte mīnitō botō imote waadete pōnēmīni ininque botō beyæ ante watapæ tobaimīnīpa. Edæ botō wīi botō Mæmpo bai inōmo inte wædāmo inōmo imopa. ²⁹Mänōmaī iinque ba adinque mīnitō, Nāwangä impa, ante pōnencæmīnīmpa, ante botō ñōwoque ayæ badāmaī iñedē mīnitō imīnite apænetabopa,” ante Itota apæneceantapa.

³⁰Ayæ apænedinque, “Ii inguipogaque quēwēnāni awēnē iñōmō wēnæ inongä inte oo poncæ cæcampa. Ininque botō mīnitō imīnite wīi wantæpiyæ ayæ apænebopa. Edæ tömengä ædō cæte botō imote nāmā tæi pīñænte nē angä inguingä. ³¹Incæte botō, Waodāni inguipogaque quēwēnāni iñōmō iīmaī ante ēñencædānīmpa, ante cæbopa. Botō Mæmpo ingante botō waadete pōnēmopa, ante ayæ, Botō Mæmpo botō imo wææ angä bai botō adodō cæbo imopa, ante tömēnāni ēñenguēñēnāni inānīpa,” ante Itota iinque apænegacāīmpa.

Ayæ, “Nōwo edæ ængæ gantidīnque mōnō gocæīmpa,” angacāīmpa.

Itota nāwā yowementa bai ingampa

15 ¹Ayæ godōmenque apænedinque Itota iīmaī apæneceantapa. “Botō nāwā yowementa bai imopa. Ayæ botō Mæmpo yowementa nē aacä bai ingampa. ²Botō imote pōnēnāni tömänāni iī yowementa gædēmænto bai inānīpa. Æcänō wīi botō ēmiñængä bai cæda tömengä iñōmō gædēmænto ömæcato bai ingampa. Botō Mæmpo gædēmænto ömæcato bai iñongante wangō topænte bai cædinque tömengä ingante wido cæcampa. Æcänō botō ēmiñængä bai cæda guiquēnē tömengä gædēmænto tömenca incato bai ingampa. Gædēmænto tömenca incato incæ godōmenque waa pædinque nanguī incacæīmpa, ante wææ topæ wææ topæ cædāni bai botō Mæmpo iñōmō adobai cæcampa. Botō nē ēmiñængä wīi eyepæ cæcä adinque tömengä ingante wædæ cæcampa. ³Botō änō ante mīnitō imīnite botō apænedinō beyæ mīnitō mīmōnē do mēnongate quēwēmīni imīnīpa. ⁴Mīnitō botō nempo ee quēwēnōmīni incæmīnīmpa. Ayæ adobai mīnitō botō imote cōwē entawente quēwēnōmīni imīnīpa. Gædēmænto yowementa adoyōmō ibænte odæ yate bai pæte incate bapa. Edæ gædēmænto adotoque iñonte ædō cæte nāmā cædinque incaquintoo. Mīnitō iñōmō, Tōmenca incate bai mōnō nanguī cæcæīmpa, ante cædinque botō nempo ee quēwenguēñēmīni imīnīpa,” ante Itota apæneceantapa.

⁵Ayæ apænedinque, “Botō yowementa bai imopa. Mīnitō guiquēnē gædēmænto bai imīnīpa. Waocä botō nempo ee quēwēnongä inte ayæ botō imote cōwē entawēnongä ingä ininque tömengä tömenca incate bai nanguī cæbaingampa. Wæætē edæ botō nempo quēwēnāmaī imīni ininque mīnitō tömāā cædāmaī imāimīnīpa töö. ⁶Nē botō nempo ee quēwēnāmaī ingä iñōmō tömengä gædēmænto nāni wido cædinto bai ingampa. Māninto amīmō bayonte gæte māmō gongapamō ñō cædāni wo bæco

baï cædinque tømengä ingante botö Mæmpo adobaï wido cæcä ingampa,” ante Itota apænecantapa.

⁷Ayæ apænedinque, “Minitö guiquenë botö nempo ee quëwëninque botö angainö ante ee entawente quëwëmïni ïninque mïnitö quïëmë æncæte ante äinëmïni incæ Wængonguï ingante apænemïni inte tømengä wæætë pönongä æmaïmïnipa. ⁸Minitö nanguï pönï tømencä incate baï ïmïni inte, Minitö botö ëmïñæmïni ïmïnipa, ante edonque pönï ingæïmpa. Mänömaï cæmïni ïninque, Botö Mæmpo ñäö apäite ëmönongä ingampa, ante odömonte ingæïmpa. ⁹Botö Mæmpo ïñömö botö ïmo waadete pönengä ingaingä baï botö adobaï mïnitö ïmïnite waadete pönëmo intabopa. Botö nê waadete pönëmo ïñömote mïnitö ïñömö botö nempo ee ongödäni. ¹⁰Botö Mæmpo nê waadecä ïñongante botö tømengä nänö wææ angainö ante ëñente cædïmo inte tømengä nempo ee ongömopa. Minitö adobaï botö nê waadete pönëmo ïñömote mïnitö botö wææ angainö ante ëñente cæmïni ïninque edæ botö nempo ee ongömïni ïmaïmïnipa,” ante Itota apænecantapa.

¹¹Ayæ apænedinque, “Botö watapæ topämo ante mïnitö mïmönë entawëninque watapæ tocæmïnimpa, ante ayæ, Mïni watapæ topämo eyepæ ingæïmpa, ante botö mïnitö ïmïnite mänïnö ante apæneta bopa. ¹²Botö wææ änö ïñömö ïïmaï ante impa. Minitö ïmïnite botö waadete pönëninö baï mïnitö adobaï wacä ingä wacä ingä waadete pönëedäni. ¹³Æcänö nänö æmigoidi beyæ ante, Botö Ao äninque nämä incæ tømënanï beyæ ante wænguïmo, ante cæcä ïñömö tømengä nänö waadete pönëmämo wïi waodäni tømänäni waadete pönëmämo baï impa. Tømengä ïñömö edæ godömenque nanguï waadete pönengä ingampa. ¹⁴Minitö botö wææ angainö ëñente cæmïni ïninque botö guïdëmïni ïmaïmïnipa. ¹⁵Minitö botö ïmo nê cædömïni ïmïnipa, ante botö mïnitö

ïmïnite godömenque apænedämaï ïmopa. Edæ awënë ingante nê cæcä ïñömö, Awënë æbänö cæcää, ante ëñënamaingä ingampa. Wæætë edæ botö Mæmpo nänö angainö ante botö ëñëninö tømänö ante mïnitö ïmïnite apænebo ëñëmïni beyæ botö, Minitö botö guïdëmïni ïmïnipa, ante apænedïmo ïmopa. ¹⁶Minitö wïi botö ïmote apænte ænimïni ïmïnipa. Wæætë botö ïñömö, Minitö botö ëmïñæmïni ïnömïni inte tømencä nanguï incate baï nanguï cæcæmïnimpa, ante mïnitö ïmïnite apænte ænimö ïmopa. Minitö botö ëmïñæmïni ïnömïni inte cöwë cæmïni ïninque mïnitö quïëmë ante botö ëmöwo beyænque apænemïni ëñëninque Mæmpocä ïñömö do pönongä æncæmïnimpa. ¹⁷Botö wææ änö ïñömö ïïmaï ante impa. Minitö wacä ingä wacä ingä waadete pönëedäni,” ante Itota apænecacäïmpa.

Inguipogaque nê quëwënanï Itotaidi ïnänite nänï pïimämo

¹⁸Mänömainö ante apænedinque Itota godömenque ïïmaï ante apænecantapa. “Inguipogaque nê quëwënanï ïñömö mïnitö ïmïnite pïinänï adinque mïnitö guïñënamäi inte edæ, Itota ingante do pïingadänimpa, ante pönëmïni ïmïnipa. ¹⁹Waodäni nê inguipogaque quëwënanï nänï cabo wacä ingä wacä ingä waadete pönënanï ïnänipa. Minitö inguipogaque nänï quëwencabo tönö adomïni ïmïni baï tømënanï mïnitö ïmïnite adobaï waadete pönencædönänimpa. Wæætë mïnitö inguipoga nänï quëwencabo tönö adomïni ïnämäi ïmïnipa. ïñæmpa wëenëñedë mïnitö inguipoga quëwëñömïnite botö do mïnitö ïmïnite apænte æntabopa. Mänömaï beyæ nê inguipogaque quëwënanï ïñömö mïnitö ïmïnite pïinänï ïnänipa. ²⁰Botö änö ante mïnitö ïmïnite, Æbänö apænebo, ante ñowo wæætë pönëedäni. ‘Awënë ñænængä ïnogä ïñongante tømengä ingante nê cæcä ïñömö wïi godömenque ñænængä ingampa.’ Waodäni botö ïmote pïinänï wæwëmo baï mïnitö ïmïnite adobaï pïinänï wæwëmïni incæmïnimpa.

Botö odömonte apänegainö ante ëñente cædäni bai mīnitö odömonte apänedö ante adobai ëñente cæcædānimpā.

²¹Mīnitö botö quīmīni iñöminite edæ botö ëmōwo beyænque iñāni, Botö imote nē da pōnongaingā, Æbānō ingāā, ante ëñēnāmaī iñāni inte mänōmaī edæ cæquīnāni iñānīpa,” ante Itota apäñecantapa.

²²Ayæ apäñedinque, “Botö tömēnāni iñānite wīi ponte apänebo bai tömēnāni nāni wentamö mongænguīmāmo mongænāmaī incædōnānīpa. Nōwo iñömö, Botö apänebo nē ëñēnāni inte tömēnāni nāni wentamö mongæmāmo do mongænānīpa. Iñæmpa Itota apäñecā ëñēnāmaī imōnīpa, ante ædö cæte anguīnānīi. ²³Botö imote nē piingā iñömö tömēngā adobai botö Mæmpocā ingante piingā ingampa.

²⁴Wacā, Botö bamōnengæ botö cæbai adobai cæcā iñömö cōwē dæ angampa. Iñinque botö wīi tömēnāni weca bamōnengæ cæbo bai tömēnāni nāni wentamö mongænguīmāmo mongænāmaī incædōnānīpa. Incæte, Botö æbānō cæboo, ante do adāni incæ tömēnāni botö imote piīnīnque botö Mæmpo ingante adobai piīnānitapa.

²⁵Dodāni nāni wææ yewæmongaintaa yewæmōninque iīmaī ante nāni apänegainö bai nōwodāni nāni cædö beyæ edæ iīnque batimpā. ‘Botö imote önönque piīnānitapa,’ ante yewæmongadānīpa,” ante Itota apäñecantapa.

²⁶Ayæ apäñedinque, “Botö edæ botö Mæmpo weca ocæ ëmænte gote ate mīnitö beyæ ante mīnitö tönö godongāmæ cæquingā ingante da pōnoncæboimpā. Māningā iñömö Wængonguī Tæiyæ Waëmö Öñowoca iñongā inte edæ, Æbānō nāwangā i, ante apäñecā ëñencæmīnīpa. Tömēngā botö Mæmpo weca quēwente ponguingā ingampa. Pōnīnque tömēngā, Botö æbānō cæboo, ante apäñecā ëñencæmīnīpa. ²⁷Mīnitö adobai wēēñēdē botö mā cæyedē do botö mīñæ godīmīni imīni inte edæ, Botö

æbānō cæboo, ante apäñequēñēmīni imīnīpa,” ante Itota tömēngā nānō nē ëmīñænāni iñānite apänegacāimpā.

16 ¹Godömenque apäñedinque Itota iīmaī apäñecantapa. “Mīnitö oda cædāmaī tæi gongænte ongoncæmīnīpa, ante cædinque botö mīnitö imīnite mänīnō ante tömānō apäñetabopa. ²Mīnitö odömōincōnē go guiyōmīnite wadāni, Mōnitö tönö godongāmæ ongōnāmaī iedāni, ante mīnitö imīnite tatodōnāni gocæmīnīpa. Wīi mänīnonque cæquīnānīpa. Wæætē iīncayæ ate æcāmenque mīnitö imīnite nē wænonguīna ina iñömö tömēngā, Botö Wængonguī nānō cædö ante cæbopa, ante pōnencæcāimpā. ³Botö Mæmpo ingante wīi adīnque pōñēnāmaī iñāni inte ayæ botö imote adāmaī inte bai pōñēnāmaī iñāni iñömö tömēnāni iñömö mīnitö imīnite mänīnō cæquīnāni iñānīpa. ⁴Edæ māñiōnæ bayonte mīnitö, Botö wææ angainö ante æbānō ämo, ante wæætē pōnencæmīnīpa, ante botö mīnitö imīnite mänīnō ante do apäñetabopa,” ante Itota apäñegacāimpā.

Wængonguī Tæiyæ Waëmö Öñowoca nānō cædö

Ayæ godömenque apäñedinque Itota iīmaī apäñecantapa. “Mīnitö tönö wēēñēdē godongāmæ ongōmo beyæ botö mänīnō ante māñiñēdē apäñedāmaī intabopa. ⁵Botö imo nē da pōnongaingā weca botö nōwo pōñi ocæ ëmænte goquīmo incæte, Bitö æyömōñö goquīmi, ante mīnitö tömāmīni botö imote änāmaī imīnīpa. ⁶Botö mänīnō ämo beyæ mīnitö nangui pōñi wæwēmīni imīnīpa. ⁷Incæte botö mīnitö imīnite nāwangā ämopa. Mīnitö beyæ waa ingæimpā, ante botö goquīmo imopa. Botö wadæ godāmaī imo bai mīnitö tönö godongāmæ nē cæquingā iñömö mīnitö weca pōñāmaī incædongāimpā. Wæætē edæ cōwē goquīmo inte godīnque botö tömēngā ingante mīnitö weca da pōñōmo ponguingā ingampa. ⁸Pōnīnque

Wængongui Tæiyæ Waëmö Öñowoca cæcä beyænque inguipogaque quëwëñäni, Mönö wënæ wënæ cædömö inte wentamö mongæmö awædö, ante wæcædänimpa. Ayæ tömengä cæcä beyænque, Wængongui weca æcänö nõ cæte quëwëña ina, ante ëñencædänimpa. Ayæ Wængongui apænte ante pancæcäimpa, ante adobai ëñencædänimpa. ⁹Edæ botö imote näni pönëñämai inö beyænque inguipogaque quëwëñäni iñömö edæ, Mönö wënæ wënæ cædonque ante cædinque pönëñämai imompa, ante wæcædänimpa, ante adocä cæcæcäimpa. ¹⁰Ayæ edæ, Botö iñömö botö Mæmpo weca gote quëwëñömote mînitö botö imote adämai inguimîni imînipa. Inînque botö Mæmpo weca gote quëwëmo beyæ Wængongui Tæiyæ Waëmö Öñowoca incæ, Æbänö nõ cæte quëwenguii, ante inguipogaque quëwëñäni inänite odömönte apænecä ëñencædänimpa. ¹¹Ayæ inguipogaque quëwëñäni awënë iñongante wënæ ingante Wængongui, Botö pancæboimpa, ante do apænte angacäimpa, ante Wængongui Tæiyæ Waëmö Öñowoca godö odömönte apænecä beyænque ëñencædänimpa,” ante Itota apænecantapa.

¹²Ayæ apænedinque, “Botö mînitö imînite nangui ayæ apæneinente wæbo incæte mînitö ñöwo ganca ædö cæte ëñenguimîni. ¹³Wængongui Tæiyæ Waëmö Öñowoca pongä ate tömengä iñömö, Æbänö näwangä impa, ante tömånö ante mînitö imînite odömönte apænecä ëñencæmînimpa. Adocä, Æbänö apænequimoo, ante wii nämä pönëninque apænecæcäimpa. Wæætë Wængongui tömengä ingante angä nänö ëñëñinö ante Wængongui Öñowoca iñömö mäninonque ante mînitö imînite odömönte apænecä ëñencæmînimpa. Ayæ, Iincayæ ate æbänö baquii, ante tömengä mînitö imînite apænecä ëñencæmînimpa. ¹⁴Botö æbänö ñäö apäite ëmönömo imopa, ante edonque pöni bacæimpa, ante cædinque tömengä iñömö botö entawëñö ante

mînitö imînite odömönte apænecä ëñencæmînimpa. ¹⁵Botö Mæmpo nänö ëadoncoo iñömö edæ tömancoo botö quincöo impa. Mänömai beyæ iimai apænëtabopa. Tömëmo entawencöo ante Wængongui Öñowoca iñömö mînitö imînite odömönte apænecä ëñencæmînimpa, ante apænëtabopa,” angantapa.

¹⁶“Ayæ wantæ ate mînitö botö imote adämai inguimîni imînipa. Ayæ ate wantæyö iñönte botö imote wæætë acæmînimpa,” ante Itota apænecæcäimpa.

**Mîni wæwëmämö incæ wæætë
mîni toquinque bacæimpa**

¹⁷Tömengä ëmîñëñäni pancadäniya nämanque godongämæ apænëdinque, —Mäninö äninque tömengä, Mînitö wantæ ate botö imote adämai inguimîni imînipa, ante æbänö ancæte ante apænecäa, ante wædänitapa. Ayæ, Wantæ iñönte mînitö botö imote wæætë acæmînimpa, ante ayæ, Botö Mæmpo weca gote quëwëmo beyæ impa, ante Itota apænecä awædö, ante apænëdänitapa. ¹⁸Tömëñäni wæætë wæætë, Mäninö tömengä, Wantæyö, ante nänö änö iñömö edæ æbänö ante apænecäa, ante wædänitapa. Tömengä æbänö ancæte ante apænecäa, ante ëñëñämai imönipa, ante wædänitapa.

¹⁹Tömëñäni mäninö ante pönëninque botö imote ëñencæte ante äinëñäni inänipa, ante wædinque Itota tömëñäni inänite,

—Wantæ ate mînitö botö imote adämai inguimîni imînipa, ante botö änö ante ayæ, Wantæyö iñönte mînitö botö imote wæætë acæmînimpa, ante botö æbänö ämoo, ante mînitö nämanque godongämæ tedemînitawo. ²⁰Mînitö imînite näwangä ämopa. Inguipogaque quëwëñäni iñömö watapæ toyönäni mînitö caate wæquimîni inte Ca ca wæcæmînimpa. Mînitö wæwenguimîni imînipa. Incæte mîni wæwëmämö incæ mîni toquinque bacæimpa.

²¹Onquiyängä iñömö tömengä wëñæ

ēñacæ cæyedē nanguī nantate wæcā inte wæwengā bacā incæte tōmengā wēñæ ēñacā adinque tōmengā, Botō wē ēñacā ingampa, ante watapæ tote beyæ tōmengā nānō wædinō ante edæ pōnēnāmaī ingampa. ²²Mīnitō tōmengā bai adobaī imīnīpa. Nōwoyedē mīni caate wæyedē impa. Incæte botō wæætē mīnitō imīnite aquīmo imopa. Mānōmaī beyæ mīnitō watapæ tocæmīnīpa. Māniñedē, Mīnitō todāmaī incæmīnīpa, ante æcāmenque incæ wææ cædāmaī incæcāimpa.

²³Godōmenque apānedinque Itota, “Māniñedē mīnitō botō imote, Æbānō ī, ante ēñencæte ante godōmenque ānāmaī incæmīnīpa. Mīnitō imīnite nāwangā āmopa. Botō Mæmpo ingante mīnitō quiēmē æncæte ante botō ěmōwo ante apāneyōmīni tōmengā īñōmō do pōnongā æncæmīnīpa. ²⁴Nōwo ganca mīnitō quiēmē æncæte ante botō ěmōwo ante apānedāmaī īnīmīni imīnīpa. Nōwo īñōmō edæ, Pōnōmi æmōnie, ante Wængonguī ingante apāneedāni. Apānemīni ēñēninque tōmengā pōnongā ænīnque mīnitō eyepæ pōni mīni watapæ toquinque ænguīmīni incæmīnīpa,” ante Itota apānegacāimpa.

Itota nē tæī ěmōnongā ingampa

²⁵Mānōmaīnō ante apānedinque Itota īīmaī apānecantapa. “Mīnitō imīnite inguipoga quēwēnāni nāni cæbainō ante odōmonte apānedīmo incæte botō wantæyō baquiōnæ īnque bayonte mānōmaīnō ante godōmenque odōmonte apānedāmaī incæboimpa. Wæætē botō tōmēmo Mæmpo ingantedō ante apānedinque mīnitō imīnite edonque pōni apānecæboimpa. ²⁶Māniōnæ mīnitō botō Mæmpo ingante botō ěmōwo beyænque apānequīmīni imīnīpa. Īnīnque botō, Mīnitō beyæ ante botō Mæmpo ingante apānequīmo imopa, ante mānōmaī beyæ botō ānāmaī imopa. ²⁷Edæ botō Mæmpo incæ mīnitō imīnite waadete pōnengā ingampa. Botō īmo waadete pōnēninque mīnitō īñōmō edæ, Wængonguī weca

quēwēninque Itota pongaingā ingampa, ante pōnēnīmīni beyæ botō Mæmpo adobaī mīnitō imīnite waadete pōnengā ingampa. ²⁸Botō edæ Mæmpocā weca quēwente inguipoga īñōmō pōni mo inte nōwo pōni inguipoga quēwēninque wadæ godinque Mæmpocā weca ocæ ěmānte goquīmo imopa,” ante Itota apānecantapa.

²⁹Tōmengā ěmīñænāni,
—Nōwo inguipoga quēwēnāni nāni cæbainō ante odōmonte apānedāmaī inte bitō edonque pōni apānebi ēñēmōnīpa. ³⁰Bitō tōmānō ante ēñēmi imīpa, ante nōwo ēñēmōnīpa. Īnīnque mōnitō, Æbānō ī, ante ēñencæte ante bitō imite ānāmaī īñōmōni bitō īñōmō do nē ēñēmi imīpa. Mānōmaī beyæ mōnitō, Bitō Wængonguī weca quēwente pōnīmī inte nē ēñēmi imīpa, ante do pōnēmōni imōnīpa.

³¹Ante āñōnāni Itota wæætē,
—Nōwo tæcæ pōnēmīni imīnitawo. ³²Wantæyō bayedē īñōmō edæ nōwo pōni batīpa. Māniñedē mīnitō botō imote ěmō cæte panguīmæ panguīmæ wodii winōninque tōmēmīni oncōnē go guīquīmīni imīnīpa. Botō īmo adoboque ěmō cæte gomīni incæte botō īñæmpa wīī adoboque ongōmopa. Edæ botō Mæmpo botō tōnō godongāmæ ongongampa. ³³Mīnitō īñōmō botō nempo quēwēmīni inte gānē pōnente quēwencæmīnīpa, ante cædinque botō mānīnō ante mīnitō imīnite apānetabopa. Īi inguipoga quēwēninque mīnitō caate wæcæmīnīpa. Incæte mīni wæwenguīmāmo ante guīñēnāmaī ědāni. Edæ inguipogaque ante nāni wēnæ wēnæ cædōnō ante Baa ānīnque botō godōmenque tæī ěmōnōmo inte nē gānā cægāimo imopa. Mānōmaīnō ante Itota tōmengā nānō ěmīñænāni īnānite īinque apānecā ēñengadānīpa.

Itota Mæmpo ingante mōnō beyæ ante apānecampa

17 ¹Itota mānōmaīnō ante īinque apānedinque oōnædē æmō adinque īīmaī apānecantapa. “Mæmpo

ēñēmi. Bitō, Æbānō baquīī, ante bitō angainō baī do batimpa. Botō edæ, Bitō Wēmo inōmo iñōmote bitō pōnō cæbi ate botō ñāō apāite baī botō ēmōnō iñōmō edonque pōnī bacæimpa, ante apænebopa. Mānōmaī cæbi adinque botō wæætē bitō beyæ pōnō cæbo ate bitō ñāō ēmōmāmo edonque pōnī bacæimpa. ²Bitō pædæ pōnōmi botō nē ængaināni inānite botō cōwē wantæpiyæ nāni quēwenguīnō ante godōmo æncædānimpa, ante bitō botō tōnō godongāmæ cæbi beyænque botō waodāni tōmānāni inānite nē āmo batabopa. ³Waodāni cōwē wantæpiyæ nāni wænāmaī quēwenguīnō ante iīmaī impa. Mæmpo, bitō adobique nāwā Wængonguī inōmi iñōmite tōmēnāni bitō imite ate baī pōnencædānimpa. Ayæ botō Itota Coditobo bitō nē da pōnongaimo iñōmote do adinque tōmēnāni pōnencædānimpa. Tōmēnāni mānōmaī nāni pōnēnō beyænque edæ cōwē wantæpiyæ nāni wænāmaī quēwenguīmāmo edæ do ēadānipa,” ante Itota apænecantapa.

⁴Ayæ Mæmpo ingante godōmenque apænedinque, “Bitō, Iīmaī cæe, ante bitō angainō ante botō inguipoga quēwēninque do iinque cæbo beyæ bitō ñāō ēmōmāmo edonque pōnī bagatimpa. ⁵Wēñēñedē pōnī inguipoga badōnāmaī iñedē bitō weca ongōninque botō ñāō ēmongaimo inte ñōwo bitō weca ocæ ēmænte pōmo adinque bitō pōnō cæbi ate botō adobo ñāō apāite baī ēmōmo ate edæ edonque pōnī acæimpa,” Mæmpo ingante apænecantapa.

⁶Ayæ, “Inguipoga quēwēnāni bitō quīnāni inānipa, ante bitō pædæ pōnōmi æninque botō wæætē, Wængonguī æcānō ingāā, ante tōmēnāni inānite odōmōmo ēñēnānitapa. Adodāni bitō quīnāni iñōnānite bitō tōmēnāni inānite pædæ pōnōmi æntabopa. Tōmēnāni bitō angainō ante ēñente cædīnāni inānipa. ⁷Bitō pōnōmi æninque botō ēwocagaincoo ante iīnāni iñōmō edæ, Mānincoo tōmancoo edæ Mæmpocā pōnongā æninque Itota ēwocacampa,

ante ñōwo do ēñēnānipa. ⁸Edæ Mæmpo bitō pōnō apænebi botō ēñente ængainō ante botō adodō ante edæ tōmēnāni inānite godō apænebo ēñēninque tōmēnāni do ænānitapa. Botō bitō weca quēwente pongaimo imopa, ante ēñēninque tōmēnāni ædæmō ēñēnānitapa. Ayæ, Bitō botō imote da pōnōmi nē pongaimo imopa, ante pōnēnānitapa,” ante Itota Mæmpocā ingante apænecantapa.

⁹Ayæ, “Mæmpo, botō tōmēnāni beyæ ante bitō imite apænebopa. Botō wīī inguipogaque quēwēnāni beyæ ante apænebopa. Wæætē edæ, Bitō nē pædæ pōnōmi botō ængaināni iñōmō edæ bitō quīnāni inānipa, ante botō tōmēnāni beyæ ante bitō imite apænebopa. ¹⁰Botō quīnāni tōmānāni bitō quīnāni inānipa. Ayæ bitō quīnāni tōmānāni botō quīnāni adobai inānipa. Tōmēnāni cædāni beyænque botō ñāō ēmōmāmo edonque pōnī batimpa.”

¹¹Ante apænedinque Itota godōmenque apænecantapa. “Botō inguipoga iñōmō godōmenque ongōnāmaī incæboimpa. Wæætē bitō weca ocæ ēmænte ponguimo imopa. Botō emīñænāni guiquēñē inguipoga iñōmō ayæ ongōnāni inānipa. Mæmpo bitō nē Tæiyæ Waēmō inōmi inte ēñēmi. Bitō ēmōwo bitō pōnō pemongaiwo beyænque botō tæī piñænte nē āmo imopa. Iinque mōnatō äāwoaque baī ēwocate quēwēmōna baī mānīnāni adobai äāwoaque baī ēwocate quēwencædānimpa, ante cædinque bitō tæī piñæmi inte tōmēnāni inānite wææ aacæbiimpa, ante bitō imite apænebopa. ¹²Mānīnāni weca botō quēwēñedē botō iñōmō bitō ēmōwo bitō pōnō pemongaiwo beyænque botō tōmēnāni inānite wææ aatabopa. Ayæ, Wē womōnāmaī incædānimpa, ante adodāni inānite wææ gampotabopa. Iinque tōmēnāni tōmānāni wē womōnāmaī inānipa. Ōnonque adocanque iñōmō æmæwo wē womonguēngā incæ tōmengā iñōmō edæ Wængonguī angā ēñente nāni yewæmongainō baī ñōwo

iinque baquinque ante edæ æmæwo wë womongantapa,” ante Itota Mæmpocä ingante apænecantapa.

¹³Ayæ, “Botö nïowo bitö weca ocæ emænte ponguïmo ïmopa. Tömënanï botö watapæ topämo tömämämo entawëninque quëwencädänimpa, ante botö mäninö ante inguipoga ayæ quëwëñedë apænebo ïmopa.

¹⁴Mæmpo, bitö angainö ante botö tömënanï inänite godö apænebo ëñënanitapa. Botö inguipogaque nänï quëwencabo tönö adobo inämaï imo baï tömënanï edæ adobaï inguipogaque nänï quëwencabo tönö adodänï inämaï inänï adinque inguipogaque quëwënanï wæætë tömënanï inänite pïinänitapa. ¹⁵Mæmpo ëñëmi. Bitö botö ëmiñænänï inänite, Minitö inguipoga inïömö ayæ quëwënanämaï incæminimpa, ante ænte mäobi gocädänimpa, ante botö bitö ïmite apænedämaï ïmopa.

Wæætë, Wënæ awënë në wïwa cædongä inïömö tömënanï inänite, Oda cæcädänimpa, ante cæyongante bitö wææ aabi ate tömënanï wæætë oda cædämaï incädänimpa, ante bitö ïmite apænebo. ¹⁶Botö inguipogaque nänï quëwencabo tönö adobo inämaï imo baï tömënanï edæ adobaï inguipogaque nänï quëwencabo tönö adodänï inämaï inänipa. ¹⁷Bitö änö inïömö edæ näwangä ante impa. Ìninqe bitö godö cæbi ate näwangä bitö änö beyænque tömënanï inïömö tömëmi cædonque ante cædinque tæiyæ waëmö ewocate quëwënanï incädänimpa, ante bitö ïmite apænebo. ¹⁸Bitö botö imote inguipoga inïömö bitö da pönömi pömo baï botö adobaï tömënanï inänite inguipoga quëwënanï weca da godömo godänitapa. ¹⁹Tömënanï inïömö bitö cædonque ante cædinque tæiyæ waëmö ewocate quëwënanï incädänimpa, ante botö inïömö edæ bitö cædonque ante Ao äninque, Botö nämä incæ tömënanï beyæ ante wænguïmo ïmopa,” ante Itota apænecantapa.

²⁰“Mæmpo ëñëmi. Botö wïï botö ëmiñænänique beyæ ante bitö ïmite

apænebo. Wæætë tömënanï botö angainö ante apænedänï ëñente pönëninque wadänï në wede pönenguinänï inïönänite botö inänï beyæ ante adobaï bitö ïmite apænebo.

²¹Mæmpo, Bitö ïmite botö entawëmo imo baï ayæ botö bitö nempo quëwëmo imo baï mäninänï tömänänï adobaï äawocaque baï ewocate quëwëmainänipa, ante cæcæbiimpa, ante bitö ïmite apænebo. Ayæ inguipoga quëwënanï inïömö, Bitö botö imote da pönömi pongaïmo ïmopa, ante pönencädänimpa, ante cædinque bitö godö cæbi ate tömënanï mönatö nempo quëwencädänimpa, ante bitö ïmite apænebo. ²²Bitö pönö cæbi beyænque botö nãö baï entawëninque, Mönatö äawocaque baï ewocate quëwëmöna baï tömënanï adobaï äawocaque baï ewocate quëwencädänimpa, ante botö inïömö bitö pönönimämo botö nãö entawëmämo tömënanï inänite adopämo godömo ænte entawënanipa. ²³Tömënanï äawocaque baï ewocate quëwencädänimpa, ante tömënanï botö imote entawënanipa. Ayæ botö bitö ïmite entawëmo ïmopa. Tömënanï mänömaï äawocaque baï ewocädänï adinque inguipoga quëwënanï inïömö, Bitö botö imote në da pönömi pongaïmo ïmopa, ante ëñencädänimpa, ante apænebo. Ayæ botö imote waadete pönengaïmi ïmi baï bitö tömënanï inänite adobaï waadete pönengaïmi imipa, ante ëñencädänimpa, ante apænebo,” ante Mæmpocä ingante Itota apænecantapa.

²⁴Ayæ, “Mæmpo, Bitö pædæ pönömi botö në ængainänï inïömö botö nãö ëmömämo acädänimpa, ante botö, Tömënanï botö quëwëñömö adoyömö quëwencädänimpa, ante aïnente wæbopa. Wëñëñedë pönï inguipoga badönämaï inïedë bitö inïömö edæ botö imote waadete pönëninque botö nãö ëmömämo pönömi botö ængaimämo tömënanï adopämo acädänimpa, ante aïnente wæbopa. ²⁵Mæmpo në nö cædömi ïmi ëñëmi. Inguipogaque quëwënanï bitö

imate wīi adinque pönēnāmai īnāni incāte botō īñōmō edā bitō imite do ate pönēmo imopa. Botō ēmiñānāni īñōmō, Bitō botō imote da pönōmi nē pongaīmo imopa, ante do ēñēnānitapa. ²⁶Botō cæbo beyænque mānīnāni īñōmō, Bitō imite ate baī pönēnānitapa. Botō imote bitō waadete pönēnō ante adodō waadete pönēnō tōmēnāni mimōnē entawente quēwencædānimpa, ante ayæ, Tōmēnāni botō imote entawencædānimpa, ante botō ayæ cæbo beyænque tōmēnāni īñōmō, Bitō imite ate baī pönēnānitapa,” ante Itota Mæmpo ingante iinque apænecacāimpa.

Itota ingante bæi ongonte ænte godānīpa

(Māateo 26.47-56; Māadoco 14.43-50; Odoca 22.47-53)

18 ¹Wængonguī ingante iinque apænedinque Itota tōmengā ēmiñānāni tōnō wadæ godinque Quedodōō biyōnæ æmæ wedeca godānitapa. Æmæ wedeca odibowæncodē nāni ancodē ī iinque Itota tōmengā ēmiñānāni tōnō mānīncodē pō guidānitapa. ²Itota ingante nē odōmonguingā Codaa īñōmō Itota tōmengā ēmiñānāni tōnō mānīncodē wantæ īñō wantæ īñō gote ongōnāni iinque Itota ingante nē odōmonguingā Codaa īñōmō mānīncodē do adingā īngōgāimpa. ³Iinque tontadoidi adocaboque īnānite æninque Codaa īñōmō edā tāno beyænte adocodē pongantapa. Ayæ, Wængonguī quī, ante nē godōnāni ñænānāni tōnō Paditeoidi nāni wæx wānōnāni īnānite Codaa nempo godōnāni æningā inte tōmengā tōmēnāni īnānite tontadoidi tōnō ænte māmongā pōnānitapa. Pōninque tōmēnāni gonga tīcāinē næænte gongapæncade tīcāinē nææninque yaēmē næænte Codaa miñæ pōnānitapa. ⁴Itota nāmā ante, Æbānō bate wæquīmoo, ante tōmāā ēñēnongā inte awænē tao godinque tōmēnāni īnānite, —Æcānō ingante ante diqui diqui minte pōmīni.

⁵Ante āñongā tōmēnāni wæætē, —Itota Nāatadeta nē quēwēningā ingante āmōnīpa.

Ānāni ēñēninque, —Botō tōmēmo imopa, ante Itota apænecantapa.

Ayæ nē odōmonguingā Codaa īñōmō tōmēnāni weca a ongōnongāimpa. ⁶Itota īñōmō, “Botō tōmēmo imopa,” ante āñongā tōmēnāni gā godinque onguipoga tæ go wæænānitapa. ⁷Tæ go wæænāni adinque tōmengā adodō, —Æcānō ingante ante diqui diqui minte pōmīni.

Ante āñongā tōmēnāni wæætē, —Itota Nāatadeta quēwēningā ingante āmōnīpa.

⁸Ānāni ēñēninque Itota wæætē, —Botō tōmēmo imopa, ante do antabopa. Mīnitō īñōmō botō imote ante diqui diqui minte pōmīni baī mānīnāni īnānite bæi ongōnāmai iedāni.

⁹Itota Mæmpocā ingante do apænedinque, “Bitō edā pönōmi botō ængaināni īnānite wæx aabo beyæ adocanque inca wē womōnāmai īnānitapa,” ante nānō angainō baī ñōwo iinque bacæimpa, ante mānōmai angantapa. ¹⁰Timōnō Pegodo īñōmō nē yaēmē næængā inte pædæ guipote yaēmē æninque, Wængonguī quī, ante nē godongā ñænængā pōnī īnongā ingante nē cæcā ingante tæi pāninque tōmēmonca īnō wangō tamoncacantapa. Pegodo nānō nē wangō tamoncadingā emōwo Māadoco emongā īngōgāimpa.

¹¹Itota wæætē Pegodo ingante, —Bitō yaēmē adodō da wē, āninque, Botō wæwenguīmāmo ante botō Mæmpo pōnongā ænīmo inte wæwenguēnēmo imopa, angacāimpa.

Itota ingante bæi ongōninque Ānato weca ænte godāni

(Māateo 26.57-58; Māadoco 14.53-54; Odoca 22.54)

¹²Ayæ odōmāno tontadoidi tōnō tōmēnāni awēnē ayæ oodeoidi awēnēidi tōnō Itota ingante bæi ongōninque ænānitapa. Æninque tōmengā ingante

goto wimpote cädänitapa. ¹³Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængongui qui, ante nê godongä ñænængä pöni inongä mäni wadepo iñonte inongäimpa. ¹⁴Caiapato wëenëhedë oodeoidi awënëidi inänite iimaï ante nê änogä inongäimpa. Mönö waocabo beyæ ante adocanque onguifnængä wængä ininque waa imaimpa.

Pegodo incæ, Dicæ abogaa, angampa

(*Mäateo 26.69-70; Mäadoco 14.66-68; Odoca 22.55-57*)

¹⁵Itota nänö ëmiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö ëmiñængä iñömö, Wængongui qui, ante nê godongä ñænængä pöni nänö nê adingä inongäimpa. Ininque Itota tönö pöninge tömengä Wængongui ingante nê godongä ñænængä pöni inongä oncö yacömöñäa iñömö pö guicantapa. ¹⁶Pegodo guiquënë odemö yabæ inö a ongönongäimpa. Wacä Itota miñæ nê gocä iñömö, Wængongui qui, ante nê godongä ñænængä pöni inongä nänö nê adingä iñömö tömengä ocæ ëmænte pöninge baquecä odemö nê wææ aacä ingante apænecantapa. Pegodo ingante ämi guicæ, angä ëñëninge baquecä wi ænecä ate tömengä Pegodo ingante ænte manguicä guicantapa. ¹⁷Manguicä guiyongä baquecä odemö nê wææ aacä iñömö Pegodo ingante, —Bitö adobaï mäningä onguifnængä nänö nê ëmiñænömi imipa töö.

Äñongä tömengä wæætë,

—Botö wabo imopa, angantapa.

¹⁸Yoguite ingatimpa. Ayæ nê cädönäni tönö oodeoidi awënëidi wææ wänönäni gongapamö ootoqui, ante nani tadöni gäänë adiyæ ongonte ootodönänimpa. Pegodo adobaï tömënanäni tönö godongämæ adiyæ ongonte ootocantapa.

Nê godongä ñænængä Itota ingante angampa

(*Mäateo 26.59-66; Mäadoco 14.55-64; Odoca 22.66-71*)

¹⁹Mäniñedë Änato iñömö, Wængongui qui, ante nê godongä ñænængä pöni

iñömö Itota ingante, Bitö nê ëmiñænäni diyæ, änogäimpa. Ayæ Itota nänö odömönte apænëgainö ante, Æbänö i, ante tömengä ingante adobaï angantapa. ²⁰Itota wæætë,

—Wadöni ëñëñönänite botö edonque pöni apænëbo ëñëñänitapa. Botö cöwë minitö odömöincönë incæ Wængongui oncö ñænëncönë incæ oodeoidi tömänäni nani pöincönë pö guidinque odömönte apænëbo ëñëñänitapa. Botö cöwë awëmö apænëdämaï intabopa. ²¹Bitö botö imote, Æbänö i, ante quänante ämi. Botö imote nê ëñëñänäni inänite ämi ëñente apænëdäni ëñëncæbiimpa. Edæ mäniñäni ædæmö ëñëñäni inänipa.

²²Mänömaïnö angä ëñëninge wææ wänongä adocanque iñömö Itota gäänë ongöninge tömengä ingante tæi tamöninge apænecä,

—Wængongui qui, ante nê godongä ñænængä pöni inongä ingante ædö cæte mänömaï ante wæætë änewëë töö.

²³Ante äñongä Itota wæætë,

—Botö wënæ wënæ änimö imo baï bitö botö wënæ wënæ äninö ante, Æbänö i, ante apænëbi ëñëmoe. Wæætë edæ näwangä ante apænëbo ininque bitö quänante botö imote tæi tamömipæä, angantapa.

²⁴Ayæ, Wængongui qui, ante nê godongä ñænængä pöni Caiapato weca gocæcäimpa, ante Änato iñömö Itota ingante ayæ goto wimpoingä iñongante angä ëñëninge tömengä ingante ænte gogadänimpa.

Pegodo incæ, Dicæ abogaa, wæætë angampa

(*Mäateo 26.71-75; Mäadoco 14.69-72; Odoca 22.58-62*)

²⁵Timönö Pegodo ayæ adiyæ ootoyongante wadäni,

—Bitö tömengä ëmiñænömi adobaï imipa töö.

Änäni ëñëninge tömengä,

—Wabo imopa, angantapa.

²⁶Wængongui qui, ante nê godongä ñænængä pöni inongä ingante nê cädäni

iñönänite adocanque iñömö Pegodo nänö në wangö tamoncadingä guiidengä inongäimpa. Tömengä iñömö Pegodo ingante,

—Bitö tömengä miñäe odibowæncodë ongöñedë bitö ïmi atabopa. Bitö wii imitawo.

²⁷Ante añongä Pegodo wæætë, Wabo imopa, ante tæcæ änewëñongä tawadiya dobæ pegatimpa.

Pidato weca Itota ongonä

(*Mäateo 27.1-2; Mäadoco 15.1-5; Odoca 23.1-5*)

²⁸Tæcæ ñäö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awënë Pidato weca ænte gocäimpa, ante cædinque awënë oncö boyæ mäodäni gocantapa. Incæte tömënäni dodäni nani wææ angainö beyæ ante guiñente wædinque, Pidato oncönë guiiite bai mönitö mimö wentamö ewocamöni incædömönimpa. Ìñæmpa mänömai cæmöni ininque mönitö Patowa mönö ææmæ cæyedë cængui ædö cæte cænguimöni, ante wædinque guidämai inänitapa.

²⁹Ininque Pidato tömënäni weca oncö boyæ taodisque tömënäni inänite, —Ìngä onguifængä iñömö quinö wënæ wënæ cæcantawo.

³⁰Åñongä tömënäni wæætë, —Mäningä wii wënæ wënæ cæcä inte bai mönitö tömengä ingante wii ænte nämö pædæ godömöni æncædömiimpa.

³¹Änani ëñëninque Pidato, —Minitö tömëmini tömengä ingante ænte godinque mini wææ yewæmongainö bai ante cædinque, Tömengä ingante pangäimpa, ante apænte æedäni.

Åñongä oodeoidi awënëidi, —Ìñæmpa minitö wææ ämini iñömini mönitö cöwë tacamöni wænäni möni cægainö bai ædö cæte æcämenque ingante wænömöni wænguingä, ante wædänitapa.

³²Odömänoidi mäniñedë wënæ wënæ cædäni inänite awäa töö godömænte

timpodinque wææ tiwadinque godö wænönäni inönänimpa. Ininque odömänoidi inänite pædæ godöninque oodeoidi wæætë Itota, Æbänö cædäni wænguimoo, ante do nänö angainö bai ñöwo iinque baquinque cædänitapa.

³³Mäninö änäni ëñëninque Pidato wæætë oncönë ñænæncönë guiidinque Itota ingante añecä pongä adinque, Pidato,

—Bitö oodeoidi Awënë Odeyebi imitawo.

³⁴Angä ëñente Itota wæætë, —Bitö nämä pönëninque apænebitawo. Wabänö wacä botö imotedö ante bitö imite apæneçä ëñëmitawo.

³⁵Ante añongä Pidato, —Botö dicæ oodeobo imogaa. Tömëmi guiidënäni tönö Wængongui qui, ante në godönäni ñænænäni iñömö bitö imite mämö pædæ pönönäni æntabopa töö. Bitö quinö wënæ wënæ cæbitawo.

³⁶Åñongante Itota wæætë apænedinque, —Wii inguipoga quëwënäni änäni beyæ botö Awënë Odeyebö në ingaimo imopa. Botö inguipoga quëwënäni Awënë Odeyebö inte në ämo imo bai botö nempo quëwënäni iñömö botö imote, Bæi ongonte ænte godämai incædänimpa, ante wææ cædinque oodeoidi tönö guëa wæatedö wæætë cæcædönänimpa. Incæte wii inguipoga quëwënäni änäni beyæ wæætë edæ wayömö quëwengaimo inte botö tömëmo nämä incæ Awënë Odeyebö në ingaimo imopa.

³⁷Mänömainö ante Itota apæneçä ininque Pidato,

—Ìñæmpa Awënë Odeyebi bitö imitawo.

Åñongante Itota wæætë, —Bitö tömëmi änö bai botö Awënë Odeyebö inömoimpa. Näwangä ämipa. Botö iñömö Wængongui nänö angainö ante, Näwangä impa, ante inguipoga quëwënäni inänite apæneçæte ante edæ mäni beyænque ante inguipoga iñömö pö ëñagaimo imopa. Wængongui näwangä ante nänö angainö ante Ao

ante eñente nē cædāni iñōmō edæ
tömēnāni tōmānāni botō imote nē
ēñēnāni inānīpa, angantapa.

³⁸ Æñongante Pidato,
—Æcāmē nāwangā angāā, angacāimpa.

Itota wæncæcāimpa, ānānīpa

(Māateo 27.15-31; Māadoco
15.6-20; Odoca 23.13-25)

Pidato mānōmaī apænedinque wæætē
oodeoidi weca oncō boyæ taodínque
apæñecantapa.

—Īngā quīnō wēnæ wēnæ cæcā
ingampa, ante ēñēnāmaī imopa. Īnīnque
botō dicæ tōmengā ingante apænte
anguīmo imogaa. ³⁹Wadepo iñō wadepo
iñō Patowa mīni ææmæ cæōnæ mīnitō,
Ædānidō tee mōnete ongōnānīi, ante
pōnēnīnque adocanque ēmōwo ante
botō imote apænedínque, Īngā ingante
ñimpo cæbi goquingā, ante cōwē
āmīnīpa. Īnīnque adocanque ingante,
Īngā iñōmō mīni apænedongā ingampa,
ante botō tōmengā ingante ñimpo cæbo
ate ænte gomīni inōmīnīpa. Īnīnque
ñōwo diyæ. Mīnitō, Oodeomōni Odeye
iñongante pōnō ñimpo cæbi abæ
tawænte goguīnga, āmīnitawo.

⁴⁰ Æñongante tōmēnāni yedæ tededínque,
—Māningā ingante dicæ āmōniyaa.

Wæætē Badabato ingante ñimpo cæbi
gocæe, ante tedewengadānīpa.

Badabato wēñēñedē wadāni tōnō,
Odōmāno tæiyæ awēnē ingante wido
cæcæimpa, ante cædingā inongāimpa.

19 ¹ Ayæ Pidato angā ate Itota
ingante bæi ongonte māo
æmontaiya tæi tæi pānānīpa.

² Tontadoidi daa mongæmenca ænīnque
que que cædínque, Awēnē poganta,
ante pōnō da wencadānīpa. Awēnē
weocoo wēñacæbiimpa, ante badete
tote baī cædínque Itota ingante opatawæ
ēmoncoo pōnō daga wēñadānīpa.

³ Daga wēñadínque tōmēnāni wæætē
wæætē tōmengā weca ponte ānīnque,
—Badogaa, bitō oodeo awēnē odeyebi
imipææ.

Ante badete todínque tōmengā ingante
tæi tamōnānīpa.

⁴ Pidato tōmēnāni weca oncō boyæ
adopoque ayæ tadinque oodeoidi inānīte
apænedínque,

—Īngā iñōmō æbānō cæcantawo,
ante eñencæte ante cæbo ate tōmengā
wēnæ wēnæ nānō cædō ante dicæ
abogaa. Mīnitō mānōmāinō ante
ēñencāmīnīpa, ante botō tōmengā
ingante mīnitō weca ænte mantabo tacā
aedāni, angantapa.

⁵ Itota daa mongæmenca poganta
encadínque opatawæ ēmoncoo
mongænte tayongā Pidato tōmēnāni
inānīte,

—Īngā onguīñængā ongongā aedāni.

⁶ Tōmengā ingante adínque,
Wængonguī quī, ante nē godōnāni
ñænænāni tōnō adodāni inānīte nē wææ
wānōnāni iñōmō yedæ tedewēnīnque,
—Awæ ñænquedīmæ cæte āmi
wænōnāni wængæe. Āmi wænōnāni
wængæe.

Ante ancaa ānewēnāni ēñēnīnque
Pidato wæætē,

—Mīnitō iñæmpa tōmengā ingante
ænīnque awæ ñænquedīmæ cæte
wænōmīni wængæe. Botō guiquēnē
iñgā wēnæ wēnæ nānō cædō ante dicæ
abogaa.

⁷ Pidato āñongā oodeoidi wæætē iīmaī
tedewēnānīpa.

—Mōnitō wææ yewæmongainō ante
ēñente quēwēmōni imōnīpa. Īngā
iñōmō edæ nāmā ante edæ, Wængonguī
Wēmo inōmo imopa, ante cædínque
edæ mānīnō mōni wææ yewæmongainō
ante ēñēnāmaī cæcampa. Mānōmaī
ēñēnāmaī inte cæcā beyæ tōmengā nē
wænguēnengā ingampa.

⁸ Mānōmāinō ānāni ēñēnīnque Pidato
godōmenque guīñente wædínque,

⁹ oncōnē ñænæncōnē adodō pō
guīdínque Itota ingante,

—Bitō ædōnō quēwente pōmi imīi.

Ante āñongā Itota guiquēnē pæ
wēñecā. ¹⁰ Adínque Pidato tōmengā
ingante,

—Bitō quīnante botō imo tededāmaī
imīi. Botō nāmā nē tæi piñænte āmo
inōmo inte āmo inīnque ñimpo cædāni

gobaïmipa. Botö wadö ante ämo ïninqe bitö ïmite do awæ ñænquedïmæ cæte wænönäni wæmaïmipa, ante ëñënamai ïmitawo.

¹¹ Äñongante Itota wæætë,

—Wængonguï bitö tæï piñænte ämamo ante godönamaï ingä bai bitö tömëmi tæï ämi ïmi diyæ botö ïmote anguïmiyaa. Mänömai beyæ bitö ïmite, Wænömi wæncæcäïmpa, ante botö ïmote nê pædæ pönöningä ïñömö edæ godömenque wænæ wænæ cæcä ingampa, ante apænecantapa.

¹² Mänömainö angä ëñëninque Pidato, Æbänö ñïmpo cæbo goquingä, ante cædongäïmpa. Cæyongä oodeoidi wæætë godömenque yedæ änönänïmpa,

—Bitö mäningä ingante ñïmpo cæbi bai bitö odömäno tæiyæ awënë Tetædo æmigo dicæ ïmiyaa. Æcämenque ïñömö edæ, Botö awënë ïnömoïmpa, ante nê angä inte tömengä ïñömö Tetædo ingante nê piñongä ingampa.

¹³ Mäninö änanï ëñëninque Pidato ïñömö, Itota ingante ænte tao godinque awënë nänö apænte äïmpaa gote tæ contacantapa. Pidato nänö tæ contayömö ïñömö, Dicacoo ayadi bai nänï caayömö ïmpa, ante nänï äñömö ïninqe ebedeo tededö, Gabata, nänï äñömö ïnönïmpa. ¹⁴ Patowa nänï ææmæ cæyedë ïnque bayö oodeoidi, ïimö ate guëmanguïönæ inguïmpa, ante mönö ñöwoönæque cæcäïmpa, ante nänï cæönæ ïnönïmpa. ïñönæ wodo tæcæ bæcä bayonte Pidato oodeoidi ïnänite, —Ïngä ïñömö mïnitö Odeye ïnongä ingampa.

¹⁵ Äñongante yedæ äninque tömënäni,

—Tömengä ingante wænömi wængæ. Tömengä ingante wænömi wængæ. Awäa timpote ämi wænönäni wængæ.

Ante ancaa änewëñönäni Pidato wæætë, —Botö ïñömö mïnitö Odeye ïñongante awäa timpote ämo wænönäni wængæ, ante änewëmïnitawo.

Angä ëñëninque Wængonguï quï, ante godönäni ñænænäni ïñömö,

—Tetædoque ïncæ mönitö awënë odeye ïnongä apa cæbii, änewëñönänïmpa.

¹⁶ Ancaa änewëñönäni Pidato, Awäa ämo timpote wænömini wængædäni, ante Itota ingante tontadoidi ïnänite pædæ godongä ængadänïmpa. Ayæ tömënäni Itota ingante ænte gogadänïmpa.

Itota ingante awäa timpodäni wængäïmpa

(*Mäateo 27.32-44; Mäadoco 15.21-32; Odoca 23.26-43*)

¹⁷ Itota ïncæ tömengä timpoquiwæ æninque mongænte taodinque “Ocatäinö” mönö äñömö pongantapa. Mänïñömö ante ebedeo tededö, Godogota, nänï äñömö ïmpa. ¹⁸ Mänïñömö pönongante tömënäni awæ ñænquedïmæ cædinque tömengä ingante töö godonte timpodinque wææ tiwadinque ængæ gantidënäni ongongantapa. Ayæ wada ïnate tömengä weca æmatæ ïnö æmatæ ïnö mämö adobaï cæte ængæ gantidënäni wægöñöna Itota tæcæguedë wægongä ingantapa. ¹⁹ Pidato angä yewæmöinta, Nänï ëñguinta, ante yewæmonte æninque ñænquedïmæ iwäa wo cædänitapa. “Itota Näatadeta quëwëningä oodeoidi Awënë Odeye ïnongä ingampa,” ante yewæmonte wo cæte ongongatimpa. ²⁰ Itota ingante nänï timpodïñömö eyequei ï ïninqe oodeoidi nanguï ïnänï tömënäni nänï quëwëñömö ta pöninque Pidatoidi nänï yewæmöninta adänitapa. Mäninta ïñömö ebedeo tededö datïi tededö guidiego tededö ante yewæmonte ingatimpa. ²¹ Oodeoidi beyæ ante, Wængonguï quï, ante nê godönäni ñænænäni ïñömö Pidato weca godinque tömengä ingante,

—Bitö, “Oodeoidi Awënë Odeye ïnongampa,” ante yewæmönämaï inguënë quëwë. Wæætë tömengä nämä nänö angainö bai, “Botö oodeoidi Awënë Odeyebo ïnömoïmpa, ante nê änewëningä ingampa,” ante yewæmöe.

²² Ante änewëñönäni Pidato wæætë, —Botö yewæmöninö ante yewæmönimo inte botö wæætë wadö ante yewæmönämaï ïncæboïmpa.

²³Tontadoidi iñömö tömengä ingante awäa timpote ængæ gantidënanäi wægöñongä tömënanäi tömengä weocoo ini æninqe mencooga go mencooga cönöninge adocanque adocooque adocanque adocooque æninqe tömänäni ænönänimpa. Tāno mongæincoo guiquëñë ayæ õñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa. ²⁴Adocooque wänä ñænämaï ingæimpa, ante adodäni godongämæ tedinque,

—Æcänö quınca nò ta adinque tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iïmaï ante nāni yewæmongainö bai ñöwo iinque baquinque tontadoidi mänömaï cædänitapa. “Edæ botö weocoo ini ö æninqe tömënanäi nāni caboque wacä ingä wacä ingä nënempodänitapa. Ayæ, Æcänö quınca nò ta adinque tömengä mänincoo æncæcäimpa, ante wææntodöninque ænänitapa,” ante nāni yewæmongainö bai tontadoidi ñöwo cædänitapa.

²⁵Itota ingä nāni ængæ gantidëñömö tömengä wäänä tönö wäänä tönñacä nāna caya ayæ Codeopato nänöogængä Mäadiya tönö wacä Mäadiya Mäagadadëñä mänñömö pöninque eyequei a ongönänitapa. ²⁶Itota iñömö tömengä wäänä inante acantapa. Ayæ botö tömengä miñæ nē godimo iñömö tömengä nänö nē waadebo inömo inte tömëñä weca ongömo adinque Itota tömengä wäänä inante,

—Badä ëñëmi. Mäningä iñömö minö wengä bacæcäimpa.

²⁷Äninqe tömengä ëmiñænimo iñömote,

—Botö ëmiñænimi ëñëmi, Mäninä iñömö botö badä incæ bitö badä bacædäimpa, angacäimpa.

Iñinque botö Itota nänö nē ëmiñænimo inte tömengä nänö änöñedë tāno ænte mämömo pöninque tömengä wäänä iñömö botö oncönë cöwë owodönäimpa.

Itota incæ wængäimpa

(Mäateo 27.45-56; Mäadoco 15.33-41; Odoca 23.44-49)

²⁸Quinö bacæimpa, ante ñöwo iinque batimpa, ante nē ëñëñongä inte Itota iñömö edæ, Wængongui angä ëñente nāni yewæmongainö bai ñöwo iinque bacæimpa, ante cædinque,

—Botö gæwænte awædö, ante apænecantapa.

²⁹Adoyömö biinömæ nāni ämä bai wædænque godonte nāni ænimæ owætadë engate ongö adinque tömënanäi dayömö bai æninqe mänimænë pædæ guidonte aa beyonte wëä tadonte æninqe iitopowænca nāni äwænca ongontoca goto wencadodinqe Itota önöne pædæ æænö pæ mänänitapa.

³⁰Pæ mäñönäni Itota oo guëmante bedinque,

—Ñöwo iinque batimpa.

Ante apænedinque tömengä ocabo ædæ wææncadinque tömengä önöwoca wadæ goyöwoca do wængäimpa.

Itota betagonta inö

tontado boo täñongä

³¹Iimö ate, Mönö guëmanguionæ iñömö Patowa inguiönæ beyæ godömenque waa ëönæpa, ante oodeoidi, Nöwoönæque cæcäimpa, ante nāni cæönæ inimpa. Oodeoidi awëñëidi, Awäa nē ongönäni baö mäniwäa guëmanguionæ ongönämaï incædänimpa, ante Pidato weca godinque tömengä ingante, Iñäni nāni timpodiwäa nē ongönäni quingæ wæncædänimpa, ante cædinque bitö tömënanäi önömënë bamë ämi wadäni taa mäñänäni do wæncædänimpa. Ayæ tömënanäi baö o togænte pædæ wæænonte ämi æñänie, änänitapa. ³²Mänñi beyæ tontadoidi pöninque Itota weca tāno nāni nē ængæ gantidëningä önömënë bamë taa mäñinque edæ ayæ nāni nē timpodingä wægongä önömënë bamë taa mäñänitapa. ³³Taa mäñinque Itota weca pöninque tömengä do wængäi adinque tömengä önömënë taa mäñämaï inönänimpa.

³⁴Wæætē tontado adocanque Itota betagonta inō boo tæñōñongā wepæ tönō æpæ guī gotimpa. ³⁵Botō mäninō bayonte nē adimo inte, Æbänō nāwangā batimpa, ante nō apænebopa. Ayæ, Botō änō ante nāwangā impa, ante do ëñēmopa. Minitō adobaī ëñente pōnencæminimpa, ante apænebopa. ³⁶Edæ, “Tömengā bamē adomenque incæ taa mænte wædāmaī incæcäimpa,” ante Wængonguī angā ëñente nāni yewæmongainō baī bacæimpa, ante mänōmaī batimpa. ³⁷Ayæ edæ, “Waodāni nāni nē boo tæñōñongā ingante aquināni inānipa,” ante Wængonguī angā ëñente wataa nāni yewæmongainō baī iinque bacæimpa, ante mänōmaī batimpa.

Itota wodi baō inī māo daga wēnānipa

(Māateo 27.57-61; Māadoco 15.42-47; Odoca 23.50-56)

³⁸Ayæ ate Adimatea quēwengā Ootee iñōmō oodeoidi awēñēdi inānite guīñente awædō, ante awēmō Itota ëmiñæningā inongäimpa. Tömengā iñōmō Pidato Awēñē ingante, Itota wodi baō pōnōmi ænte wēmoe, angantapa. Pidato Ao angā ëñēninqe Ootee do pōninqe Itota wodi baō timpodiwāa ongōñongante o togænte pædæ wæænonte ængantapa. ³⁹Ayæ Niicodemō wēñēñedē Itota weca woyowotæ ëñacæ nē pōningā iñōmō Ootee miñæ pongantapa. Tömengā miīdamō nāni änōmō nanguī tī nāmō tönō aadoemō nāni änōmō nanguī oguī wamō tönō adoyōmō nāni wempo cædimō todēinta quido ganca ænte pongantapa. ⁴⁰Ootee tönō Niicodemō iñōmō Itota wodi baō æninqe niñocoo nāni ancoo guiancoo incæ doyæncoo mänincoo oguī wamō nāna ænte pōnimō ænte wāne cædedatapa. Ayæ oodeoidi daga wencæte ante nāni cægāi baī adobaī cædinque tōmēna nāna wāne cædincoo inte tōmengā baō wīni wīni cægadairopa. ⁴¹Itota ingante nāni timpodifñōmō eyequeī gōnea inimpa.

Adodea iñōmō miintatodē nāni ææ wodiñōmō ònontatoque inimpa. ⁴²Iimō ate guēmanguiōnæ inguimpā, ante oodeoidi, Ñōwoonæque cæcæimpa, ante nāni cæönæ impa, ante beyæ, Ontato eyequeī impa, ante tōmēnāni Itota wodi baō miñōmō daga wengadānimpā.

Itota nē wæningā incæ nāni òmæmonte quēwengā
(Māateo 28.1-10; Māadoco 16.1-8; Odoca 24.1-12)

20 ¹Oodeoidi guēmanguiōnæ Tabado go ate mönō Dominco tæcæ ooque pōnente bayedē Māadiya Māagadadēnā Itota wodido ponte ayongā dicabo ontato tee mönocæte ante nāni da pæñæninca incæ do wēā godō concæī intapa. ²Botō Itota nānō nē waadedimō tönō Timönō Pegodo iñōmō Itota miñæ möna nē godincaya iñōmōnate Māadiya Māagadadēnā wæætē, Mänōmaī impa, ante adinque mönatō weca pogodo ponte apænecantapa,

—Awēñē Itota wodi baō ontatodē òñōñongante ænte taodinqe ædōnō māo nō cædānii, ante ëñēnāmaī imōnipa.

³Ante apæneyongā Pegodo tönō botō Itota miñæ möna nē godincaya iñōmō tōmengā wodido quingæ gote pogodo pontamōnāpa. ⁴Guæa pogodo gomōna incæte tōmengā ëmiñænimo botonque quingæ tōmengā wodido tāno pontabopa. Pegodo ayæ pongantapa. ⁵Māniñōmō tāno pōninqe ædæ wæante guite ayōmo iñāna nāna wīni caadincooque òñō abo incæte guidāmaī intabopa. ⁶Timönō Pegodo botō miñæ ayæ nē pōningā Itota wodido ontatodē ponte wāñē guicantapa. Wāñē guiiyongante doyæncooque iñāna nāna wīni caadincooque māniñōmō òñō acantapa. ⁷Ayæ Itota wodi ocabo nāna nāni cæcadincoo adobaī òñō acantapa. Mänincoo doyæncoo tönō wīi adoyōmō niñonte intapa. Wæætē iincoo nāā wēnente nāñēñē nō cæte òñō acantapa. ⁸Ininqe botō tōmengā wodido ontatodē tāno nē pōnimo incæte nōwo tæcæ adobaī wāñē guiiitabopa.

Guiite ayömo, Itota nänö öñöñiñömö æbänö í, ante adinque, Tömengä ñäni ömæmonte quëwengä ingampa, ante pönentabopa. ⁹Edæ Wængongui angä ëñente yewæmöninque dodäni, Mönö Codito iñömö do wæningä incæ ñäni ömæmonte quëwenguënegä incæcäimpa, ante mönatö mäniñedë ayæ ëñënamäi inömonaimpa. ¹⁰Ayæ mönatö tömengä miñä nê godimöna iñömö wadæ godinque tömëmöna oncönö ocæ ëmænte gotamónapa.

**Itota iñömö Mäadiya Mäagadadëna
weca pongä**

(Mäadoco 16.9-11)

¹¹Mäadiya guiquëñë Itota wodido ontatodë yabæ inö a ongonte wædongäimpa. Mänömaï wædinque tömengä, Abote, ante ædæ wæante guiite ¹²adinque Wængongui anquedoda näämæntacoo mongæna inte Itota wodi baö öñöñiñömö tæ contada ina acantapa. Adocanque Itota wodi ocabo öñöñiñömö tæ contayongä wacä Itota wodi önöwa öñöñiñömö tæ contate ongongä acantapa. ¹³Tömëna iñömö tömengä ingante,

—Onquiyæmi, minö quinante wæmintawo.

Äna ëñëninque tömengä wæætë,

—Botö Awënë wodi baö ini ö ænte godäni awædö. Ædönö mäo ñö cädäni, ante ëñënamäi wæbopa.

¹⁴Mäninö äninque Mäadiya dadi ëmænte ayongä Itota mäniñömö a ongongä adinque Itota incæcä tömengä ëñënamäi ingantapa. ¹⁵Itota iñömö,

Minö quinante wæmintawo. Æcänö ingante ante diqui diqui mimintawo.

Ante angä ëñëninque Mäadiya, ïingä iñömö wabänö gönea ömæ wite nê aacä ingampa, ante önöwënenque pönëninque,

—Ëñëmi, bitö tömengä wodi baö ini wayömo ænte mäobi inte bai ædönö gote ñö cæbitapa, ante apænebi ëñëmoe. Apænebi ëñëninque botö tömengä wodi baö do gote æmaïmopa.

¹⁶Äñongante Itota tömengä ingante,

—Mäadiya, angantapa.

Angä ëñëninque tömengä weca dadi ëmænte ebedeo tededö äninque,

—Adaböni, angantapa. Mäninö mönö tededö, “Awënë nê Odömömi imi,” ante impa.

¹⁷Itota iñömö,

—Edæ botö ayæ botö Mæmpo weca ocæ ëmænte godämaï imopa, ante adinque minö botö imo pæ mänämaï iedä, angantapa. Wæætë minö botö töninädäni weca godinque tömëñäni inänite iïmaï apænebi ëñencädänimpa. Botö ñöwo botö Mæmpo weca ocæ ëmænte goquimo imopa. Tömengä iñömö minitö Mæmpo adobai inongampa. Botö ñöwo botö Wængongui weca ocæ ëmænte goquimo imopa. Tömengä iñömö minitö Wængongui adobai inongampa, angantapa.

¹⁸Itota angä ate Mäadiya Mäagadadëna iñömö Itota nänö nê ëmiñäñinäni weca pöninque, Awënë Itota ingante atabopa, äninque, Tömengä iïmaïñö ante apænebi ëñëntabopa, ante tömëñäni inänite mäo apænegacäimpa.

**Itota iñömö tömengä ëmiñäñinäni
weca pongä**

*(Mäateo 28.16-20; Mäadoco
16.14-18; Odoco 24.36-49)*

¹⁹Guëmanguïönæ go ate iïmö ate wëmö bayö tömengä ëmiñäñinäni adoyömö pöninque, Oodeoidi awënëidi inänite ancai guñente awædö, ante odemö tee mönete ongönänitapa. Itota tömëñäni weca pö guiite tæcæguedë a ongöninque,

—Guñënamäi inte gänë pönencæminimpa, angantapa.

²⁰Mäninö angä ate tömengä önompö odömöninque tömengä betagonta odömongä adänitapa. Äninque mönö Awënë ingante adinque tömengä ëmiñäñinäni nanguï watapæ todänitapa.

²¹Itota wæætë adodö,

—Guñënamäi inte gänë pönencæminimpa, angantapa. Botö Mæmpo iñömö botö imote nänö da

pönongaïmo ïmo bai botö adobai mïnitö ïminite da godömo goquïmïni ïminipa.

²²Ante apænedinque tömënäni baonga woo öongate apæneçä,

—Botö nõwo pönï mïnitonga Wængonguï Tæiyæ Waëmö Önöwoca ingante pönö pönömo æedäni. ²³Në wënæ wënæ cæcä ingante adinque mïnitö tömengä ingante godö ñimpo cæmïni ïinque Wængonguï adobai tömengä ingante godö ñimpo cæcä quëwëmaingampa. Mïnitö wæætë në wënæ wënæ cæcä ingante godö ñimpo cædämaï ïmïni ïinque Wængonguï adobai cædämaï inte tömengä ingante pönö ñimpo cædämaï ïmaingampa.

**Itota ñäni ömæmonte në
quëwengä ingante Tömato acä**

²⁴Itota ëmïñænïnäni adoyömö a ongöñönäni tömengä pö guïite tömënäni weca tæcæguedë a ongöñongä tömengä ëmïñæningä adocanque Tömato mëwoga ëmongä Äancadënaque ïñömö dæ angampa. ²⁵Ayæ ate Itota nänö në ëmïñænïnäni wadäni ïñömö,
—Mönö Awënë ingante atamönipa, ante Tömato ingante apænedäni ëñëninque tömengä wæætë,

Botö ïñömö tömengä önönempo näni daagö timpodïñömö, Æyömönö empocä, ante adinque önongompoca gampodinque ayæ tömengä betagonta ïnö näni tapa tænonthe codïñömö botö tömëmo önongompoca gampote ate pönëmaï wædö, angantapa.

²⁶Wacä tëmäna go ate Itota ëmïñænïnäni wæætë oncönë adoyömö pö guïite a ongöñönäni Tömato tömënäni tönö godongämæ pö guïite a ongongantapa. Odemö tee mönete ongö incæte Itota ïñontobæ pö guïite tömënäni weca tæcæguedë a ongöñinque,

—Guïñënamäi inte gänë pönencæminimpa, angantapa.

²⁷Ayæ Tömato ingante,
—Bitö tömëmi önongompoca pædæ pompodinque botö önompö ae. Pædæ guïipote botö betagonta ïnö gampöe.

Ayæ, Wabänö incædö, ante änämaï incæbiimpa. Wæætë pönëe.

²⁸Ante äñongä Tömato,
—Botö Awënë ïnömi ïmipa. Ayæ adobai botö Wængonguï ïnömi ïmipa, angantapa.

²⁹Ayæ Itota tömengä ingante,
—Botö ïmote ate pönëmi ïmipa. Wæætë në adämaï ïnäni incæ botö ïmote pönënäni ïinque tömënäni nänï toquinque ingæimpa, angacäimpa.

**Wäo nänö yewæmongainta
quïnante yewæmongacäi**

³⁰Tömengä ëmïñænïnäni weca Itota, Ëñencædänimpa, ante wadö wadö cædinque tömengä nänö bamönengæ ayæ godömenque nanguï pönï cægacäimpa. Botö ïñömö ïntaa yewæmöninque mäninö tömengä nänö cægainö ante wïi tömäa yewæmontabopa. ³¹Wæætë mäninö ante yewæmöninque botö, Itota mönö Codito ïnongäimpa, ante ayæ, Tömengä Wængonguï Wengä ïnongä ingampa, ante mïnitö pönencæminimpa, ante yewæmontabopa. Ede tömengä ëmöwo beyænque mïnitö mänömainö ante pönëninque cöwë wænämaï quëwencæminimpa, ante botö ïnta yewæmömopa.

**Itota tömengä ëmïñænïnäni
7 ganca ïnäni weca pongä**

21 ¹Ayæ ate tömengä ëmïñænïnäni Tibediapæ näni ämä yæwedeca ëmönaiboga ongöñönäni Itota ïñömö tömënäni weca pöninque a ongongä adänitapa. Ede ïimaï batimpa. ²Timönö Pegodo adocanque, Tömato Äancadënaque nänï äñongä tönö Gadideabæ Cänaa në quëwengä Näatänaedo mënaa, Tebedeo wëna nänä caya mënaa, ayæ Itota nänö në ëmïñænïna wada mënaa mänimpodäni adoyömö ongönönänimpa. ³Timönö Pegodo ïñömö tömengä tönö ongönäni ïñänite,

—Botö nõwo gæyæ dadoncæ tao gobopa.

Angä ëñëninque tömënäni ïñömö,

—Bitō miñä gocæmönimpa.

Äninqe, Ægodödäni gomoppa,
ante tao godinque wipodē godongämæ
guiddinque tömäa woyowotæ gæyæ
dadoncæ cædäni incæte gæyæ dæ
ænämaï inönänimpa. ⁴Näo bayonte Itota
iñömö emönaiya yæwedeca a ongongä
adinque, Itota ingampa, ante tömengä
emiñæniniñäni incæ eñenämaï inänitapa.
⁵Ayæ tömengä tömënäni inänite yedæ
aa pedinque,

—Iñänäni, gæyæ æmïnitawo.

Äñongante,

—Änämaï imönipa.

⁶Änäni eñëninque tömengä wæætē,

—Mïnitō dicamonca wipo tömëmæ inö
æpænē wo guitodonte gæyæ dadonte
æedäni.

Tömengä nänö ämaï cædinque
tömënäni nangui pönï gæyæ dicamonca
date owo adinque ædö cæte dicamonca
wëä pönonte ænguiniñäni. ⁷Itota
emiñænimo tömengä nänö nē waadebo
inömo inte botō Pegodo ingante
apænedinque,

—Iñgä iñömö mönō Awënë Itota
ingampa.

Ämo eñëninque Timönō Pegodo
iñömö tömengä yabæcoo nänö gä
tadongate cönönincoo æninque daga
wëñate æpænē to go ti wææninque
ömaa taocantapa. ⁸Wädäni Itota nänö
nē emiñæniniñäni iñömö yæwedeca obo
pönï tiëe mëetodo ganca bai iñömö
wäi wocædäni ininque wipodē ayæ
owodäni iñömö Pegodo miñä wogaa
godinque dicamö gæyæ eyede pönï wëä
pönö pönänitapa. ⁹Tömënäni wipodē
inte pædæ æænoncado ponte ayönäni,
Æængongi, ante gonga emöñömö gæyæ
öñö adinque adoyömö wædænque pæo
cö cæte öñö adänitapa. ¹⁰Itota tömënäni
inänite,

—Gæyæ miñi ñowo æni wædænque
ænte pödäni.

¹¹Angä eñëninque Timönō Pegodo
wipodē pö guiddinque dicamö ænte
emönaiya wëä tadongantapa. Edæ
tiento tincoenta i todee ganca inäni
mänimpodäni gæyæ ñæñængade dicamö

iñömö eyede owodäni incæte dicamö
wangö tēmönämaï inimpa. ¹²Itota iñömö
tömënäni inänite,

—Pö cæedäni,

Äñongante tömengä emiñæniniñäni
tömänäni, Mönö Awënë Itota ingampa,
ante eñëninque, Æbidö imii, ante
tömengä ingante ædö cæte anguiniñäni.
¹³Itota gongapamö iñömö pöninque pæo
ænte tömënäni inänite pædæ godongä
ænäni ininque tömengä ayæ gæyæ
öñö æninque tömënäni inänite pædæ
godongä cænänitapa.

¹⁴Mänömaï cædinque Itota do
wæningä incæ ñäni ömæmonte quëwente
mempoga do ponte a ongöningä inte
ñowo tömengä emiñæniniñäni weca
mempoga go adopoque pongacäimpa.

Timönö Pegodo ingante Itota apænecä

¹⁵Tömënäni iinque cænäni ate Itota
iñömö Timönö Pegodo ingante,

—Timönö Wäo wëmi eñëmi. Botö
imo mäniniñäni pönömenque waadete
pönëñönäni bitö iñömö näwangä botö
imote godömenque waadete pönëmitawo.

Äñongä,

—Awënë, Ao ämopa. Bitö imite botö
waadedö ante bitö do eñëmipa.

Angä eñëninque Itota,

—Waadäni iñömö botö obegaidi
wënäni bai iñönänite bitö tömënäni
inänite botö angainö ante odömonte
apænëbi eñencædänimpa, angantapa.

¹⁶Ayæ wæætē,

—Timönö Wäo wëmi eñëmi. Bitö
näwangä botö imote waadete
pönëmitawo.

Äñongä,

—Awënë, Ao ämopa. Bitö imite botö
waadedö ante bitö do eñëmipa.

Angä eñëninque Itota,

—Waadäni botö obegaidi bai iñönänite
bitö tömënäni inänite aacæbiimpa,
angantapa.

¹⁷Itota mempoga go adopoque
tömengä ingante,

—Timönö Wäo wëmi eñëmi. Bitö
botö imote waadete pönëmitawo, ante
angantapa.

Itota mempoga go adopoque tömengä ingante, Bitö botö imote waadete pönemitawo, ante angä ëñëninque Pegodo wæwente inongäimpa. Incæte Itota ingante,

—Awënë bitö tömää ëñëmi imipa. Bitö imite botö waadedö ante bitö do ëñëmipa.

Ante wæyongä Itota wæætë,
—Waadäni iñömö në botö obegaidi bai iñönänite bitö tömënanä inänite botö angainö ante odömönte apänebi ëñëncädänimpa. ¹⁸Bitö imite näwangä ämopa. Bitö wëñämiyedë tömëmi nämä daga wëñadinque, Ædönö goinëmo, ante bitö goinënonque do gobi imitapa. Nöwo iñömö bitö picämi bayedë bitö pædæ gopoyömi wacä incæ bitö imite godö daga wëñadinque bitö goinënämaï iñömö mänñömö bitö imite mäocä gocæbiimpa.

¹⁹Pegodo ingante mänömainö ante apänedinque Itota iñömö, Tömengä ingante æbänö wänönäni wëñongä Wængongui ñäö apäite bai nänö ëmönö edonque bacäimpa, ante odömoncæte ante apänegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota ëmiñäningä nänö në waadecä

²⁰Pegodo guiquënë dadi ëmante botö Itota ëmiñänimo nänö në waadebo iñömö tömëna miñæ tee empo pömo acantapa. Mänimo iñömö do möni cæñedë Itota tönö äññömonque tæ contadinque, “Awënë bitö imi æcänö godö odömonguinaa, apänebi ëñëmönie,” ante në apänedimo inömoimpa. ²¹Pegodo botö imo adinque Itota ingante,

—Iñgä iñömö në tee empo pongä diyæ æbänö tömengä beyæ bacäimpa.

²²Äñongä Itota wæætë,

—Botö ocæ ëmante ponguinganca tömengä ayæ quëwencæcäimpa, ämo bai bitö wæætë ædö cæte në ämi inguimii. Botö iñömö në anguimo imopa. Bitö guiquënë botö miñæ tee empo ponguënëmi imipa, angantapa.

²³Mänömaï beyæ pancadäniya möni tönñädäni weca godinque gode ä gode ä cædinque botö imotedö ante apänedinque, Iñgä iñömö cöwë wänämaï quëwengungä ingampa, ante tedewengadänimpa. Itota iñæmpa, Iñgä iñömö wänämaï quëwencæcäimpa, ante änämaï ingacäimpa. Wæætë, “Botö ocæ ëmante ponguinganca tömengä ayæ quëwencæcäimpa, ante ämo bai bitö ædö cæte anguimii. Botö anguimo imopa,” ante mäninque angacäimpa.

²⁴Tömënanä, Iñgä wänämaï quëwengä ingampa, ante näni në apänedimo iñömö edæ botö tömengä nänö në ëmiñänimo adobo imopa. Tömëmo, Æbänö batimpa, ante botö apänedö iñömö näwangä ante në apänedimo inte botö adodö ante tömänö ante në yewämönimo imopa. Mäninö ante botö angainö iñömö näwangä impa, ante mönitö ëñëmönipa.

²⁵Itota iñömö nanguï pönï godömenque wadö wadö cægacäimpa. Æbänö cæcäa, ante tömää nänö cægainö ante adinque yewämömöni bai mänintacoo möni yewämönintacoo ñönongui ante edæ inguipoga tömäo incæ wii eyepæ incädönimpa, ante pönëmopa. Mäninque ante yewämömopa.